

Yisasife Kanale Ke Yoni Kaemalenea Ke.

Yisasi'a nago agi'a Kemo'e haimu'enena maine.

¹ Ehe¹ma Anumaya Koti¹ma ma mopama taloma ohunea kanafina Yisasina nago agia Kemo¹e huno maineane. Anumaya Koti¹ene tokae¹ana maina¹ane. Ani Kemo¹a, Yisasi¹e, Anumaya Koti¹ene nago¹ya hu-maina¹ane.

² Maina¹ageno ehe kanafina ani kanoa Anumaya Koti¹ene tokae¹ana maina¹ane. ³ Anumaya

Koti¹a hapaigeno Yisasi¹a muki¹a yana talo humaleneane. Yisasi¹a nago yana talo ohunea

yana omalene. ⁴ Ani Yisasi¹a muki¹a veala hamaimu ne¹amamia kano maineanagino ani haimu¹amo¹a veala aye hale-ma-te yama¹a hane.

⁵ Ani hale yamo¹a haniki mainea yapina aye hale-mainegeno hani-ki-mainea yamo¹a alino asu ohune.

⁶ Anumaya Koti¹a nago kanoa hu-tegeno emaine. Ani kanomo agia Yoni¹e. ⁷ Ani kanoa

hale yamo ke hama-paigahe emainege¹ya agai keleti muki¹a vea¹mo¹ya hale yafe “Tamage hane.” hu¹ya agaife amakupi male¹ya ametiti hisaya yafe emaine.

⁸ Yoni¹a hale yamona aepa¹a omainegi afa¹a hale yamona aepa¹a hanea kanomofe hama-paigahe emaine. ⁹ Ani tamage

hale yama'a ma mopale eno muki'a vea'ne aye hale-ma-tegahe emaine.

¹⁰ Ani Yisasi'a ma mopama talo hu-malenea kano emaineanagi ma mopafi vea'mo'ya agete'ya aepa'a havilama hu'ya ohavinae. ¹¹ Agai'a talo hu-malenea mopale emaineamagi agai'a vea'mo'ya avale'ya falu fala hu'ya o'avalenae. ¹² Avale'ya o'atage'ya nagoke nagoke'mo'ya falu fala hu'ya Yisasina avale-mainaya vea'mo'ya Yisasife amakupi male'ya amametiti nehaya vea'mogamina Yisasi'a tokiya'aleti "Anumaya Koti nafa'neyagae." huno hu-ne'ama-te. ¹³ Ani vea'mo'ya vaya'mo kolateti o'ama-temagi Anumaya Kotiteti ama-tene. Vemo augafa ageno ha'ye hu yateti o'amatene Anumaya Kotiteti amatene. Vea'mo'ya nafa'ne atesaya amakesa haviya yateti o'amatemagi Anumaya Kotiteti amatene.

¹⁴ Yisasina nago agi'a Kemono atetegeni ve maineno tagai'ene mainegeta agaila alu aotage tokiya hale yama'a ne'agone. Ani kanoa Anumaya Kotina aiya nagoke nafa'ne'a maineamagino nafa'a agai'a alu aotage tokiya hale yama'a amigeno ali falu huno kayone'age ya'ene tamage'age hu ya'ene agai agu'afina hiya hu-maine.

¹⁵ Yoni'a keha keha nehuno agaife mage hie "Ma kanomofe nayona mage hu'na tamaha-paimainoe haenaga'a nago kanoa nagaila onatenele mainea yafe nagaila ago nagase-mainea kanoa egahiema hu'na tamaha-paimainoane."

16 Ali falu huno kayone yama'a hiya hu-mainefiti tagaila muki'amogatina taya huno kanale manu tamiteno nago'a kanale manuene nelamie. 17 Tamage Anumaya Koti'a kahegi kema malenea kea Mosesena ayapi maleteno hapaigeno hama-pai-mainiamagi ali falu huno kayone ya'ene tamage hu ya'ene Yisasi Kalaisiteti ne'alune. 18 Nagoke kanomo'a Anumaya Kotina o'agene. Tamage muki'a veala o'agenae. Aiya nagoke nafa'ne'amo'a Anumaya Koti'ene nago'ya hu'ana maina'amagino ani kanomo'a Nefa avate maineleti Nefana agai'age tave-nelino aepa'a hu-gafino taha-pai-maine.

Mono ti fal-mate Yoni'a mono ke nehie.

19 Isaleli vaya'mo'ya Yelusalemu mainaleti Livae nofi vaya'ene mono note kava vaya'ene humatage'ya Yonife “Kagaya tagae?” hutama havigeho hu'ya hama-pai-mainae. Hama-paige'ya mo havigageno Yoni'a ma ke huno hama-nepaiye. 20 Yoni'a ani ke fala-kino ohunegi ani kea hu falote huno mage huno hie “Nagaya Kalaisi, Anumaya Koti'ma taugafa ali-gatigahe hu-tenea kanoa nagaya omainoe.” huno hie. 21 Hige'ya “Ani kanoa omainmagi kagaya tagae? Ilaiyaga mainapi?” hu'ya havigageno “A'ao nagaya ani kanoa omainoe.” Yoni'a make huno hige'ya “Nagi Anumaya Koti aune kano mainapi?” hu'ya hageno “A'ao.” huno hie. 22 Hige'ya “Taha-paiyo kagaya tagae? Hu-latenaya vaya'mogamina kenona'amima hama-

paisuna kea kagesafiti kagaika ali'yafe na'ane ke nehane?" hu'ya havi-negae. ²³ Nehageno Yoni'a kenona'amilela mage huno hama-nepaiye "Nagaya ma kano mainoe. Nage ai'na ka'me kotegati keha keha hisua kano mainoe. Aisaiya'a Anumaya Koti aune kanomo'a nayo hu-malenea kea mage hu'na nehue

'Anumaya visia kana alitama hilato hutama ali fatago hiho.'

huno hu-maineanne." huno hie. ²⁴ Anima havigesia kema ali'ya vaya vayala Falasia vaya'mo'ya hu-ma-tenae. ²⁵ Ani vaya'mo'ya Yonife mage hu'ya havi-negae "Kalaisigaene Ilaiyagaene Anumaya Koti aune kanoenema omaineka na'a higeke tina fale ne'amatane?" hu'ya havi-ge-mainae. ²⁶ Havigageno Yoni'a kenona'amilela mage hie "Ma nagaya titeti fale nelama-toamagi tamakaipina nagola o'agenaya kanoa he-ti-mainae. ²⁷ Heti-maineamagino ani kanomo'a haenaga'a egahie. Nagaya afa kano mainoamagi'na agai aiyalela ayesuana onategahie." huno hu-mainae. ²⁸ Yoni'a Petani kumate Yotani timona atu kaiyaga maineno vea'ne ti fale ne'ama-teno mani kea hu-mainea kehe mehavi-ge-mainae.

Yisasi'a Anumaya Kotina Sipi sipi nafa'ne'a maine.

²⁹ Faete'ya kotige'ya Yisasi'a Yonitega ene'egenno Yoni'a ageteno mage huno nehie "Ageho mani kanoa Anumaya Kotina Sipi sipi nafa'ne'ae. Haenaga'a haesageno falisia yateti

ma mopale vea'mogamina kefo ya'amia alitalesia yafe emaine. ³⁰ Ani kanomofe nayona mage hu'na tamaha-pai-mainoe 'Haenaga'la esia kanomo'la nagaila onatenele mainea yafe nagaila ago nagase-mainea kano egahie.' hu'na tamaha-pai-mainoane. ³¹ Nagaya agaila aepa'la o'agenoanagi Isaleli vea'mogamina Yisasina amave-ligahe tina mo fale-ma-tesoe hu'na emainoane." huno hie.

³² Yoni'la mage huno hama-pai-mainie "Anumaya Kotina Alu Aotage Avamu'amo'la nama kana huno ikapinagati elavino ea'yamo augafalela emainege'na age-mainoe. ³³ Nagaya agaila o'agenoanagi Anumaya Koti'la ti fale-ma-to yate hu-natenea kanogino mage hie 'Kagaya agegane nagai'ni Alu Aotage Avamu'mo'la elavino nago vemo augafale'ma emaisigekama agesana vemo'la vea'mogamina Alu Aotage Avamu'aleti fale-ma-tegahie huka havigane.' huno hige'na havi-mainoane. ³⁴ Nagaya ani kema hia yana ago age-mainoleti tamaha-nepauve ma kanoa Anumaya Kotina ne'amo mainie hu'na nehue." huno hie.

Tali'la (3) vaya'mo'ya Yisasi'ene meli lo'kae'ya umainae.

³⁵ Faete'ya kotige'ya Yoni'ene agai'aene tokae'ana nemai'la kanolata'ene ete'ya he-ti'ya mainae. ³⁶⁻³⁷ Yisasi'la ne'vigeno Yoni'la ageke huno ageteno mage hie "Anumaya Koti Sipi sipi nafa'nea atu maine." huno hige'ana Yoni'ene tokae'ana nemai'la kanolatana ani kea havite'ana Yisasina akave ne'va'e. ³⁸ Akave

ne'va'ageno Yisasi'a mai-yahae huno anaketeno ke huno hana-vige “Na'afe ne'a'e?” huno hige'ana anakaya mage ha'e “Lapaiga hanate nemaine?” hu'ana neha'e. Lapai tagai kefina hu-mave-lina kanoe huno hie. ³⁹ Yisasi'a mage huno hie “Etana mege'o.” huno hana-paige'ana agai'ene ne'va'ageno une kige'ana noma'a mogete'ana ani kanalela agai'ene maina'e.

⁴⁰ Yoni kema havite'ana Yisasi akave'ma umaina'a kanolatapitila nago kanomo agia Etalu'e ani kanoa Saimoni Pitana agana'amo'e. ⁴¹ Etalu'a hagoteno nepu'amona Saimonife mo atiyeno mogefalote huteno mage huno hapaiye “Anumaya Koti'ma taugafa ali-gatigahema hutegeno emainea kanoa Kalaisina nagaya ago agoe.” huno hie. ⁴² Huteno Saimonina avaleno Yisasite ne'va'ageno Yisasi'a ageke huno ageteno mage hie “Kagaya Saimoniga Yonina nemofogae kagai kagia mage hu'na nemaloe Sifasigae Pitagae.” huno nehie. Ani agilatamogania nago'ya hu-maina'e. Tagai kefina yafa'mogae huno malene.

Yisasi'a Filipife'ene Nataniolofe'ene ke humaine.

⁴³ Faete'ya kotigeno Yisasi'a Kalili visia agesa havino vilegati Filipina mogeteno mage huno hapaiye “Kagaya nakave eno.” huno hapaiye. ⁴⁴ Filipi'a Petesaita kumate kanoe. Ani kumala Etalugani Pitagani kumale. ⁴⁵ Filipi'a Nataniolona moge-falote huteno mage huno hapaiye “Nago kanomofe Anumaya Koti amaune

vaya¹ene Mosese¹ene mono auta¹mafi kae-malenaya kanoa tagaya ago age-falote hunana agaya Nasaleti Yisasi¹e Yosefena nafa¹ne¹amo maine.” huno hie. ⁴⁶ Higeno Nataniolo¹a mage huno hie “Nasaleti kanale yana falote hisifi? Falote ohugahie.” huno higeno Filipi¹a mage huno hie “Eka mego.” huno hapaiye.

⁴⁷ Hapaige¹ana ne¹a¹ageno Yisasi¹a Nataniolona ageteno mage hie “Ageho Isaleliti tama kanolafane. Mani kanoa nagola havige¹a omalenea kano maine.” huno hie. ⁴⁸ Higeno Nataniolo¹a mage huno havinege “Nagai aepa¹a na yu havimainanane?” huno havige¹geno Yisasi¹a mage hie “Filipi¹a kagaila moge ohunegeka kagaya fiki yosamo aepale mainanage¹na nagaya ago kage-mainoe.” huno hie.

⁴⁹ Higeno Nataniolo¹a mage hie “Hulaveli kanomoga Anumaya Koti nafa¹ne mainane. Kagaya Isaleli kotega ala sauve kano mainane.” huno hie. ⁵⁰ Higeno Yisasi¹a Nataniolofe mage hie “Fiki yosamo aepale mainanage¹na nagaya kage-mainoafe tamage nehane huka kagupi maleka kametiti nehano? Haenaga¹a tusi¹a ala kava¹yaga efalote hinageka agegane.” huno hapai-mainene. ⁵¹ Yisasi¹a amakaife mage hie “Tamagelafa hu¹na tamaha-nepauve tamakaya ikamo¹ma aihalenetama ne¹agetama ikapinagati emainoa kano vaya¹mo natenea kanomonilela Anumaya Kotina ensole anaga¹amo¹ya naugafalela haite¹ya lavite¹ya nehisagetama agegahae.” huno hama-nepaiye.

2

Kena kumate nago kanomo'a a alimaine.

¹ Tole kana maite'ya Kalili hanea kumala Kenaeha nehaya kumate nago kanomo'a a aligahema higeno Yisasina ita'amo'a anima a'ma aligahema hia nopi umaine. ² Umainege'ya “Yisasiga kagai'enema tokae'ya nemaiya anagakaene eho.” hu'ya ke hage'ya umainae. ³ Umaine'ya nenageno nofi alagamo tina ha'no higeno Yisasina ita'amo'a Yisasina mage huno hapaiye “Nofi alagamo tina ha'no hie.” huno hanepaiye. ⁴ Higeno Yisasi'a mage hie “A'oko 'Na'a ma'a huo.’ huka naha'opaiyo kagai yana omalene. nagaya tokiya'ni'a amavelisua kana'a falote ohune.” huno nehie. ⁵ Nehigeno Yisasina ita'amo'a kave'ma talo tala'ma hu'ya amamiya vea'nehe mage huno hama-paiye “Nago kema hinagetama agai ke akave maleho.” huno hama-nepaiye.

⁶ Yuta vaya'mogami mono kemo'a mage humaine “Muki'a kanalela muki'a yana sese hutama ti faleho.” huno humaineane. Ani yafe sikisi'a (6) yafa ti ke'ayola vani hataleti'a (100) lita hanea ke'ayola anilela hane. ⁷ Hanegenon Yisasi'a kave'ma talo tala'ma hu'ya ne'amamiya vea'nehe mage huno hama-paiye “Mani li ke'ayo'yakafina hefitama havateho.” huno hama-paige'ya hefi havate-mainae. ⁸ Havatageno “Kavete'ma kava yagai-mainea kanole osi'a hefitama alitama momiho.” huno hige'ya hefli'ya umainae.

9 Hefili'ya momigeno ani kavete'ma kava yagai-mainea kanomo'a ani lina hagoteno'a titafa haniamagi haenaga'a eteno nofi alagamo ti hapaegeno neno akekeana higeno ani lina ea kama'a o'ageneamagi hefi'yama ali'ya'ma aya vea'nemo'yage havimainae. Kavete'ma kava kanomo'a a'ma alia kanohe ke huno mage huno hapaiye. 10 “Muki'a vaya'yaga hagote kanalela haga'age tina amamige'ya mageno amamu hige'ya haviyama hia tina ne'amamiya yamagi kagaya hagote kanalela afa li tamiteka haenaga haga'age tina nelamine.” huno nehie.

11 Manima taloma hia tokiya avame yana Yisasi'a hagote kanale Kalili hanea kumala Kenae hu'ya nehaya kumate ani kavala talo nehuno tusi'a ala tokiya hale yama'aene amavelige'ya agai'enema tokae'ya nemaiya anaga'amo'ya agete'ya ali'ya amakupi male'ya amametiti hu-mainae. 12 Na'a hu-maletege'ya Yisasi'ene ita'amo'ene agana'amo'yaene agai'enema tokae'ya nemaiya anaga'amo'yaene Kapaneamu lavi'ya osi kana'a anile mainae.

Yisasi'a ala mono nopi mone ali'ya ne'aliya vaya amanati-talene.

13 Nago ala imua Anumaya Koti'ma Yuta veaya'mogami amakinagomogami amaugafama aligatimainea kanahe amakesa havi havi nehaya imu negiya kana eva'yi hugahe higeno Yisasi'a Yelusalemu haimaine. 14 Yisasi'a ala mono nopi haino mogeana vaya'yagamo'ya pulumaka afuma sipi sipi afuma namama malenage'ya

vea'mo'ya miya hisaya yafe malenageno Yisasi'a mokemaine. magi nago'a vaya'mo'ya alu kotega nehanea monea ne'ali'ya ani kumate'ma nehanea monea anona'a amamisaya yafe folomole male'ya mopale mainageno momakemaine. ¹⁵ Momaketeno nofiteti alifagagi maleneno muki'a vaya'ma sipi sipima pulumaka afuyakaene mono nopiti ali helafi ne'ataleno monema ayeyahae'ma nehaya vaya'mogami folomo'amiene mone'amiene ali helafi-talene. ¹⁶ Namayagama miya nehaya vayafe mage huno hamapaiye “Alitama eviho. Mafina nenafa nona tamakaya alitama maketi kumala talo ohiho.” huno nehie. ¹⁷ Nehige'ya agai'aenema tokae'ya nemaiya anaga'amo'ya avopima hanea kehe amakesa nehaviye. Ani kea mage huno haneane “Anumaya Koti nofena muki'a kanale magesa havi havi hu'na noka'a kanale'ya huno hanesia yafe aluya hu'na muse nehue.” huno kaemalenege'ya havimainayane.

¹⁸ Havimainayamagi'ya Yuta vaya'mo'ya ete'ya havinegae “Ani'ama hana kavala ta tokiyaleti nehane? Tokiyaka'a hane huta havisuna yafe nagola o'agenona tokiya avame yana hugeta agamano.” hu'ya nehae. ¹⁹ Nehageno Yisasi'a kenona'amia mage huno hama-paiye “Ma ala mono nona alitama lagape aitaletesage'na tali'a (3) kanale ete'na ani nona ali'na hetigahue.” huno nehie. ²⁰ Hige'ya Yuta vaya'mo'ya mage hu'ya hapaiye “Kekamo'a kanale ohia ke nehane tali'a (3) kanale ani

nona ali'na hetigahue huka nehanamagi vaya'yagamo'ya foti sikisi'a (46) kafufi mani nona kimalenaya none.” hu'ya nehae.

²¹ Hu'ya hageno Yisasi'a ani avame kea hiamagi ani mono nofema hiana agai'a augafahe nehie. ²² Yisasi'ma faliteno'ma he-ti-mainea kanafina agai'enema tokae'ya nemaiya anaga'amo'ya ani kema humainea kehena amakesa havi-mainae. Avopima hanea kene Yisasi'ma humainea kene “Tamage humaineane.” hu'ya amakupi male'ya amametiti humainae.

Yisasi'a muki'a vayamogami amaku'afina ago agemaine.

²³ Imuma negiya kanale Yisasi'a Yelusalemu maineno o'agenaya tokiya avame yana hige'ya agete'ya muki'a vea'nemo'ya “Tamage nehie.” hu'ya amakupi male'ya amametiti humainae. ²⁴ Hayamagi Yisasi'a muki'a vea'nemogami amaku'a ago amakea yafe agu'a no'amamie. ²⁵ Na'afene amakupima hanea yana ago agemainea yafe Yisasi'a muki'a vea'mogamife “Tamakupima hanea yana naha-paiyo.” huno ohune.

3

Yisasi'a Nikotimasi'ene kea kea hu-maina'e.

¹ Nago Falasia kanoa Yuta vayate ala kava kano'amimo agia Nikotimasi'e. ² Nago kegela ani kanomo'a Yisasite eno mage huno hie “Humave-nelina kanomoga tagaya ago havimainone kagaya humaveli hama-veli nehana kanomoga

Anumaya Koti'a hu-gategeka emainane. Kagaya o'agenaya tokiya avame yana nehane. Anumaya Koti'a kagai'ene omainele'asina ani'a kavala ohate'asine. Ani yafe tagaya ago havimainone Anumaya Koti'a hu-gategeka emainane.” huno hie.

³ Higeno Yisasi'a mage huno hie “Tamage-lafa hu'na kaha-nepauve anafinaga kanomo'ma nago kanoma haegafa huno o'atesiana Anumaya Koti'ma kava yagai-mainea kumala o'agegahie.” huno hie. ⁴ Higeno Nikotimasi'a mage huno hie “Alopa kanomona hana'a huno atele'asine? Ita'amo aipafinaga eteno hai falesigeno nago'ene eteno atesie huka nehapio?” huno havinege.

⁵ Havigegenon Yisasi'a mage huno hie “Tamage-lafa hu'na kaha-nepauve titeti'ene Anumaya Koti Alu Aotage Avamu'moteti'ene o'atesiana Anumaya Koti'ma kava yagai-mainea kumatela o'ugahie. ⁶ Amaugafama hanea vea'mo'ya augafa hanesia nafa'ne amategahayanagi Anumaya Kotina Alu Aotake Avamu'moteti atesia kanomona Alu Aotage Avamu'mo'a haimula amigahie. ⁷ Nagaya mani kema hua kea 'Nago'ene eteka nato huka huo.' hu'na hua kehena havika kama'yoa aika atali ohuo. ⁸ Yasimo'a agai'a hau yate alino visia yana kaulagamo'a o'agene. Afa'a uhuhu uhuhu hia ke'a haviteka hanategati'ma aepa heno falote hia ka'ene vaiyea ka'ene o'agenane. Yasimo'ma hia avamete huno Anumaya Kotina Alu Aotake Avamu'mo'a nago kanomona ne'ateana no'agone.” huno hie.

9 Higeno Nikotimasi¹a mage huno havige “Ani yana hana¹a huno falote hugahie?” huno havi-nege.

10 Havigeveno Yisasi¹a mage huno hie “Kagaya Isaleli vea¹ne hu-maveli hamaveli nehana kano mainanagi na¹a higeka ohavinane? 11 Tamage-lafa hu¹na kaha-nepauve age-mainona yafe kaha-nepauve havilinona yafe kaha-nepauvanagi mani kea tamakave¹no hu-ne¹atae. 12 Nagayama ma mopale yafe ago kaha-nepauvanagi ‘Tamage nehane.’ huka havika kagupi maleka kametiti nohanagi ikapinaga yafema kaha-paisugeka hana¹a huka havika kagupina maleka kametitia hugane? 13 Nago kanomo¹a ikapinaga ohainegi nagaya ikapinagati emainoa kanoa vaya¹mo natenea kanomo¹na nagai¹ni¹age ikapinagatila ma mopafina elavi-mainoe.

14 Mosese¹a ka¹me kotega maineno osifa¹vea talo huteno yosale malega¹maeno alisaga humainea kavala menia ani¹a hu¹ya ikapinagati emainoa kanoa vaya¹mo natenea kanomonina navale¹ya alisaga hugahae. 15 Alisaga hisageno muki¹a vea¹mo¹ya “Tamage nehie.” hu¹ya amakupi male¹ya amametiti hisaya vea¹mo¹ya agola maige maige hisaya hamaimula aligahae.”

16 Anumaya Koti¹a aiya nagoke nafa¹ne¹a maineanagi ma mopafi vea¹nehe tusiya huno hau ayamopafi haigeno ani aiya nagoke nafa¹ne¹a hu-tegeno elavino emaine. Emainegeta tagaya nagoke nagoke¹mogata agaiife tagupi maleta tametiti hisunana haniki-mai yapi tegelege nehia atafina o¹ugahunanagita agola maige maige

hisuna tahaimula aliteta maigahune. ¹⁷ Anumaya Koti'a nafa'ne'amona mopale vea'ne kaiyeke hu-mateno nofi hu-matesia yatela hu-tegeno omenegi mopafi vea'ne amaku amamema'a ali-gatisiafene huno hu-tegeno emaine.

¹⁸ Emaineanagi nago'a vea'mo'ya Yesasifena amakupi male'ya amametiti haya veala Anumaya Koti'a kaiyeke huno nofila hu o'ama-tegahianagi nago'a vea'mo'ya Anumaya Kotina aiya nagoke nafa'nehe havi'ya amakupi omale'ya amametiti nohaya yafe Anumaya Koti'a ago kaiyeke hu-ma-teteno ago nofi hu-ma-tene.

¹⁹ Kaiyekema hu-mate yamo aepa'amo'a ma'a hu-maine, aye hale-ma-te kanoa ma mopafina ago emainege'ya vea'mo'ya kefo yana nehu'ya hani yapi maisaya yafe muse hu'ya hale yafena nohamaiya yafe Anumaya Koti'a ago kaiyeke hu-ma-tene. ²⁰ Muki'a kefo kava huge huge nehaya vea'mo'ya hale yafena nohamaige'ya “Hale yapima visunage'ya kefo yatia age-falote hugahae.” hu'ya hale yapina nomae. ²¹ Tama kava nehaya vea'mo'ya hale yapima ne'eya mage nehae “Anumaya Koti'a taya higeta kanale yana hu-mainonafe muki'a vea'mo'ya agesae.” hu'ya nehae.

Mono tima fale-ma-te Yoni'a Yisasifena hu-falote huno hu-maine.

²² Na'a hu-maleteno Yisasi'ene agai'aenema tokae'ya nemaiya anaga'ene Yutia umaine'ya nago'a kana umaite'ya vea'nea mono tina fale-ma-tenae. ²³ Fale-ma-tegeno Yoni'a Ainonie

nehaya kumate maineno ani'a huno vea'nea fale-ma-tene. Ainoni kumala Salimie nehaya kuma'mo aupate hane. Kasago'ya ti'yaga ani-lega haneanagi'ya vea'mo'ya ete ete hageno tina fale-ma-tene. ²⁴ Yonina avale'ya nofipina o'atenageno ani lina fale-ma-tene.

²⁵ Yonienema tokae'ya nemaiya anaga'ene nago Yuta kanoene mono tima fale yamo au'ava yafe mohu mehu hu'ya ke vai-mainae. ²⁶ Ke vai-male'ya Yonitega mage hu'ya mo hane-paiye “Hulave nelina kanomoga Yotani limona ame haupalega kagai'enema mainegeka agaifema taha-pai-mainana kanomo'a menia agai'a tina fale ne'a-ma-tege'ya muki'a vea'mo'ya agaitega utele nehae.” hu'ya hae.

²⁷ Hageno Yoni'a mage huno hie “Anumaya Koti'a nago'a vea'mogamina nago yana o'amaminele'asina o'alile'asine. ²⁸ Tamakaya ago'ma hu-mainoa kea havilinae. Mage hu'na hu-mainoe 'Nagaya Anumaya Koti'ma taugafa ali-gatigahe hu-tenea kanoa omainogi nagaya uhagote'na ne'visugeno agaya haenaga egahie.' hu'na hu-mainoe. ²⁹ Nago vemo'a a'ma aliana agai'a a maineanagi ayama hu-mainea kanomo'a agava huno a'ma ali-mainea kea haviteno tusi'a muse nehie. Ani'ama hia avamete hu'na Yisasitega vea'ma ne'vaya yafena nagaya tusi'a muse nehue. ³⁰ Yisasi agimo'a nagaila nagaseno ala huno haigahianagi nagai nagimo'a afete tavigahie.” huno hie.

Ikapinagati emainea kanohe hama-nepaiye.

³¹ Yoni'a mage huno hie “Anafinagati elavi-mainea kanomo'a muki'a yana amakase-maineanagi ma mopaleti'ma efalote hu-mainea kanomo'a ma mopale kano maineno mopale yafeke kea nehie. Ikapinagati elavi-mainea kanomo'a muki'a yana amakase-mainie.

³² Ikapinagati elavi-mainea kanomo'a age-mainie yafe'ene havimainie yafe'ene hama-nepaiyanagi nago'a vea'mo'ya ani kea havi'ya amakupina nomalae. ³³ Nomalagi nagoke nagoke vea'mo'ya hu-mainie kea havi'ya amakupima malaya yafe 'Anumaya Koti'a tamage'age kano mainie.' hu'ya hu-lokiya ne'vaiye. ³⁴ Anumaya Koti'a hu-tenea kanomona Anumaya Koti'a Alu Aotage Avamula nago haupa nago haupa huno o'aminegi muki'a hiya huno aminegeno Anumaya Koti kea nehie. ³⁵ Higeno nefa'a nafa'ne'amofena tusi'a muse nehuno muki'a kava yagaisia yana ayapi malene.

³⁶ Nago'a vea'nemo'ya nafa'ne'amofema “Tamage nehie.” hu'ya amakupi male'ya amametitima hayana agola maige maige hisaya hamaimula ago ali-mainayanagi nago'a vea'mo'ya nafa'ne'amo'ma hia kema akave'ma omalesayana ani hamaimula o'aligahae. Anumaya Koti'a ani vea'mogamina aipa haviya hu-mateno kaiye'kea ago hu-ne'amate.”

4

Yisasi'a Samelia a'ene kea kea nehie.

1-2 “Yisasi'a Yonina agaseno muki'a vea'mogamina tina fale-ma-teno hai-mainae.” hu'ya haya ke Falasia vaya'mo'ya havimainae. Yisasi'a agai'a tina fale o'ama-tenegi agai'aenema tokae'ya nemaiya anaga'amo'ya fale-ma-tenae. ³⁻⁴Falasia vaya'mo'ya ago ani kea haviya yafe Yisasi'a haviteno Yutia ne'ataleno Kalili eteno ugahe amu'no kola mogaseno via kotega Samelia mo vaiyatete hu-mainae.

⁵Nago Samelia kuma'mo'agia Sika. Ani kumala Yekopu'a Yuta vaya'mogami amakinagomo'a nafa'ne'amona Yosefe aminea hoya hanelega hane. Yisasi'a ani kumate eva'yi hu-mainae. ⁶Yekopu'a ti he-nefia kagemuyola hanegenogemo'a amu'no-ka'no higeno Yisasi'a kama vaiye-mainea yafe kasalo haegenogemo'a ani kagemuyoti avayale eno mopale mainae.

⁷Mopale emainegenogemo'a nago Samelia a'mo'a ti he-figahe ne'egenogemo'a Yisasi'a mage hie “Tina namige'na nano.” huno hie. ⁸(Yisasienema tokae'ya nemaiya anaga'mo'ya anile omainagi kave miya hugahe ala kumataga umainae.) ⁹Yuta vaya'ene Samelia vaya'ene amako'ya hu'ya amahaote amahaote hu'ya nemaiya yafe ani Samelia a'mo'a mage huno hie “Kagaya Yuta kano mainanagi nagaya Samelia a mainogi na'a higeka nagaifena tina namige'na nano huka nehane?” huno havinege ¹⁰Higeno Yisasi'a mage huno hie “Kagaya Anumaya Koti'ma amuse yama kamisia yafema havimainate'asina tifena nagaila nahavigate'asine. Tima namio hia kanoma nage-

mainate¹asina tifena nahaviganage¹na maige maige hisana tina kamule¹asine.” huno hie. ¹¹ Higeno ani a¹mo¹a mage huno hie “Ala kanomoga ani li komua afe yapi hanegi tima he-fisana ke¹ayola omalegi hanateti ani maige maige hisua tina he-fika namigane? ¹² Yekopu¹a, tag-inagomo ani kagemuyola tamineane. Yekopu¹a nafa¹neyaga¹aene agai¹a afuyagaene ani komu-fitila ne-mainae. ‘Agaila agase-mainoe.’ huka nehapio?” huno hie.

¹³⁻¹⁴ Higeno Yisasi¹a mage huno hie “Muki¹a veala ma lipiti nesayana ete¹ya lifena amakegahianagi nagoke nagoke vea¹mogamima amamisua timo¹a amakusafinaga kapae nehagea ti kana huno lavige lavige hisige¹ya maige maige hisaya hamaimula amamigahie.” huno hie. ¹⁵ Higeno ani a¹mo¹a mage huno hie “Ala kanomogae ani lina namige¹na nano. Namisanage¹na nago¹ene onahaugahianagi¹na malela tima he-figahena ete¹na omano.” huno hie.

¹⁶ Higeno Yisasi¹a mage huno hie “Negavena mo ke hu-lika male eno.” huno hie. ¹⁷ Higeno ani a¹mo¹a mage hie “Nenave¹a omaiye.” huno higeno Yisasi¹a “Nenave¹ma omaiyema hanana tamage nehane.” ¹⁸ “Kagaya faefu¹a (5) negave¹ya mainayane meni kanafina nago vene mainananagi miya hu-ga-tenaya negave¹a omaine. Mani kea tamage huka naha-nepaine.” huno hie. ¹⁹ Higeno ani a¹mo¹a mage huno hie “Ala kanomogae nagaya ago havimainoe kagaya Anumaya Kotina aune kano¹a mainane.

20 Taginagomo'ya ma ago'yale* Anumaya Koti agia alisaga nehayanagi tamakaya Yuta vaya'mogatama 'Yelusalemu Anumaya Koti agia alisaga nehaya kumala hane.' hutama nehae." huno hie. 21 Higeno Yisasi'a mage huno hie "Ma a'moga nagayama tamage hu'na kaha-paisua ke havika kagupi ai-maleteka kametiti huo. Nago kana falote hinageno ma ago'yale'ene Yelusalemuene Anumaya Koti agia alisaga ohugahagi alu kumateti kumateti agia alisaga hugahae. 22 Tamakaya Samelia vea'mogatama agima alisaga nehaya kanomona age-lama hutama o'agenae. Tagaya Yuta vea'mogata agima alisaga nehuna kanomofe havilama hu-mainona yafe agia alisaga nehune. Tamaugafa ali-gatisia kanoa Yuta vayapiti falote nehie. 23 Nago kana falote hugahie. Ani kana ago falote hu-maine. Nenafa agima alisaga hisaya vea'moya tamage hu'ya amaku amamema'afiti Nenafa agi alisaga hisaya kanamo'a ago falote hu-maine. Nenafana amaku amamema'afiti agima alisaga hisaya vea'nehe ati ne'aye. 24 Anumaya Koti'a augafa omalenea avamula mainea yafe agai agima alisaga hugahena vea'moya amaku amamema'aleti tamage hu'ya agia alisaga hiho." huno hie.

25 Higeno ani a'mo'a kenona'a mage huno hie "Kalaisi'a, Anumaya Koti'ma taugafa ali-gatigahie huno hu-tesia kanoma esia kea nagaya ago havimainoe. Esiana muki'a yafena taha-paigahie." huno hie. 26 Higeno Yisasi'a kenona'a mage hie "Nagaya nevaya'na kakai'enema

maine'na kema nehua kanoa mani kano mainoe." huno hie.

²⁷ Mani kea nehige'ya agai'aenema tokae'ya nemaiya anagala ete'ya ne'e'ya Yisasi'ma a'mo'enema kea kea ha'a'yafe agete'ya tusi amakesa havi havi hayanagi nago'amo'ya "Na'afe nehane?" hu'ya a'mofena haviokenae. "Na'a higeka ma a'ene kea kea nehane?" hu'ya Yisasina haviokenae.

²⁸⁻²⁹ Ani a'mo'a ti kena ne'ataleno ala kumatega uno anifima mainaya vea'nehe mage huno hama-paiye "Muki'a nayoma hu-mainoa yama naha-paiya kanoa etama megeho. Ani kanoa Anumaya Koti'ma taugafa ali-gatigahema hu-tenea kanofi?" huno hie. ³⁰ Hige'ya kumala ne'atale'ya Yisasitega emainae.

³¹ Yaufa ne'age'ya Yisasi'enema tokae'ya nemaiya anaga'amo'ya Yisasifena mage hae "Hulave-nelina kanomoga nesana yana hanegi no." hu'ya nehae. ³² Nehageno Yisasi'a mage huno hie "Nagaya o'agenaya kave'nia hane." huno hie. ³³ Hige'ya ani anaga'amo'ya amakai'ami huge havige hu'ya mage hu-mainae "Nago kanomo nesia kavela ago alino me mainefi?" hu'ya hae. ³⁴ Hageno Yisasi'a mage huno hie "Nesua kavela ma hane hu-na-tenea kanomo'ma haisia kava'ma hu'na naminea ali'yana alivaya ayesua yana kave'ni'a hane.

³⁵ Ve'a'mo'ya nehaya ke mage hutama nehae 'Fo'a (4) ika maitesunageno afuma neleka kana falote hugahie.' hutama nehafi? Nagaya tamaha-nepauve tamakaya hoyafina age-

lama hutama ageho. Ani hoyafina ago afu-le-mainae. Anima hia kava hu'ya vea'mo'ya nagai kema havi'yama amakupi male'ya anametiti hisaya yafe ago afu-le-mainae. ³⁶ Afuma leana Anumaya Koti kema havisaya yafe ayama hisia kanomo'a anona'a aligahianagi aya hu-mainaya vayala amakupi male'ya amametiti hisayana agola maige maige hisaya hamaimula aligahae. Aligahayanagi ani hoyafima avina yama negalia kanomo'ene afumalegeno ayama huno ne'alia kanomo'ene nago'ya hu'ana musena huga'e. ³⁷ Manima ago'ma hu-mainaya kea 'Nago kanomo'a kali-malegeno nago kanomo'a nena'a ne'alie.' hu'ya haya kea tamage nehae. ³⁸ Nehagi nago'a vea'mo'ya kasageke hu'ya anima nagai kema ohavinaya vea'mogamina Anumaya Koti ke ago hama-pai-mainagi tamakaya ayama hugahena ani vayate ago hu-lama-togetama hama-pai-mainayanagi'ya amakupi malesagetama afa'a nena'age aligahae." huno hie.

³⁹ Ani a'mo'ma hu-mainea kehe muki'a Samelia vea'mo'ya Yisasife havi'ya amakupi male'ya amametiti nehae. Ani a'mo'a mage huno hu-mainae "Muki'a hu-mainoa yana ago naha-pai-mainae." huno hu-mainea kehe havi'ya amakupi male'ya amametiti hu-mainae. ⁴⁰ Yisasite eva'yi hu'ya mage hu'ya hae "Tagai'ene maisane." hu'ya havigageno Yisasi'a amakai'ene tole kana maine. ⁴¹ Mainege'ya kasago'ya vea'mo'ya agai kema haviya yafe amakupi male'ya amametiti nehae. ⁴² Amametiti

nehu'ya ani a'mofe mage hu'ya hapaiye
 “Menima kagai kema havuna yafe Yisasina
 tagu'a amita tametiti nohunagi tagayama agai
 kema tagaiti haviteta tagupi maleta tametitia
 nehune. Menia nehavune mani kanoa ma
 mopale vea'mogati taugafa ali-gatigahe emaine.”
 hu'ya nehae.

*Yisasi'a kava kanomona nafa'ne'amona kali'a
 alino kanale hu-tene.*

⁴³ Anile tole kana maiteno Yisasi'a ataleno
 Kalili umaine. ⁴⁴ Yisasi'a agai'a nayona mage
 huno hu-maineane “Nago mono ke hama-
 nepaiya kanomo'a agai'a vaya'amogamipi
 maineana vaya'amo'ya ‘Ala kanomo kegi
 havigetao.’ hu'ya nohae.” huno hu-maineane.
⁴⁵ Hu-maineanagi Kalili eva'yi hige'ya ani
 kumate vea'mo'ya hu falu fala hute'ya muse-
 kase hu-mainae. Na'afene ani vea'mo'ya
 Yelusalemu ala imu ki-mainaya kanale Yisasi'ma
 muki'a yama hu-mainea yama moge-mainaya
 yafe hu falu fala hute'ya musena hu-tenae.

⁴⁶ Musena hutetageno Yisasi'a eteno Kalili
 hanea kumala Kena kumate uva'yi hu-maine.
 Ani kumatela Yisasi'a tifena higeno nofi alag-
 amo ti hapae-mainea kumale. Yisasi'a anile
 umainegenon nago kamani kava kanoa, Ka-
 paneamu kumate kanogino, ne'amo'a kali ali-
 maine. ⁴⁷ Kali ne'aligeno nefa'a “Yisasi'ma Yu-
 tiati ago Kalili emaine.” hu'ya haya kea haviteno
 aupa'a nafa'ne'a ne'ataleno Yisasite eno mage

huno hie “Nafa'ne'ni'a falisia kava nehigi melika kanale huto.” huno hie.

⁴⁸ Higeno Yisasi'a mage huno hie “Tamakaya tokiya avame yama o'agenutamahena nagaifena tamaku'a havi onamitama tamametitia ohugahae.” huno hie. ⁴⁹ Higeno ani kamani kava kanomo'a mage huno hie “Ala kanomogae nafa'ne'ni'a ago faligahe nehigi afa'a kaiyayeka nagai'ene eno.” huno hie. ⁵⁰ Higeno Yisasi'a mage hie “Kagaya afa'a vuo. Nafa'nekamo'a ofaligahigi afa'a maigahie.” huno higeno Yisasi'ma hia kea havino aku'afi maleteno ametiti nehuno umaine.

⁵¹ Emainea kate eteno maitagifeno ne'vigeno ali'ya nafa'ne'amo'ya me fotu hute'ya mage hu'ya hae “Kagaila nafa'nekamo'a ago kanale hu-tegeno maine.” hu'ya me-hae. ⁵² Me hageno “Na kanale aepa heno kanale hu-tene?” huno hamavi-gege'ya “Ega yagemo'a ali tagifeno nagokete evigeno ani amuko-nakoma haiya kalimo'a kanale hu-tene.” hu'ya hae. ⁵³ Hageno nefa'a agesa haviteno mage hie “Tamage yagemo'a ani kana'ale ene'vigeno Yisasi'a 'Nafa'neka ago kanale maine.’ huno naha-pai-maine.” huno nehuno agai'aene muki'a anaga'aene Yisasife havi'ya amakupi male'ya amametiti hu-mainae.

⁵⁴ Yisasi'a Yutiati eteno Kalili emaineno ani'ama hia kavala napa tu (2) kanale tokiya avame yana hu-maine.

Yisasi'a nago kali kanoa Petesaita li kotute mainegeo alino kanale hu-tene.

¹ Haenaga'a Yuta vea'mo'ya ala imu Yelusalemu negiya kana falote higeno Yisasi'a anilega hai-maine. ² Yelusalemu kegi'yafi nago fiana sipi sipi afuyagamo fiana hane. Ani fiama hanelela ti kotuna male-maine. Ani li kotumo agia Yuta vaya'mogami* kefina Petesaitae. Ani kotutela faefu'a (5) fugagi'eta nona hane. ³⁻⁴ Muki'a kali veala aulaga asu hu-mai anaga'ene aiya avayu hu-mainea anaga'ene aiya'aya api hu-mai anaga'ene ani fugagi'eta no'yagafi alitalu hu'ya fae-mainae.

⁵ Nago anile nemaiya kanomona kali'amo'a teti eiti'a (38) kafu hu-maine. ⁶ Yisasi'a anima faeno mainea kanoa mogeteno "Mani kanoa aya'aya kana kalia alino maine." huno huteno mage hie "Kalikamo'ma ha'noma hisia yafena muse nehapio?" huno havige-maine. ⁷ Havigegeo kali kanomo'a Yisasife mage hie "Humave-nelina kanomoga tima aikalafu'ma nehia kanale'ma naya huno navaleno tipi natesia vayala omaiya yafe nagai'nige oanagi nagaila ago nagase'ya tipi aupa'a ne'vae." huno hie. ⁸ Higeno Yisasi'a mage hie "Hetika fae omanaka'a ne'alika ka vuo." huno hu-maine. ⁹ Higeno aupa'a kali'amo'a kanale hu-tegeno hetino fae omana'a ne'alino ka umaine. Kanale'ma hu-tenea kana Sapati kanalele.

¹⁰ Ani yafe Yuta vaya'mo'ya kali'ama ha'no hutea kanomofe mage hae "Meni kana Sapati kanalele. Na'a higeka faesana omanaka alika

ne'vane? Tagai'ma kahegi kemo'a Sapati kanalela ani kavala ohuo huno hu-maineanne.” hu'ya hae. ¹¹ Hageno kenona'amia mage hie “Kali'ni'a alino kanale'ma hu-na-tea kanomo'a mage huno naha-pai-mainne 'Fae omanaka'a ne'alika vuo.' huno hu-na-tene.” huno hie ¹² Hige'ya mage hu'ya havigae “Mani kanoa hana kanomo kaha-paigeka faesana omanaka alika ne'vane?” hu'ya hae. ¹³ Hayanagi muki'a vea'ma anile alitaluma hagenofena Yisasi'a alu'ale ago umainegenno anima kali'ama ha'noma hutea kanomo'a mage hie “O'agoa kanomo ani kea hu-natene.” huno ha-mapaiye.

¹⁴ Haenaga'a Yisasi'a kanale hu-tenea kanomona mono nopi mainegenno mogeteno mage hie “Kagaya ago menia kalika'a ha'no huga-tegeka kanale huka mainanagi kefo kavala nago'ene ohuo. Kefo kava'ma hisanana nago'a kana ya aligane.” huno hie. ¹⁵ Higeno mani kanomo'a via'yamo Yuta vayafena mage huno hama-paiye “Yisasi'a alino kanale hu-natenea kanoe.” huno nehie. ¹⁶ Hianagi Yisasi'ma Sapati kanale'ma kali'ama alino kanale'ma hu-tenea yafena Yuta vaya'mo'ya aepa he'ya amaipa kafa hete'ya Yisasina ali'ya havi'ya hu-ne'atae.

¹⁷ Yisasi'a mage huno hama-nepaiye “Nenafa'a muki'a kanalela ali'yana ne'alige'na nagai'enena ani'a hu'na ali'yana ne'alue.” huno hie. ¹⁸ Mani kehena Yisasi'a “Anumaya Koti'a nagai Nenafa'e.” huno nehuno “Nagaya Anumaya Koti'ene nago kana kana huta'a maino'e.” huno'ma nehia kene Sapati kanale

kahegi kema atagae-mainea yafe'ene Yuta vaya'mo'ya nago'ene ke vaite'ya “Haegahune.” hu'ya hu-mainae.

Ikapinagati emainea kano vaya'mo atenea kanomo'a ali'yama alisia agia hane.

¹⁹ Yisasi'a mage huno hie “Tamage-lafa hu'na tamaha-nepauve Nafa'ne'amo'a agai'age nagoke kavala nohianagi Nenafa'ma nehia kavala age-maineafe ani kavala nehie. Nenafa'ma nehia kavala Nafa'ne'amo'a ani kavala nehie. ²⁰ Nenafa'a Nafa'ne'amofena agu'afina nehaigeno agai'ma muki'a nehia kavala ave-nelie. Ave-ligeno ala kava'ma ago hu-mainea kavala agaseno haenaga'a tusi'a ala kavakefa ave-linegetama agetama atali atalu hugahae. ²¹ Nenafa'a fali-mainea vayala ali he-ti-mateno hamaimu'a ne'amamianagino Nafa'ne'amo'a ani'a huno haiya vea'mogamina hamaimula ne'amamie.

²² Nenafa'a nago kanomona fako hu no'ateanagi muki'a veala fako hu-ma-tesia tokiya yana Nafa'ne'amona ago amine. ²³ Aminea yafe Nenafafema muki'a vea'mo'ya agima alisaga hayana ani'a hu'ya Nafa'ne'amo agia alisaga hisae. Nago'a vea'mo'ya Nafa'ne'amo agima alisaga ohisayana ani'a hu'ya hu-tenea Nenafa agiene alisaga nohae.

²⁴ Magi nagaya tamage-lafa hu'na tamaha-pauve nago'a vea'mo'ya ke'ni'a havi'ya hu-natenea kanomofe ‘Tamage nehie.’ hu'ya amakupi male'ya amametiti hisayana ani

vea'mogamina agola maige maige hisaya hamaimula ago ali-mainae. Ani veala hagote'ya fali-mai vaya kana hu'ya mainafiti heti'ya hamaimu'amia ali-mainae. Haenaga'a Anumaya Koti'a kaiye'kea hu o'ama-tegahie. ²⁵ Tamage-lafa hu'na tamaha-nepauve nago kanamo'ma ago'ma falote hisiana amaku amamema'amo'a fali-mainaya vea'mo'ya Anumaya Koti nafa'nemo ke havite'ya akave malesayana he-ti'ya agola maigahae. Ani kana ago falote hu-maine. ²⁶ Nenafana agai'afi haimu'mo aepa haneanagi ani'a huno Nafa'ne'amofena 'Hamaimu'mona aepa'a maiyo.' huno hu-tene. ²⁷ Nafa'ne'amofena ikapinagati emainea kanoa vaya'mo atenea kanoginofe kaiye'kema hu-mateno fako hu-ma-tesia tokiya'a amine. ²⁸ Mani kehena atali ohiho. Nago kana falote hisiana muki'a ago'ma falige'yama komufi he-vai-matenaya vea'mo'ya Yisasini nagea havigahae. ²⁹ Havite'ya ani komufinagati he-ti'ya hatilavisage'ya kanale kava hu-mainesaya vea'nea heti'ya agola maigahayanagi kefo kava hu-mainesaya vea'nea he-tisageno Anumaya Koti'a kaiye'kea hu-ma-teteno kina hu-ma-tenage'ya haviya hugahae.

Nago'a ya'aene nago'a kanoene Yisasi aepa'a hu-falote hu-mainae.

³⁰ Nagai'nige nago kavala nohuanagi Anumaya Koti'a nahapai-mainea keleti kea fako hu-ne'ama-toe. Ani yafe fatago hulama hu'na kea

fako hu-ne'ama-toe. Nagai'ni'a nagesafiti ani kavala nohuanagi hu-na-tenea kanomo'a agai'a huo hea kava'age nehua yafe fatago hu-lama hu'na kea fako hu-ne'ama-toe.” huno hie.

³¹⁻³² “Nagai'nige'ma hu-hale'na aepa'a'nima tamaha-paisugeno'a ke'nimo'a haviya hugahianagi nago kanomo'ma nagaifema hu-haleno tamaha-nepaiyana nagaya ago havimainoe agayama nagaifema hia kea tamage nehie. ³³ Tamakaya vayala hu-matage'ya Yonitega vageno Yoni'a nagaifena ke tamage tamaha-pai-maine. ³⁴ Nagayama vaya'mo'ya nagaifema hu-mainaya kea 'Afa ke nehae.' hu'na huanagi tamakaya ani kea havisageno tamaugafa ali-gatisia yafe tamaha-nepauve. ³⁵ Yoni'a ka'ni kana huno maineno hanagaligeno'ma leana osi kanafi tamakaya agai ka'ni'mo'ma lea yafena musena hu-mainae. ³⁶ Muse hu-mainayanagi nago tusi'a kanale ya'aene nagai aepaene tamave-li-maine. Ani yana ali-mainoa ali'yani'ae. Nenafa naminea ali'yama ali'na avaya-yesua yana Yoni'a nagaife hu-mainea kemo agase-mainegetama agetetama nagaifena havimainae. Ani ali'ya'ni'a Nenafa hu-na-tenea yafe tamave-li-maine. ³⁷ Hu-na-tenea Nenafa'a nagaifena ago tamaha-pai-maineanagi tamakaya agaila age'a ohavitama agai aufina o'agetama hu-mainae. ³⁸ Hu-tenea kanomofena ‘Tamage nehane.’ hutama tamakupina maletama tamametiti nohaya yafe Anumaya Koti kea tamakupina alitama nomalae.

39-40 Anumaya Koti kea nayo kae-malenaya avopi hapalitama ati-yetama ago age-mainae. 'Ani avopitila agola maige maige hisuna tahaimula aligahune.' hutama tamakesa havimainae. Ani avona nagaife hu'ya tamaha-pai-mainayanagi nagaitega esaya tamakesa nohaviye. Agola maige maige hisaya tamahaimula tamamisua yafena nagaitega nomae.

41-42 Veala muse hu-na-teyafene hu'na nohuanagi tamakaifena nagaya ago havimainoe. Tamakaya tamaku'afina Anumaya Kotifena notama-haike'na ne'age. 43 Nagaya Nenafa agile emainoanagi navaletama falu fala hutama nonatayanagi alu kanomo'a agai'a agile esigetama afa'a avaletama ali falu fala hutegahae.

44 Tamakaya 'Alu vayatimo alu vayatimo'ya muse hu-late'ya ala tagi lamisae.' hutama nehayanagi Anumaya Koti'a agai'age mainegi alu Anumaya Koti'a omaineanagitama Anumaya Koti'a muse hu-lama-tesia yafena notamahaiye. Na'a nehayanagi hana'a hutama nagaifena tamakupina maletama tamametitia hugahae? 45 Tamakaya nagaife ma ke hutama ohaviho 'Nefate kaiyekea hu-la-tegahie.' hutama tamakesa ohaviho. A'ao, nagaya kaiyekea hu otama-tegahuanagino tamakayama taya hugahiema hutama nehaya kanomo, Mosese'ma tamaha-paiya kemo'a kaiyekea hu-lama-tegahie.

46 Mosese kema havitama tamakupi maletama tamametitima hale'asina nagai kene ani'a

hutama tamametitia hale'asine. Mosese'a nagaife huno kae-maleneafe ani'a hale'asine. ⁴⁷ Tamakaya Mosese'ma kae-malenea kema havitama tamakupi maletama tamametitia ohunayanagitama hana'a hutama nagai ke havitama tamakupi maletama tamametiti hugahae?" huno hamavi-nege.

6

Yisasi'a faefu tauseni'a (5,000) vene'nemogami kavela amamine.

¹ Haenaga'a Yisasi'a tipi kalefi uno Kalili* li kotuna takaeno umaine. Ani li kotumona nago agia Taipiliasie.* ² Muki'a vea'mo'ya kali'amima alino kanale hu-ma-teno tokiya avame yama hige'yama agaya yafe akave umainae. ³ Vageno Yisasi'ene agai'aenema tokae'ya nemaiya anaga'aene ago'yale hai'ya mopale mainae. ⁴ Yuta vaya'mo'ya Anumaya Koti'ma amakinagomogami amaugafama ali-gati-mainea yafe amakesa havisaya imu* kisaya kana'a ago aupa hu-maine.

⁵ Yisasi'a ageno ataleno ageana muki'a vea'mo'ya agaitega ne'ageno amaketeno Filipife mage hie "Hanateti ani vea'mo'yama nesaya kavela miya hugahune?" huno hie. ⁶ Yisasi'a Filipina ayevataga huno mani kea nehuno agayama hugahema hia yana ago havimaineno hu-maine.

⁷ Filipi'a mage hie "Nago kanomo'a tu hataletia (200) kanale ali'yana aliteno miya alino ani monea ataleno kave'ma miya

hisiana ma muki'a veakefafina osi osi hu'ya kavela alite alite hugahae.” huno hie. 8-9 Higeno nago kanoa agai'aenema tokae'ya nemaiya anaga'amogamipitila, Saimoni Pitana agana'amo'a Etalu'a, mage huno hie “Nago nafa'nemo'a faefu'a (5) mayagi tole noyamegi huno ali-lino maine. Veakefamo alino ala higeno mani kavela osi kano'a haneanagi hana'a huno taya hisie?” huno hie. 10 Higeno Yisasi'a agai'aenema tokae'ya nemaiya anaga'amofe mage hie “Muki'a veakefa 'Mopale maiho.' hutama hama-paiho.” huno hama-paiye. Ani kumala muki'a ape'age hanea kumalagi'ya muki'a veakefa mopale mainae. Ani veala faefu tauseni'a (5,000) vene'ne mainae.

11 Yisasi'a ani maya alino Anumaya Kotitega muse huno havigeteno muki'a mopale mainaya vea'mogamina fako huno amamite amamite hu-maine. Noyamene ani kava higeno muki'a vea'mo'ya ani kavela nageno amamu hu-maine. 12 Nemamu hu-male-tageno Yisasi'a agai'aenema tokae'ya nemaiya anaga'amofena mage hie “Muki'a atupa-tapa kavela alitalu hutama maleho. Nago'a osi osi atupa vitali vitali ohiho.” 13 Amakaya muki'a veala faefu'a (5) maya kano'afiti nete'ya atalaya atupayaga alitalu hu'ya tuelufu'a (12) kula ai-havate-mainae.

14 Anifi'ma mainaya veakefamo'ya Yisasi'ma hu-mainea tokiya avame yana agete'ya mage hae “Tamage huno Anumaya Kotina aune kano'a hu-tesigeno ma mopafima egahiema

huno hu-mainea kanoa mama ago emaine.” hu'ya hae. ¹⁵ Hageno Yisasi'a vaya'mo'yama hisaya kavala agu'afinaga mage huno havimaine “Mani vaya'moya nagaila sauve'ami maisua yafe navalegahe nehae.” huno nehuno ne'amataleno agai'age ago'yafi hai-maine.

Yisasi'a ti avoyale ne'vie.

¹⁶⁻¹⁷ Yagemo'a lavi-falegeno une avamema'a agai'aenema tokae'ya nemaiya anaga'amo'ya ala ti agegayalega ute'ya tipi kalefi asaga hu-mai'ya Kapaneamu vayana Yisasi'a amakai'enena o'une. O'vige'ya yaufa uge uge hu'ya ne'vageno hani ki-ma-tene. ¹⁸ Ala yasigefamo'a eno tina melino mo ai-yahae me ai-yahae huno tusiya hu-maine. ¹⁹ Tusiya hige'ya tipi kalefima mainaya vaya'mo'ya yosaleti vailagai-li'ya vayana nago'a aya'aya'a sikisi'a (6) kilomita ti kotu'mona amu'nopi ne'u'ya agayana Yisasi'a ti avoyale aiya ayeme ayeme tipi kalema hanelega ne'lege'ya agete'ya tusiya hu'ya kolia hu-mainae.

²⁰ Koli nehageno Yisasi'a mage huno hama-paiye “Kolia ohiho mamona nagayae.” huno hama-nepaiye. ²¹ Hama-paige'ya vaya'mo'ya Yisasina tipi kalefi haisaga hu-maisia yafe muse nehu'ya tipiti avalesaga nehae. Ani tipi kalemo'a visaya kumatela aupa'a uva'yi hu-maine.

Veamo'ya Yisasife ati mai'ya aye-mainae.

²² Faete'ya kotige'ya tikotu'mona atu kaiyaga mainaya vea'mo'ya agete'ya mage hae

“Nagoke tipi kale'age hanegeta age-mainone. Yisasi'enema tokae'ya nemaiya anaga'age ani lipi kalefi vayanagi Yisasi'a o'unegi ani vayala amakai'amige umainae.” hu'ya hae. ²³ Ani kumala Yisasi'a Anumayamotega nunamu huno muse huteno kavela amamige'ya ne-mainaya kumate nago'a lipi kaleyaga Taipiliasi kumateti anile ne'ae. ²⁴ Ne'e'ya muki'a vea'mo'ya megayana Yisasi'enema tokae'ya nemaiya anaga'ene omainage'ya megete'ya tipi kalefi asaga hu-mai'ya Kapaneamu Yisasife mo atiyemainae.

Yisasi'a Ikapinaga mayae.

²⁵ Atiyeme vategati atu kaiyaga umaine'ya Yisasina mogete'ya mage hae “Hulave-nelina kanomoga na yu ma kumala meli-mainane?” hu'ya havinegae. ²⁶ Havigageno Yisasi'a mage hie “Nagaya tamagelafa hu'na tamaha-nepauve tamakaya kave'ma tamamugetama nageno tamamu'ma hu-mainea yafe natia ne'ayayanagi nagaila tokiya avame yama hugetama age-mainaya yafena natia no'ayae. ²⁷ Tamakaya kasalisia kavefena maitama ati o'ayeho. Maige maigema hisaya kavefe'ke maitama atiyeho. Nagaya Nenafa'a, Anumaya Koti hu-na-tenea kanomo'na ikapinagati emainoa kanoa vaya'mo natenea kanomo'na mani kavela tamamigahue.” huno hie.

²⁸ Hige'ya mage hu'ya havinegae “Tagaya hana'a huta Anumaya Koti ali'yana alisune?” hu'ya havinegae. ²⁹ Hageno Yisasi'a mage

hie “Mani ali'yana Anumaya Koti'la muse nehia ali'yane. Agayama hu-tegeno emainea nafa'nemofe tamakupi maletama tamametiti hisaya yafe muse nehie.” huno hie. ³⁰ Hige'ya muki'a vea'mo'ya mage hae “Hana augafa tokiya avame yana tave-lisanageta ageteta tagupina maleta tametiti hisune? ³¹ Nayona taginagomo'ya vaya omai kotega maine'ya nago kavela agia manae nehaya kave ne-mainayane huno kae-maleneane 'Ikapinagati maya amamige'ya ne-mainae.' huno kaemaleneane.” hu'ya nehae.

³² Hageno Yisasi'a mage hie “Nagaya tamagelafa hu'na tamaha-nepauve ikapinagati elavimainea maya Mosese'la agai'a o'amaminegi Nenafa'a ikapinagati tama maya menia nelamamie. ³³ Anumaya Koti'ma tamamia mayamo'la ma'la hu-maine nago kanoa ikapinagati ea maya mainea yafe ma mopale mainaya veala hamaimula amamine.” huno hie.

³⁴ Hige'ya mage hu'ya hae “Ala kanomogae muki'a kanalela ani maya tamige lamige huo.” hu'ya hae. ³⁵ Hageno Yisasi'a mage huno hama-nepaiye “Nagaya hamaimu amamisua maya mainoe. Nagaitegama esia vea'mo'ya nago'ene amakala oteghae. Nagayama hu-lama-tesua yafe amaku'afi male'ya amametiti hisaya vea'mo'ya tifena o'amakeghae.

³⁶ Nagaya ago tamaha-paugetama nagaila ago nagemainayanagi nagaya hu-lama-tesua yafena tamakupina maletama tamametitia nohae. ³⁷ Muki'a Nenafa'ma naminea

vea'mo'ya nagaitega egahae. Nago kanomo'ma nagaitegama esige'nahena 'Eteka vuo.' hu'na hu o'ategahue. ³⁸ Hu-na-tenea kanomo'ma haisia kava'ma hisua yafe ikapinagatila hu-natege'na emainoe. Nagai'ni'a nagesafiti kavala hugahe omenoe. ³⁹ Hu-na-tenea kanomo'ma haisia kava'ma hisuana ma'a hu-maine naminea vea'nefitila nagoke kano'a fanane ohisage'na ma mopama ha'noma hisia kanafina muki'a fali-mainesafiti ali he-ti-matesuge'ya agola maige maige hugahae. ⁴⁰ Nenafa'a ma'a yafe musena nehie muki'a vea'mo'ya nafa'ne'amona ne'age'ya agayama hu-matesia yafe havilama hu'ya amakupi male'ya amametiti hisayana agola maige maige yana aligahae. Alitesage'na ma mopama ha'no hisia kanafina nagaya fali-mainesafitila ali he-ti-ma-tesuge'ya agola maige maige hu'ya maigahae." huno hu-maine.

⁴¹ Yisasi'ma "Nagaya ikapinagati elavi-mainoa maya mainoe." huno hu-mainea kehe Yuta vea'mo'ya Yisasifena ke vai'ya kasago'ya ke hu-tenae. ⁴² Mage hu'ya nehae "Ma kanoa Yisasi'a, Yosefe nafa'nefi? Nefa'ene ita'amoene ago age-mainone. Na'a higeno menia 'Ikapinagati elavi-mainoa kano mainoe.' huno nehie." hu'ya hae.

⁴³ Hageno Yisasi'a kenona'amia mage huno hie "Tamakaya tamakaitamifima kasago'ya kema hatagaya kea ataleho. ⁴⁴ Nago kanomo'a nagaitega agai'a nomegi hu-na-tenea Nenafa avayu hinageno nagaitega enage'na nagaya ma mopama ha'no hisia kanafina fali-mainesifiti ali

he-ti-tesugeno haimula aligahie.

⁴⁵ Anumaya Koti aune vaya'mo'ya mage hu'ya kae-malenayane

Muki'a vea'mogamina Anumaya Koti'a hu-maveli hamaveli hugahie hu'ya kae-malenayane.

Muki'a vea'mo'ya Nenafa'ma hu-mavelia kea havite'ya akave malenaya vea'mo'ya nagaitega ne'ae. ⁴⁶ Nago kanomo'a Nenafana o'ageneanagi Anumaya Kotitegati emainea kanomo'a agai'age Nefana age-mainae.

⁴⁷ Tamage-lafa hu'na tamaha-nepauve nagaifema havi'ya amakupi male'ya amametiti hu-mainaya vea'mo'ya agola maige maige hisaya hamaimula ago ali-mainae. ⁴⁸ Nagaya nagai'ni'a hamaimu amamisua maya mainoe. ⁴⁹ Ani tamakinagomo'ya vaya omai kotega maine'ya nago kave'mo agia manae hu'ya nahaya kave ne-mainayanagi ago fali-mainae. ⁵⁰ Fali-mainayanagi ma'a augafa ikapinagati elavia maya nesaya vea'mo'ya ofaligahae. ⁵¹ Nagaya Ikapinagati elavi-mainae maya mainoe. Ani mayamona haimu'a hane. Nago'a vea'mo'ya mani mayama nesayana agola maige maige hugahae. Ani maya nagai'ni'a naugafae. Ma mopale'ma mainaya veala agola maige maige hisaya yafe naugafa atalete'na faligahue.” huno hie.

⁵² Hige'ya Yuta vaya'moya mani kekena ke vai'ya mage hu'ya hae “Mani kanomo'a hana'a huno augafa'a taminegeta nesuna yafe

nehie?” hu'ya hu-mainae. ⁵³ Nageno Yisasi'a mage hie “Nagaya tamage-lafa hu'na tamahane-pauve tamakayama ikapinagati emainoa kano vaya'mo na-tenea nafa'nemoni naugafaene kolani'aenema onesayana maige maige hisaya tamahaimula tamakupina omalegahie. ⁵⁴ Nago'a vea'mo'ya naugafaene kolani'aenema nesayana agola maige maige hisaya hamaimula ago ali-mainayanagi'na ma mopama ha'no hisia kanafina fali-mainesafitila ali he-ti-mategahue. ⁵⁵ Nagai naugafa, kave tama hane. Kolani'aenena tama li hane. ⁵⁶ Nago'a vea'mo'ya naugafaene kolani'aenema nesayana nagai nagupi mainage'na nagaya ani'a hu'na amakai amakupina mainoe. ⁵⁷ Nenafa'a haimu'aene kanomo'a hu-nateneanagino nahaimula namige'na mainoe. Nago'a vea'mo'ya nagai naugafama nesayana nagai tokiyafiti hamaimula alite'ya maigahae. ⁵⁸ Ikapinagati elavi-mainea maya ma'a augafa maya hane. Yuta vaya'mogami amakinagomo'ya ne-mainaya maya kana ohune. Ani maya nete'ya ago fali-mainayanagi nago'a vea'mo'ya ikapinagati elavi-mainea mayama nesayana agola maige maige hugahae.” huno hie. ⁵⁹ Yisasi'a mani kea Kapaneamu mono nopi huno hama-pai-mainea ke.

Yisasi'a agola maige maige hisaya yafe hu-mainae.

⁶⁰ Muki'a akave'ma ne'vaya vea'mo'ya ani kea havite'ya mage hu'ya hae “Manima hu-mave-lia

kemo'a tusi'a kana nelahaiye. Hana kanomo mani kea haviteno akave malesia amuko'a hane?" hu'ya hae. ⁶¹ Hageno Yisasi'a ani kehena akave'ma ne'vaya vea'mo'ya kasago'ya kema haya kea ago agu'afinaga haviteno mage huno hie "Mani kemo'a otamahaifi? Natalesaya tamakesa nehavifio?" huno hamavi-nege. ⁶² Nagayama, ikapinagati emainoa kanoa vaya'mo natenea kanomo'na, ete'nama hagote'na nemauva kumate'ma visugetama nagesayana hana'a hugahae? ⁶³ Anumaya Koti Avamu'mo'a maige maige hisaya tamahaimula nelamianagi tamakai tamaugafamo'a nagola kanale yana notamamie. Nagaya Anumaya Koti Avamu'mo'a naminea ke tamaha-pai-mainoe. Ani kemo'a maige maige hisaya tamahaimula nelamamie. ⁶⁴ Mani kea tamaha-pai-mainoanagi "Nago'amogatama ani kehena tamakupina alitama nomalae." huno nehuno nayoma aepa he-mainea kanafina Yisasi'a amakupi male'ya amametiti ohisaya vea'ene agai'ama agesi huno kame ya hu-tesia kanoene ago haviline. ⁶⁵ Yisasi'a nago'ene mage hie "Ani yafe mage hu'na tamaha-pai-mainoane nagoke veala amakai'amia nagaitega omegahagi Nenafa esaya amaku amakesa amamisige'ya nagaitega egahae." huno hie.

⁶⁶ Mani kema hige'ya kasago'ya akave'ma umainaya veala ete'ya mai-yahae hu'ya atale'ya umaine'ya nago'ene agai'enena me vai-o'ayenae. ⁶⁷ Yisasi'a tuelufu'a (12)

anaga'amogamife mage huno hamavi-nege "Tamakaya ani'la hutama nagaila natalegahao?" huno hamavi-nege. ⁶⁸ Hamavi-gegeno Saimoni Pita'la kenona'la mage hie "Anumayamoga hana kanomote visune? Kagai kemo'la maige maige hisuna tahaimula nelamie. ⁶⁹ Tagaya ago havilinone kagaya alu aotage kava'age kanoa Anumaya Koti'la hu-gategeka emainananagita kagaifena tagaya tagupi maleta tametitia ago hu-mainone." huno hie.

⁷⁰ Higeno Yisasi'la mage hie "Tamakaya tuelufu'la (12) anaga'nimogatamina nagaya ago hapali-lama-tenoamagi tamakaipina nago kanomoga Kefo Avamu'ene mainane." huno hie. ⁷¹ Mani kema hiana Yutasife hu-maine. Yutasi'la Saimoni Isakaliotina nafa'ne'amo'le. Tuelufu'la (12) anagapiti Yisasina agesi huno kame ya hutesia kanohe hu-maine.

7

Fugagi'eta nopi maine'ya imu negiya kanale Yisasi'la mogegahe umaine.

¹ Ani kanafina Yutia kotega vaya'mo'ya hae-saya amakesa haviya yafe Yisasi'la Yutia vai-o'ayeno Kalili kotega ute ete huno maine. ² Ala kana, fugagi'eta nopi maine'ya imu negiya kana aupa nehie. ³ Aupa higel'ya Yisasina agana'amo'ya mage hu'ya hapaiye "Ma kumala ne'ataleka Yutia kotega uge'ya kakave'ma nehaya veala kagayama tokiyakaleti'ma alina ali'yana ageho. ⁴ Nago kanomo'la 'Muki'la vea'mo'ya nagesae.' huno kesi ali'yana no'alia

yane. Kagaya ani tokiya ali'yana muki'a ma mopale vea'mogami amaufi alige'ya ani ali'yaka'a ageho.” hu'ya hae. ⁵ Hayanagi ani agana'amo'ya agaifena havi'ya amakupi male'ya amametitia ohunaya yafe ani kea humainae. ⁶ Yisasi'a mage hie “Ali'yani'a amavelisua kana'ni'a falote ohunegi tamakaya muki'a kanalela tamakai'ma tamahaisia kavala hisaya kanatamilelagi afa'a haiho. ⁷ Nagai ke nohaviya vea'mo'ya tamakaifena musetami nehagi nagaya 'Ase ohu kava nehae.' hu'na hama-pauva yateti nagaila amaipa kafa he-nenatae. ⁸ Tamakaya Yelusalemu imulega viho. Nagaya ali'ya kana'ni'a falote ohuneanagi'na ani yafe menia imulega o'ugahue.” huno hie. ⁹ Ani kea hama-paiteno o'uno afa'a Kalili kotega maine.

Yisasi'a imulega umaine.

¹⁰ Agana'amo'ya imulega ago utageno Yisasi'a haenaga anilega hai-maine. Vaya amaulela o'unegi kesi fala-kino umaine. ¹¹⁻¹² Falakino umainege'ya Yuta vaya'mo'ya agayama imule'ma esiafene hu'ya moge mege hugetayana hige'ya mage hu'ya hae “Ani kanoa hanate maine?” hu'ya hamavi-gage'ya anifima alitalu hu-mainaya vea'mo'ya Yisasifena sumi sumi hu'ya nago'amo'ya “Kanale kanoe.” hu'ya nehage'ya nago'amo'ya “Vaya aye-mavataga hugeno omai kanoe.” nehage'ya hu'ya hae. ¹³ Hayanagi Yuta vaya'mogamife koli haya yafe

ani kea ala kea ohunagi osi kefiti sumi sumi hu'ya hu-mainae.

¹⁴ Ani imu kanamo amu'nopinaga Yisasi'a ala mono nopi haino hu-mave-li-mainae. ¹⁵ Hu-mave-nelige'ya Yuta vea'mo'ya tusi'a amama'yo ne'ai'ya mage hu'ya hae “Mani kanoa hana avo nopi uno age-mainea kanomo avopitila taha-nepaiye? Avo nopina o'unea kanomo'a hanateti ani kea haviline?” hu'ya hae. ¹⁶ Hageno Yisasi'a kenona'amia mage huno hama-paiye “Hu-mave-nelua yana nagesafiti tamaha-nopaugi neva'ya'ma hu-na-tege'na emainoa kanomo naha-pai-mainea ke tamaha-nepauve. ¹⁷ Nago'a vea'mo'ya ‘Anumaya Kotina haisia kava hugahune.’ hu'yama hisaya vea'mo'ya ma ma hu-lamave-nelua kea nagesafiti tamaha-nepaufi Anumaya Koti'a naha-pai-mainea ke tamaha-nepaufi havigahae. ¹⁸ Havigahayanagi nago kanomo'a agai'a agesafiti kema hisia kanomo'a ‘Nagai nagi alisaga hisae.’ huno nehianagi nago kanomo'ma ‘Neva'ya'ma hu-na-tenea kanomo agi alisaga hisae.’ huno hisia kanoa kanale agu agesaene kano mainea yafe havigea ohugahie. ¹⁹ Mosese'a kahegi kea ago tamaha-pai-mainea ke tamakaitamifina nago kanomoga ani kemona akavela nomalane. Na'a higetama menia nagaila nahaegahena nehae?” huno hie. ²⁰ Hige'ya melitalu hu-mainaya vea'mo'ya mage hu'ya hae “Kefo avamu'mo kagaila kagusafina maineno kavale-liteno nehie. Ta'ya kahaegahena nehageka nehane?” hu'ya hae. ²¹ Hageno

Yisasi'a mage huno hama-paiye “Nagaya nago tokiya ali'yama Sapati kanale'ma alua ali'yafe tamama'yoa ne'aiye. ²² Mosese'a nayona 'Nafa'netamimona agoya amega augafa'a taga hu-taleho*.' huno hama-pai-maine. Ani kavala agai'a alino aepa ohenegi Mosesena aginagomo'ya ani yana ali'ya aepa he-mainae. Ne'mo'ma agoya ano'ya'a tagama hayana Sapati kanale taga hu-mainae. ²³ Tamakaya Mosese'ma kahegi kema o'atagaesaya yafe Sapati kanalela ne'mo agoya ano'ya'a taga nehayanagi na'a higetama nagayama Sapati kanalema nago kanoma muki'a augafama ali'na hilatoma hua yafena tamahaiya vai-nena-tae? ²⁴ Havigu ke nehane. Afa'a amega yate agetetama 'Kefo kava nehane.' hutama nehagi tama kava hisigetama agetetama kaiyekea hu-teho.” huno nehie.

Ve'a'mo'ya “Yisasi'a hana'a augafa kano maine?” hu'ya havigahe hu-mainae.

²⁵ Nago'a Yelusalemu mainaya vea'moya Yisasi'ma hia ya agete'ya mage hae “Ma kanoa ala vaya'mo'yama haegahunema haya kanofi? ²⁶ Ageho vaya amaulagafina kea nehianagi nago yana hu no'atae. Kava vaya'mo'ya ma kanomofe Anumaya Koti'a vea'mogati taugafa ali-gatigahie huno hu-tegeno emainea kanoa mainea yafe havimainafi? ²⁷ Anumaya Koti'a taugafama ali-gatigahema hu-tegeno emainea kanomofena 'Hana kumateti emaine?' hu'ya hugahayanagi ma kanoma ea kumala ago age-mainone.” hu'ya hae.

28 Hageno Yisasi'a ala mono nopi haino maineno hu-mave-nelino ala kefiti mage huno hie “Tamakaya nagafena ago havilama hutama nage-mainafi? Nagayama emainoa kuma'enefe havimainafi? Nagaya nagai'ni nagesafiti omenogi nagai'ma hu-natenea kanomo'a tokiya'age kano maineanagitama tamakaya agaila o'agenae. 29 O'agenayanagi nagaya agai'ene mainoleti hu-natege'na emainoafenagi'na ago age-mainoe.” huno hie. 30 Hige'ya agaila atafa hugahe hayanagi falisia kana'a yaufa falote ohunea yafe augafalela nago kanomo'a atafa ohune. 31 Ohunayanagi muki'a anifima mainaya vea'mo'ya agaifena havi'ya amakupi male'ya mage hae “Anumaya Koti'ma taugafa ali-gatigahema hu-tenea kanoma esiana ma mainea kanomo'ma tokiya avame yama hu-mainea kavala agasesifi? A'ao o'agasegahie. Ma kanoa Anumaya Koti'ma taugafa ali-gatigahema hu-tegeno emainea kano maine.” hu'ya hae.

Ati vayala hu-ma-tage'ya Yisasina atafa hugahe ne'ae.

32 Nehage'ya Falasia vaya'mo'ya agaifema sumi sumi'ma haya kea havite'ya mono note kava vaya'ene Falasia vaya'ene ati vaya'mogamina hu-ma-tage'ya Yisasina me haesaya malesaya kava hu'ya avalegahe ne'ae. 33 Ne'ageno Yisasi'a mage huno hie “Osi kana kano'a tamakai'enena maite'na hu-natege'na emainoa kanolega ugahue. 34 Tamakaya nagafena natiyegahayanagi nagaila onagegahae.

Visua kumatela tamakaya o'ugahae.” huno hie. ³⁵ Hige'ya Yuta vaya'mo'ya amakai'amifi huge havige hu'ya mage hae “Agayama ‘Nagaila onagegahaema.’ hia kumala hanama'alegafiga hanegenonehiehie? Agaya Kaliki kotega Yuta vaya'mogatina tatale'ya umainaya kotega umaineno Kaliki vea hu-mave-li hamaveli hugahe nehifi? ³⁶ Agayama hia kea “Tamakaya nagaila natiyegetesayana onagegahae. Visua kumatela o'ugahae.’ huno'ma hia kemo aepa'ana'ane huno nehie?” hu'ya hae.

Yisasi'a ofalita maige maige hisuna tife hu-maine.

³⁷ Imu kime hai'ya mogi ha'noma haya kana tusi'a ala kanae. Ani kanale Yisasi'a he-tino ala kefiti mage hu-maine “Nago'a vea'ma tifema amakesia veala nagaite e'ya tina me neho. ³⁸ Nago'a vea'mo'ya nagaife havi'ya amakupi male'ya amametitia hisayana Anumaya Koti auta'mafina ani vea'mofe mage hu-maineane ‘Ofali tina kasago'ya timo agu'afina hava-temaineno vali-lavino tavigahie.’ huno hu-maineane.” huno nehie.

³⁹ Yisasi'a anima hia kea “Alu Aotage Avamu'amofe hu-maine.” Ani Alu Aotage Avamula Yisasifema havi'ya amakupi malesaya veya amamite amamite hugahe nehie. Ani kema hia kanafina Yisasi'a yaufa ikapinaga ohainea yafe Alu Aotage Avamu'amo'a yaufa omenegenonehiehie hu-maine.

Veamo'ya agaifena tolefi ali fako hu-mainae.

⁴⁰ Nago'a alitalu hu-mainaya vea'moya ani kea havite'ya mage hae “Tamage-lafa huno mani kanoa Anumaya Koti aune kano emaine.” hu'ya hae. ⁴¹ Hage'ya nago'a vea'mo'ya “Anumaya Koti'a taugafa ali-gatigahe hu-tenea kano maine.” nehage'ya nago'a vea'mo'ya “Anumaya Koti'a taugafa ali-gatigahe hu-tenea kanomo'a Kalilitila falote ohugahie. ⁴² Anumaya Koti auta'mafina mage huno kae-maleneane

‘Anumaya Koti'a taugafa ali-gatigahema hu-tenea kanoa Tevitina aginagomo egahie. Teviti'ma Petelehemu nemaiya kumate ategahie.’ huno kae-maleneane.” hu'ya nehae.

⁴³ Ani vea'mo'ya agaifena tolefi ali fako hu'ya alu ke alu ke nehae. ⁴⁴ Hage'ya nago'amo'ya “Agaila atafa hiho.” hu'ya hayanagi nago kanomo'a augafalela atafa ohune.

Mono note kava vaya'mo'ya Yisasifena havi'ya amametiti nohae.

⁴⁵ Ati vayala ete'ya mono note kava vayate'ene Falasia vayate'ene vage'ya mage hu'ya hamavigae “Na'a higetama avaletama nomae?” hu'ya hae. ⁴⁶ Hage'ya ati vaya'mo'ya mage hu'ya hae “Yisasi'ma hia kea nayona nago kano'mo'a ani'a augafa kea ohigeta ohavinona yafe avaleta nomone.” hu'ya hae. ⁴⁷ Hage'ya Falasia vaya'mo'ya mage hae “Tamakai'enena ago aye-lamavataga hu-mainefi? ⁴⁸ Ifi nago'a kava vayapi Falasia vayapi ‘Yisasifena havi'ya amakupi male'ya amameti hu-mainae.’ hu'ya

haya kea havimainafi? ⁴⁹ A'ao kava vay-ala ani'a ohunagi kahegi kema ohavi'yama alitaluma hu nemaiya vea'mogamina Anumaya Koti'a hai vai-ma-teno haniki-mainesia yapina hu-mategahie.” hu'ya hae. ⁵⁰⁻⁵¹ Hageno Nikotimasi'a nayoma Yisasite'ma emainea kanomo'a amakaipi maineanagino mage hie “Tagai mono kemo'a mage huno hie ‘Hagotetama nofi'ma hu-tesaya kanomona ‘Na'a ma'a humainoe.’ huno hisia kea havitetama kefo kava'ma humainesia kanomona nofila huteho.’ huno humaineane.” huno nehie. ⁵² Nehige'ya “Kagaya kagai'enena Kaliliti kano mainapi? Anumaya Koti ke kae-malenaya kefina hapalika havilama huteka kagai'enena havio Kaliliti nagola aune kano omegahie.” huno hu-maineane hu'ya nehae. ⁵³ Nehage'ya muki'a vea'mo'ya atagu-fe'ya atale'ya kuma'amilega ute ete hu-mainae.

8

Kefo kava hu-mainea ala avale'ya Yisasite emainae.

¹ Muki'a vea'mo'ya kuma'amilega ute ete hageno Yisasi'a Olivi yosa hanea ago'yafi haimaine. ² Kege'afiti Yisasi'a he-tino ala mono nopi umainege'ya vea'mo'ya melitalu hageno Yisasi'a mopale maineno mono kea hama-nepaiye.

³ Hama-nepaige'ya kahegi kema havilinaya anaga'ene Falasia vaya'ene nago ala alu vene moli nehige'ya agete'ya avale'ya alitalu humainaya vea'mogami amaufi me he-ti-tenae.

4 Me he-ti-tete¹ya Yisasife mage hu¹ya nehae “Hu-maveli kanomoga ma a¹mo¹a alu vene moli nehigeta ageteta avaleta ne¹one. 5 Mosese¹ma kahegi kema taminea kemo¹a ma¹a hu-maine ‘Ani kava¹ma hisia a¹mona yafateti haetama he-vai-teho.’ huno hu-mainegi ‘Kagaya na¹ane huka nehane?’ hu¹ya nehae. 6 Agai¹fema mani kema hayana aye-vataga hu¹ya nago¹a havige hisigeta atafa huta kaiyeke hu-tegahune.” hu¹ya hayanagi Yisasi¹a ape huno mopafi maineno aginagoleti avo negae. 7 Avo nega¹ge¹ya anile¹ma he-ti¹ya maine¹ya mani kema havige havigema haya vayafe Yisasi¹a he-tino mage hie “Tamakaipiti¹ma nago osi kefo yaka¹a omalenesia kanomoga hagoteka yafana haga¹yu huka mani a¹mo augafalela aiko-lío.” huno hie.

8 Mage huteno eteno ape huno mopafi avo negae. 9 Mani kema hige¹ya muki¹a atagu-fe¹ya ute ete hage¹ya hagote¹ya vayatamamo¹ya atale¹ya vage¹ya haenaga muki¹amo¹ya atale¹ya ute ete hageno Yisasi¹a ape huno mainegeni ani a¹mo¹a aule he-tino maine. 10 Mainegeni Yisasi¹a he-tino ani a¹mofena mage huno hie “Ma a¹mogae mani vayala hanatega vae? Nago kanomo¹a kagaila kaiyekema hu-gatesia kanoa omainefio?” huno hie. 11 Higeno mani a¹mo¹a mage hie “A¹ao, ala kanomogae, nago kanoa omaine.” huno higeno Yisasi¹a mage hie “Nagaya nagai¹enena kaiyekea hu okategahugi afa¹a ugananagi eteka nago¹ene kefo yana ohuo.” huno nehie.

Yisasi'a ma mopafi ka'ni maine.

¹² Haenaga'a Yisasi'a mono nopi alitalu hu-mainaya vaya'yagahe mage hu-maine “Nagaya ma mopafi veala aye hale-ma-tesua kano mainoe. Nagai nakave'ma malesaya vea'mogatama maige maige tamahaimula hanea hale yana alitetama haniki yapina ute ete ohugahae.” huno hie. ¹³ Hige'ya Falasia vaya'mo'ya Yisasifena mage hu'ya hae “Kagaya kagaika'a kehe hu-falote nehananagi kekahena havita tametiti ohugahune.” hu'ya hae. ¹⁴ Hageno Yisasi'a mage huno hie “Tamage nagaya nagai'ni'ahe kea nehuanagi hua kehena havitama tamameti hiho. Na'afene nagaya aepama he'nama emainoa kuma'ene visua ka'ene age-mainoanagitama tamakaya nagayama emainoa kuma'ene visua ka'ene o'agenae.

¹⁵ Tamakaya ma mopafi vea'mogamina no maiyateti fako nehayanagi nagaya nago kanomo no maiyana fako nohue. ¹⁶ Fako nohuanagi nagaya nago kanomoma fako hu ne'a-tesugenofena kema hua kelela havitama tamameti hiho. Nagaya nagai'nige fako nohuanagi hu-natenea Nenafa'a nagai'ene tole huno ali'yana ne'alino fako nehie. ¹⁷ Tamakai mono kemo'a mage huno nehie “Tole kanolatamoganima ke'animo'ma nagoke kate'ma visiana ke'animo'a tamage huga'e.’ hutama nehayane. ¹⁸ Nagaya nagai'ni'ahena kea hu-falote hu'na nehugeno nagai'ma huanatege'na emainoa Nenafa'a nagai'fena ani'a

huno hu-falote nehie.” huno nehie. ¹⁹ Hige'ya havite'ya Falasia vaya'mo'ya mage hu'ya havigae “Negafa'ema hana kanoa hanate maine?” hu'ya havigageno Yisasi'a mage hie “Tamakaya nagai'ma onagenayana Nenafana ani'a hutama o'agenae. Nagai'ma nage-mainale'asipa Nenafana ani'a hutama age-mainale'asine.”

²⁰ Yisasi'a mani kea ala mono nopina muse yama nemalaya kaiyaga maineno mani kea humave-lianagi agayama falisia kana'amo'a aupa ohunea yafe nago kanomo'a agaila atafa ohune.

Yisasi'a vea'mogamifena “Visua kumatega o'ugahae.” huno nehie.

²¹ Yisasi'a eteno nago'ene mage humaine “Nagaya ago visugetama nagaifena natiyegahayanagi tamakaitami kefo yatamia o'ataletama hanesigetama faligahae. Nagayama visua katela tamakaya o'ugahae.” huno hie.

²² Hige'ya Yuta vaya'mo'ya amakai'amifina mage hu'ya hae “Nagayama visua katela tamakaya o'ugahae huno'ma hia kemona aepa'a agai'a augafa hae-faligahe nehifi?” hu'ya hae.

²³ Hageno Yisasi'a mage huno hie “Tamakaya afetegati emainayanagi nagaya anafinagati emainoe. Tamakaya ma mopafiti emainayanagi nagaya ma mopafiti omenoe. ²⁴ Na'afene

nagaya tamakaila ago tamaha-pai-mainoe ‘Tamakaitami kefo yatamia o'atalesageno hanesigetama faligahae.’ hu'na hu-mainoane. Tamakaifema nagaya ‘Ma'a kano mainoe.’

hu'na hu-mainoa kehe havitama tamakupi maletama tamametitima ohisayana kefo yatamia o'ataletama hanesigetama faligahae.” huno hie. ²⁵ Hige'ya “Kagaya tagae?” hu'ya havigageno Yisasi'a mage hie “Nagaya la'nae hu'na tamakaila hagote'na tamaha-pai-mainoane. ²⁶ Tamakaifema kasago'ya kema, hu-lamate'na fako hisua kea hane. Nagai'ma hu-na-tege'nama emainoa kanomo'a tamage ke'age kano mainege'na agaitegati nagaya havimainoa ke ma mopafi vea'mogatamina tamaha-nepauve.” huno nehie.

²⁷ Ani kea Nefafema nehige'yagi amakaya havi'ya aepali'ya ohavinae. ²⁸ Ohavinaya yafe Yisasi'a mage hie “Tamakayama ikapinagati emainoa kanoa vaya'mo natenea kanomo'nina yafaga yosale alisagama hisaya kanafina tamakaya nagayama ‘Ani kano mainoe.’ hu'na hu-mainoa yafe havilama hutama havigahae. Nagaya nagai'ni nagesafitila nago yana nohue. A'ao nagaila Nenafama hu-mainea ke'age nehugetama nehavie. ²⁹ Nagai'ma hu-natenege'na emainoa Nenafa'a nagai'ene maineno muki'a kanalela agayama muse'ma hia kava'ma huafenagino nagaila nonatale.” huno hie. ³⁰ Hige'ya kasago'ya vea'mo'ya Yisasi'ma hia ke havite'ya amakupi male'ya amametiti nehae.

Ke-lamagemo'a alino tamakaila nofi hu-lama-tenaya yana ha'no hisigetama afa vea maigahae.

³¹ Yisasi'a amakupima male'ya amametitima haya Yuta vayafena mage hie “Tamakaya nagai kema muki'a kanafima akave'ma malesayana nagai ke havisaya anaga'ni'a maigahae. ³² Nagayama tamagama hua kema havilama hutama havisageno'a ani ke-lamagemo'a tamakaila kanama lamahaiya yamo'a nofi hu-lama-tenaya yana ha'no hisigetama afa vea maigahae.” huno hie. ³³ Hige'ya kenona'a mage hae “Tagaya Apalahamu nofi vaya mainona yafe nago'a vaya'mo'ya nofila hu-la-tageta miya o'ali ali'yana o'alinone. Na'a hige'ka tagaifena nofila hu-lama-tagetama miya o'ali ali'yapi mainaya vea ali ha'no hisugetama afa vaya kana hutama maigahae huka nehane?” hu'ya hae. ³⁴ Hageno Yisasi'a kenona'amia mage hie “Tamage-lafa hu'na tamaha-nepauve muki'a vea'ma kefo kava'ma taloma hisayana kefo ya'amimo'a nofi hu-ma-tege'ya miya o'ali ali'ya vea'ne kana hu'ya mainae. ³⁵ Nagi miya o'ali ali'ya veala nago'a afamopina agola omaigahayanagi atenea nafa'ne'amo'a agola ani afamopi maigahie. ³⁶ Anumaya Koti Nafa'nemo'a kefo yatamimo'ma tamatafa hu-mainea nofila alino lagama hu-taleana tamage huno ago alino laga hu-talegetama kanale hutama mainae. ³⁷ Nagaya ago havimainoe tamakaya Apalahamu nofi vaya mainayanagi nagai kemo'a tamakupina omalenea yafe nagaila nahaegahena nehae. ³⁸ Nagayama nehuana Nenafa'ma nave-li-mainea ya'yagahe nehuanagi tamakaya tamakaitami

nelamafa tamaha-pai-mainea kava nehae.” huno nehie.

³⁹ Yisasi'a hige'ya Yuta vaya'mo'ya havite'ya mage hae “Nelafa'a Apalahamu maine.” hu'ya hageno Yisasi'a mage hie “Tamagama tamakaya Apalahamu nafa'neyagama mainale'asina agayama nehia kavala talo hale'asine. ⁴⁰ Talo hale'asinagi menia nagaya tamage kema Nenafategati havimainoa ke tamaha-pauva kanomonía na'a higetama nagaila nahaegahena nehae. Apalahamu'a na'a kavala ohunea yane.

⁴¹ Tamakaya nelamafa nehia kava nehae.” huno hige'ya “Itatimo'a moli hu-liteno huno otateneane. Tagaila Anumaya Koti'a agai'age nagoke nelafa maine.” hu'ya hae.

⁴² Hageno Yisasi'a mage hie “Tamagama Anumaya Koti'a nelamafa'ma mainele'asina nagaya Anumaya Kotitegati emainoa yafe nagafena tamahaile'asine. Nagai'ni'a nagesafitila omenogi Anumaya Koti'a agai'a hu-na-tege'na emainoe. ⁴³ Na'a higetama kema hua kea havilama hutama nohaviye? Mani kemona aepa'amo'a ma'a hu-maine tamakaya havisaya tokiyatamia omaleanegitama nagai kea ohavigahae.

⁴⁴ Tamakaila Satani'a lama-tenea nelamafa agu aghesa tokiya'age hutama nelamafa akave nemalae. Aepama he-mainelegati vaya hamaeno fali-ma-tegeno omai kanoe. Ani kanomo agupina tamage kemo'a omalenegenó havigema hiana muki'a kanale nehia kava nehie. Ani kanoa havige'age kanoe. Muki'a havigema hu yana

Satani'a agai'afiti havige'age kemona aepa'a maine. ⁴⁵ Nagaya lamakaifena tamage'age ke nehua yafe havilama hutama tamakupi maletama tamametitia nohae.

⁴⁶ Hana vea'moga nageteka nagaifena 'Kefo yaka'a hane.' huka fako hu-nena-teka hu-falote hunategane? A'ao, ani'a ohugahae. Nagaya lamage'age kea hu'na tamaha-nepauvanagi na'a higetama nagaifena tamakupina havi nomalae?

⁴⁷ Nago'a veala Anumaya Koti nafa'neyaga maine'ya Anumaya Koti kea nehaviyanagi tamakaya Anumaya Koti nafa'neyaga omainaya yafe nagai kea nohaviye."

Yisasi'a "Apalahamu'a falote ohunea kanafina nagai'ni'a nagaya mainoane." huno nehie.

⁴⁸ Yuta vaya'mo'ya kenona'a Yisasifena mage hu'ya hae "Tagaya kagaifena tamage nehune 'Samelia kano mainane. Kefo Avamu'mo'a kagupina tamage maine.' huta nehune." hu'ya hae. ⁴⁹ Hageno Yisasi'a mage hie "Nagaipina Kefo Avamula omaine. A'ao nagaya Nenafa agi alisaga nehugetama lamakaya nagai nagia alitama afepinaga nemalae. ⁵⁰ Nagaya nagia alisaga nohuanagi nagoke kanomo'a nagai nagia alisaga hisia kano maine. Ani kanoa, Anumaya Koti'e, kaiyekea hu-ma-tesia kano maine.

⁵¹ Tamage-lafa hu'na lamaha-pauve nagai kema akave'ma malesamo'ya ofaligahae." huno hie. ⁵² Hige'ya Yuta vaya'mo'ya mage hae "Ani kema hana yafena tagayama havunana kagaika'a kagupi Kefo Avamula maine.

Apalahamu'ene nayona mainaya Anumaya Koti amaune vaya'mo'ya fali-mainagi kagaya 'Nagai ke akave malesamo'ya ofaligahae.' huka nehano? ⁵³ Apalahamu'a taginagomona 'Agase-mainoa kano mainoe.' huka nehano? Apalahamu'a falige'ya Anumaya Koti aune vayala ago fali-mainae. Kagaya hana'a augafa kano mainoe huka nehane?" hu'ya hae.

⁵⁴ Hageno Yisasi'a mage hie "Nagaya nagima alisaga hisuana afa ya kana hugahianagi Nenafa tamakaya 'Anumaya Kotitimo maine.' hutama nehaya kanomo'a nagai nagia alisaga nehie. ⁵⁵ Alisaga nehianagi tamakaya agaila o'agetafa hu-mainae. Nagaya agaila ago age-mainogi 'Agai'ma o'agenoe.' hule'asina tamakai kana hu'na havige'age kano maule'asinagi nagaya ago agaila age-mainoanagi'na agai kea akave nemaloe. ⁵⁶ Apalahamu'a tamakinagomo'e nagayama ma mopale'ma falote hisua kanahe agesia yafena musena hu-maineanagi ageteno'a tusi'a muse hu-maine." huno hie. ⁵⁷ Hige'ya Yuta vaya'mo'ya kenona'a mage hae "Kagaya fifiti'a (50) kafua ohunanagi kagaya vayatama omainane. Apalahamuna age-mainano?" hu'ya hae. ⁵⁸ Hageno Yisasi'a mage hie "Tamage-lafa hu'na tamaha-nepauve Apalahamuna o'atenele nagaya hagote'na monafinaga mainoane." huno nehie. ⁵⁹ Ani kema hia yafe yafa ka'yoteti ali'ya aiko-ligahe nehageno Yisasi'a fala-kino amataleno ala mono no kategati hati-lavino umaine.

9

Aulaga asu hu-mainea kanomo kea.

¹ Yisasi'a katega ne'uno nago kanoa atenea kanalegati aulaga asu humai kano moge-maine.

² Mo ne'agege'ya agai'aenema tokae'ya nemaiya anaga'mo'ya mage hu'ya havige-mainae “Hula-ve-nelina kanomoga ta hia kefo yamo alino aulaga asu hu-maine akai'afi ita'afo'amo'a kefo ya ha'a yamo aulagamo'a asu hu-mainefi?” hu'ya havigae.

³ Havigageno Yisasi'a mage hie “Mani kanomo ita'afo'amo'a akai'aene kefo yama hia yamo alino aulaga asu ohunegi Anumaya Koti'a tokiya yama'a alino kanale hu-tesige'ya muki'a vea'mo'ya agesaya yafe aulagamo'a asu hu-maine. ⁴ Menima yagema hanesiama'aene hu-natenea kanomo ali'yana alige alige huta maisune. Hanima kisiana nago kanomo'a ali'yana o'aligahie. ⁵ Menima ma mopale'ma mainoa-ma'ahena nagaya ma mopafina ka'ni aye-halesua kano mainoe.” huno hu-maine.

⁶ Mani kea huno nehuno avetu'na mopafi heteno mopaene ayegakalifeno aulagama asu hu-mainea kanomo aulagale malega'maetene.

⁷ Malega'maeteteno mage huno hapaiye “Kagaya Siloamu ti kotute mo sese huo. Ani li kotumo agia tagai kefina ‘Hu-tene.’ hu'ya nehae. Ani li kotute kaugosa mo sese huteka eteka eno.” huno higeno mo sese'ma hiana aulagamo'a kanale higeno ne'ageno noma'alega emaine.

8 Noma'alega ege'ya agai'a kumate vaya'ene nayoma mani kanomo'a monehema auka'ya nehige'ya ne'agaya vea'mo'yaene mage hu'ya hu-mainae “Ma kanoa nayoma felu maineno mon-ehema auka'ya nehia kanofi alu kanoe?” hu'ya nehae. 9 Nehage'ya nago'a vea'mo'ya “Ani kanoe.” nehage'ya nago'a vea'mo'ya “Alu kanogi vuohe ani augafa kanomo nehigi.” hu'ya hageno agai'a nehuno “Nagaya mani kano mainoe.” huno hu-mainae. 10 Nehige'ya muki'a vea'mo'ya havige-mainae “Hana'a hanageno kaulagamo'a kanale hu-mainae?” hu'ya havigae. 11 Havigageno mage hie “Nago kanoa, Yisasi'e kanomo'a, hapa talo huteno alino naulagale maleteno ‘Siloamu ti kotutega kaugosa mo sese huo.’ huno hige'na naugosa mo sese hute'na agoana aupa'a naulaga age-mainoe.” huno nehie. 12 Hige'ya vea'mo'ya “Ani kanoa hanate maine?” hu'ya hageno “Nagaya o'agenoe.” huno hu-mainae.

13 Aulagama asu hu-mainea kanomona Falasia vayatega avale'ya umainae. 14 Yisasi'a hapama ali gakalifeteno ani kanomo aulagama alino kanale'ma hu-teneana Sapati kanae. 15 Falasia vaya'mo'ya nago'ene mage hu'ya havigae “Hana'a hanageno kaulagamo'a kanale hu-mainae?” hu'ya hageno “Hapa ali ga'maeno naulagale malege'na mo sese hugeno naulagamo'a kanale hige'na age-mainoe.” huno nehie. 16 Hige'ya nago'a Falasia vaya'mo'ya mage hae “Ani kava'ma hia kanoa Sapati kanamona akave omalea yafe Anumaya Koti'a

ani kanoa hu-tegeno omene.” hu'ya nehage'ya nago'a vaya'mo'ya mage hae “Kefo yama'a hanesia kanomo'a ani tokiya avame yana talo ohile'asine.” hu'ya nehage'ya hute'ya tolefi ali fako hu-mainae.

¹⁷ Na'a hute'ya aulagama asu hu-mainea kanoa ete'ya havige-mainae “Ani kanoma kaulagama alino lamama hu-gatea kanohena na'ane hu-mainane?” hu'ya hageno mage hie “Anumaya Koti aune kanoe.” nehie. ¹⁸ Hige'ya Yuta vaya'mo'ya “Mani kanoa aulagamo'a asu hu-maineanagi menia aulaga ago agegali hu-mainie.” hu'yama haya kehena “Havige nehie.” hu'ya havi'ya amakupina male'ya amameti-tia ohu'ya aulagama asu hu-mainea kanomona ita'afomoganife'ene ke hage'ya emaina'e.

¹⁹ A'age'ya ita'afomoganife mage hu'ya hana-vigae “Mani kanoa atena'a kanafi aulagamo'a asu hu-mainea nafa'netani maineano? Na'a higeno menia aulaga ne'age?” hu'ya hana-vigae. ²⁰⁻²¹ Hanavige'ana ita'afomogania mage ha'e “Ta'agai nafa'ne maineanagita'a ta'agaya ago age-maino'e. Aulagama asu hu-mainea nafa'nema ateno'ama'a ago age-maino'anagi aulagama age-mainema'a o'ageno'e. Tapiga aulaga alino kali hu-teneafe tamakaya agai havige'ho. Alopa ve maineanagino agai'a tamaha-paigahie.” hu'ana neha'e. ²²⁻²³ Ita'afomogania Yuta vayafe koli hu'ana mani kea hu-maina'e. Yuta vaya'mo'ya kea hu-lokiya vai'ya mage hu-mainae “Nago'a

vea'mo'ya 'Yisasina Anumaya Koti'a taugafa ali-gatigahema hu-tenea kanoa ma maine.' hu'ya hisaya vea'mogamina agola mono nopitila amati-talegahune." hu'ya hu-mainaya kehe koli nehu'ana "Agaya alopa ve mainegi agai havigeho." hu'ana hu-maina'e.

²⁴ Nago'ene ete'ya aulagama asu hu-mainea kanohe ke hageno ege'ya mage hu-mainae "Kagaya Anumaya Koti aufi tamage-lafa huka kea huo. Tagaya agonana ani kanoa kefo kava'age nehia kanoe." hu'ya hae. ²⁵ Hageno kenona'amia mage huno hie "Nagaya o'agenogi agaya kefo kava nehia nepi nohia nepi o'agenogi nagoke'ya kano'ama agoana hagoteno'a naulagamo'a asu humaineanagi menia naulaga agegali nehue." huno hie. ²⁶ Hige'ya mage hu'ya havigae "Na'a hu-ga-tene? Hana'a huno kaulaga alino kali hu-ga-tene?" hu'ya havige-mainae. ²⁷ Havigageno "Nagaya ago'ma tamaha-nepauvana tamakaya ke'ni'a nohaviye. Na'a higetama etetama nahavi-negae? Tamakai'enena agai'aene tokae'ya nemaiya anaga'mogamipi maigahe nehao?" huno havige-maine.

²⁸ Hige'ya amakaya hu'ya akaya ate'ya mage hae "Kagaikage Yisasienema tokaeka nemaina kanoa mainanagi tagaya Mosesema kema nehavuna vayala anale haita mainone. ²⁹ Tagaya ago havimainone Anumaya Koti'a Mosesena kea hapai-maineanagi ma kanomo'a hanategati emaineno'e tagaya agaila no'agonane." hu'ya hae.

³⁰ Hageno aulagama asu hu-mainea kanomo¹a mage hie “Avo nama¹yo ne¹aiye. Tamakaya alu kegefa nehæ. Tamakaya hanategatipiga emainea ke ohavinayanagi naulagama alino kali hu-na-tenea kano afa kanoa omaine. Anumaya Kotitegati emaine. ³¹ Tagaya ago havimainone Anumaya Koti¹a kefo kava nehaya vea¹mogami kea nohavie. Nago¹a vea¹mo¹ya Anumaya Koti agi alisaga nehu¹ya agai¹ma haiya kava¹ma hisaya vea¹mogami kea Anumaya Koti¹a havigahie. ³² Ehe¹ma fusa kanafima ma mopama taloma hu-malenelegati¹ma emaineana nago atenea kanalegati aulaga asu hu-mainea kanoa alino kali hu-tene hu¹ya haya kea ohavinonane. ³³ Anumaya Koti¹ma mani kanoma hu-tegeno¹ma omenele¹asina nago yana agaya ohisine.” huno hie. ³⁴ Hige¹ya kenona¹a mage hu-mainæ “Kagaya kefo yapiti falote huka emainananagika tagaila menia hu-lave-ligahe nehano?” hu¹ya nehu¹ya mono nopitila avale¹ya kumatega haga¹yu hu-talenaæ.

Yisasife amametiti nohaya veala amaulaga asu hu-mainæ kana vea¹ne mainæ.

³⁵ Yisasi¹a mono nopiti¹ma anati-talaya kea haviteno ani kanoa atiyeno mogeteno mage hie “Kagaya ikapinagati emainea kanoa vaya¹mo atenea kanomofena havika kagupi maleka kametitia nehano?” huno havige. ³⁶ Havigegenõ ani kanomo¹a mage hie “Ani kanoa ta¹e? huka nehapi? Nagaila naha-paige¹na havi¹na nagupi male¹na nametiti hano.” huno hie. ³⁷ Higeno

Yisasi'a kenona'a mage hie “Kagaya agaila ago ne'agane. Ani kanoa menima kagai'enema maineno kea kea neha'ane.” huno hie. ³⁸ Higeno ani kanomo'a mage huno hie “Aye'nio Alamogae menia kagaifena havi'na nagupi male'na nametiti nehue.” huno muse nehuno aiyafi ale'ya aye-maineno Yisasi aiyale ali-soso nehuno agi alisaga nehie. ³⁹ Yisasi'a mage hie “Nagaya ma mopale vea'mogami fako hu-ma-tesua yafe emainoe. Ali fako hisuge'ya amaulaga asu humai vea'mo'ya amaulaga agesageno amaulagama hanea vea'mo'ya amaulagama asu hugahie.” huno hie. ⁴⁰ Hige'ya nago'a avate maiya Falasia vaya'mo'ya anima hia kea nehavi'ya agaifena mage hu'ya havigae “Tagaifena tamaulaga asu hu-maine huka nehano?” hu'ya havigae. ⁴¹ Havigageno Yisasi'a mage huno hie “Tamaulagamo'a asuma hu-mainesina kefo yatamia omalesinagi tamakaya ‘Taulagamo'a kali kali hu-maine.’ hutama haya yafe kefo yatamimo'a hane.” huno hu-maine.

10

Yisasi'a kanale sipi sipi afumo kava kano maine.

¹ Yisasi'a mage huno hie “Nagaya tamage-lafa hu'na tamaha-nepauve nago'a vaya'mo'ya sipi sipi kegi'yamo fiateti'ma hai ofale'ya afale-gati'ma asaga hu-mai'ya hai falesaya vayala musufa vaya mainae. ² Nago kanomo'ma fi-ateti'ma hai nefalea kanoa sipi sipile'ma kava

ne'yagaiya kano maine. ³ Fiate'ma yagai-mainea kanomo'a ani kanoa ageteno yaki-tegeno fi-ateti hai falege'ya sipi sipiyagamo'ya alenaga agea havimainaya yafe agai'a sipi sipimogamina amakia hanete hanete hu-maineanagino amakia ayete ayete huno amavaleno kumatega ne'vie. ⁴ Amavaleno'ma kumatega ne'unofena uhagoteno ne'vige'ya ani kanomona alenaga agema havimainaleti lagi'ya ani sipi sipimo'ya akave ne'vae. ⁵ Nagi o'agenaya vaya'mogami amakavela o'ugahae. Nagi ani kanomona alenaga agema ohavinaya yafe fale'ya alulega uga-hae." huno hie. ⁶ Yisasi'a mani ayame kea hama-paiyanagi amakaya havilama hu'ya ohavinae.

⁷ Ohaviyanagi Yisasi'a nago'ene eteno mage hu-maine "Tamage-lafa hu'na tamaha-nepauve nagaya sipi sipimo'yama hai falesaya fiana nagai'nige mainoe. ⁸ Mainoanagi hagote'yama emainaya vayala vaya'ma nehamae'ya musufayama nehaya vayalagi'ya sipi sipiyagamo'ya kema haya kea ohavinae. ⁹ Ma nagaya fia mainoe. Mainoanagitama nago'a vea'mogatama etama nagaipi ehai falesage'na tamaku tamamena ali-gatisugetama hai faletama mainetama elavitetama haitetama nehutama nesaya yana aligahae. ¹⁰ Musufa kanomo'a musufa yana nehuno veala nehamaeno ali haviya humategahe ne'eanagi nagaya kanale'nale tamahaimu tamamigahe emainoe. Agola ha'no ohu tamahaimula tamamigahe emainoe.

¹¹ Nagaya kanale'nale sipi sipi kava kano

maine'na sipi sipi'ni'amogamina amaku amamema'a ali-gatisua yafe faligahue. ¹² Nago kanomo'a yagaiteno mone ne'alia kanoa sipi sipimona nefa'a omaine. Omaigeno afela kalamo'ma egeno'a ani kanomo'a ataleno falegeno ani afela kalamo'a sipi sipimogamina akafu amanino mo hamae me hamae hige'ya fale'ya atagufe'ya alulega ute ete nehae. ¹³ Ani sipi sipile'ma yagaino maineno monema ne'alia kanomo'a sipi sipiyagahena agesa ohavino amataleno faleno umaine. ¹⁴⁻¹⁵ Nagaya kanale sipi sipi kava kano mainoe. Nenafa'a agu'a namige'na nagaya nagu'a amugeta'a nehu'e. Na'a hu-maino'a kava hu'na sipi sipiyaga'nimo'ya amaku'a namige'na nagaya nagu'a ne'amamue. Nagaya sipi sipi'ni'amogami amaku amamema'a ali-gatisua yafe faligahue. ¹⁶ Nago'a sipi sipiyaga'ni'a amahaote mainae. Mani sipi sipi kegi'ya'nifina omainayanagi ani afuyaga amavale'nama esuana alenaga nage nehavi'ya nagoke'age afuyakama maisayana nagoke'mo'na ani sipi sipiyagalela kava kano maigahue.

¹⁷ Nagaya 'Afa'a faligahue.' hu'na hua kekena Nenafa'a tusiya huno hau ayamopafi nehaiye. Na'afene? Nahaimula atalesugeno eteno namisige'na he-tisua'yafe nahaimula afa'a atalegahue. ¹⁸ Nago'a vayamo'ya nahaimula naha-ofalegahae. Nagaya nagai'ni'age nahaimula atalegahue. Nahaimu'ma atalesua tokiya'ni'aene atalete'na ete'na alisua

tokiya'ni'laene hane. Ani'ama hisua kava'mo kea Nenafa'a ago naha-pai-mainae.” huno hie.

¹⁹ Mani kema hia kea Yuta vaya'mo'ya havite'ya tolefi ali fako hu-mainae. ²⁰ Kasago'yamo'ya mage hae “Kefo Avamu'mo agupi hai-mainegeno aifo'nafo nehigi na'la higetama ke'la maitama havimainae?” hu'ya hae. ²¹ Hage'ya nago'amo'ya mage hae “Kefo Avamu'mo'a agupima mainele'asina mani'la augafa kea ohile'asine. Kefo Avamu'mo'a aulagama asu hu-mainea kanomo aulaga aligali hu-o'atele'asine.” hu'ya hae.

Yuta vaya'mo'ya Yisasina kame hu-tenae.

²²⁻²³ Nayona mono no kimaletē'ya fita yaki-mainaya kanahe muse nehaya imu Yelusalemu ki-mainae. Ani imua yasi ne'alia kanale negiyanagino ani kanalela Yisasi'la Anumaya Koti nopi umaineno Solomoni yasi ne'alea nona aye-nagali-malenea kaiyaga ne'vie. ²⁴ Muki'la Yuta vea'mo'ya meli'ya amu'no hute'ya maine'ya mage hae “Tagu tagesamo'a tole-lole nehuno taipamo'a kana'age nehigi. Menia hu-falote huka taha-paiyo kagaya Anumaya Koti huga-tegeka emainana kano mainano?” hu'ya hae. ²⁵⁻²⁶ Havigageno Yisasi'la mage huno hie “Nagaya ago'ma tamaha-pai-mainogi nagaifena havitama tamakupi maletama tamametiti nohae. Nenafa naminea tokiya yateti ali'yana alugetama agayana ani yana nagaya Anumaya Koti hu-na-tege'na emainoa kano mainoa yafe tama-ve-

lianagi nagai sipi sipima omaiya yafe havitama tamakupina nomalae.

²⁷ Nomalayanagi nagai sipi sipiyagamo'ya nagaila alenaga mage havite'ya nakave malage'na nagaya amakaila ago amake-mainoe. ²⁸ Amakete'na maige maige hisaya hamaimula ago amaminoanagi'ya ofaligahae. Nagaila ago nayapi mainayanagino nago kanomo'a memavayu ohugahie. ²⁹ Nenafa'ani sipi sipiyaga naminea kanogino muki'a yana amakase-mainea kano mainea yafe alu kanomo'a Nenafa ayapitila haofalegahie. ³⁰ Nenafa'ene nagai'niene nagoke maino'e." huno hie.

³¹ Hige'ya Yuta vaya'mo'ya nago'ene yafa ka'yo ali'ya haesaya kava nehae. ³² Nehageno Yisasi'a mage huno hama-paiye "Nagaya muki'a Nenafa naminea tokiya avame yana tamakai tamaulagafina ago hu-mainogi nagoke avame'yana hana avame'ya hua yamo notamahaigetama nagaila yafatetila nahaegahena nehae?" huno hama-vige. ³³ Hama-vi-gege'ya "Tokiya avame yama hu-mainana yafene huta yafatetila okahaegahunagi kagaya ma mopafi afa kano mainekagi 'Anumaya Koti'ene nagoke maino'e.' hukama hanana Anumaya Kotina kalana ategana kema hana yateti kagaila yafa ka'yotetila kahaegahena nehune." hu'ya hae.

³⁴ Hageno Yisasi'a mage hie tamakaitami mono kema kae-malenaya kemo'a mage hu-mainean

“Anumaya Koti'a mage hie ‘Tamakaitami Anumaya Kotigatama mainae.’ huno hie.” hu'ya kae-malenayane.

³⁵⁻³⁶ Ani Anumaya Koti kea kae-malenaya ke hanege hanege huno tamage'age hugahie. Anumaya Koti kema ago'ma hama-paiya vayafena “Anumaya Kotigatama mainae.” huno hu-maineana nagaya Nenafafena “Nenahaiya kano mainane huno hu-na-tege'na ma mopafina emainoema.” hu'na nehuana na'a higetama “Nagaya Anumaya Kotina ne'amo'nae.” hu'nama hua kehena “Anumaya Kotina hu-haviya hu-ne'atane.” hutama hu-nena-tae?
³⁷⁻³⁸ “Nagaya Nenafa ali'yama o'alule'asina nagafena havitama tamakupi maletama tamametiti ohale'asinagi kanale kava hale'asine. Nagaya kema hu-mainoa kehema havitama tamakupima omalenutamahena ali'yama ali-mainoa ali'yafena havitama tamakupi maletama tamametiti hiho. Na'a hisayana Nenafa'a nagai'ene maige'na nagaya ani'a hu'na agai'ene maino'ema hu'na hua kea havilama hutama havigahae.” huno nehie.

³⁹ Hige'ya nago'ene atafa hu'ya nofi hu-tegahe hayanagi amakaseno ago umaine. ⁴⁰ Uteno Yisasi'a eteno Yotani lina mo lakaeno Yoni'ma lima fale-ma-tenea kumate mo maine. ⁴¹ Mo mainege'ya muki'a vea'mo'ya melitalu hu'ya maine'ya mage hae “Yoni'a ke'ama alino lokiya vaisia yana nagola malegeta o'agenonagi ma kanomofena muki'a kema hu-mainea kemo'a tamage-lafa hu-maine.” hu'ya hae. ⁴² Muki'a ani

kumate vea'mo'ya Yisasifena havi'ya amakupi male'ya amametiti hu-mainae.

11

Lasalusi'a ago fali-mainae.

¹ Nago kanomo agia Lasalusi'e kali ali-mainae. Ani kanoa Petani kumate kanoe. Mata'ene agana'amo'a Maliagani kumale. ² Ani Malia'a nago yupa mana'age masavena Yisasina aiyale takino fale-teneno ayolagefaleti ali hau hu-teneane. Ani muna'mona asa'amo'a Lasalusi kali ali-mainae. ³ Kali alino mainege'ana ani tole nanukana-latomogania Yisasitega nago kano huta'ageno mage mo hie “Alatimogae kagaikama kahau kayamopafima negahaiya kanoa kali ne'alie.” huno hapaiye. ⁴ Hapaigeno Yisasi'a ani kema nehavino'a mage hie “Lasalusi'a kali alino fae-maineanagi falisia yafe o'alinegi mani kalimo'a Anumaya Koti agi alisaga hisayafene huno ali-mainae. Ani kalia Anumaya Koti nafa'nemo agi alisaga hisaya yafe falote hu-mainae.” huno hie.

⁵ Yisasi'a Mata'ene agana'amo'ene Lasalusi'ene ani anagafena tusiya huno hau ayamopafi nehaiya anagale. ⁶⁻⁷ Yisasi'a Lasalusi'ma kalima alia kea havianagi o'uno tole yupa afa'a nemaiya kumate maiteno agai'aenema tokae'ya nemaiya anaga'ahe mage huno hama-paiye “Yutia kotega eteta visune.” huno hu-mainae. ⁸ Hige'ya agai'aenema tokae'ya nemaiya anaga'mo'ya mage hae “Hulave-nelina kanomoga menia Yuta vaya'mo'ya

yafateti ali'ya kahaegahema haya kotega kagaya ani kotega nago'ene ugahe nehano?" hu'ya havinegae. ⁹⁻¹⁰ Havigageno Yisasi'a mopafi mainea kana'amo'a ha'no ohunea yafe kenona'amia avame kea mage huno hie "Tuelufu'a (12) auva nagoke yagefina omaleneffi? Veamo'yama yagefima vai-yesayana ma mopafi yagemo'a ai vasa humainea yafe asaga hu otavigahayanagi veamo'ya kege'ma vaiyatete hisayana aye-vasa hu yama'a amakupina omaleanagino vailino hamaegahie." ¹¹ Yisasi'a mani kea huteno nago kea mage huno humaine "Tagaila kanapatia Lasalusi'a faeno maineanagi'na nagaya visua'amo'na mogafa hu'na avale he-ti-tegahue." huno hama-paiye. ¹² Hige'ya agai'aenema tokae'ya nemaiya anaga'mo'ya mage hae "Alatimogae agayama kalima alino fae-mainesiana afa'a kanale hutegahie." hu'ya hu-mainae. ¹³ Hageno Yisasi'a mani avame kema hiana Lasalusi'a ago falimaine huno nehianagi agai'aenema tokae'ya nemaiya anaga'mo'ya ohavinaya yafe "Afa'a faeno mainegenonehie." hu'ya hu-mainae. ¹⁴ Hageno Yisasi'a ani avame kea ne'ataleno hu-falote huno hama-paiye "Lasalusi'a ago falimaine. ¹⁵ Tamakaya nagafena havilama hutama 'Tamage nehie.' hutama tamakupi maletama tamametiti hisaya yafe omainogeno falimaineanagi'na nagaya muse nehugi menia aligeta mogamano." huno hie. ¹⁶ Higeno Tomasina, nago agia Titimasi'e, tagai kefina

kuyave nafa'ne, Yisasienema tokae'ya nemaiya anagafe mage hie “Muki'amogata vigetao. Nagopi ne'visunage'ya tahaesageta faligahune.” huno hie.

Yisasi'a “Nagaya fali-mainesafiti ali he-ti-matesua kanogi hamaimu ali'ya maige maige hisaya ya amamisua kanoene mainoe.” huno hu-maine.

¹⁷ Lasalusina fo'a (4) yupa komufi he-vai-tenageno Yisasi'a uva'yi hige'ya he-vai-tenaya kanahe hapaimainae. ¹⁸⁻¹⁹ Petaniti Yelusalemua tagufa (3) kilomita aupate hanea yafe muki'a Yuta vea'mo'ya Yelusalemutila etele hu'ya Matagani Maliaganina anasa'animo'ma fali-mainea yafe hamau hu-nate'ya emainae.

²⁰ Emainageno Mata'a Yisasife “Ne'e.” hu'ya haya kea haviteno katega via'yamo mo fotu hu-mainegi Malia'a noma'afi maine.

²¹ Mainegenon Mata'a Yisasife mage hie “Alanimoga kagayama male'ma mainate'asina nasa'nimo'a ofalile'asine. ²² Ago havimainoe menia kagayama Anumaya Kotitega nago yafema havigesanana afa'a kamigahie.” huno hie. ²³ Higeno Yisasi'a mage huno hapaiye “Kasakamo'a fali-maineanagi eteno haimula alino he-tigahie.” huno hie. ²⁴ Higeno ani muna'mo'a mage hie “E, nagaya ago havimainoe ma mopama ha'noma hisia kanafina muki'a fali-mainaya vea'ma he-tisaya kanafina eteno he-tino haimula aligahie.” huno hie.

²⁵ Higeno Yisasi'a kenona'a mage hie “Nagaya fali-mainaya veala amavale he-ti'na hamaim-ula amamisua kano mainoe. Nagaya maige maige hisaya hamaimu amami yamona aepa'a mainoe. Nago'a vea'mo'ya nagaife havi'ya amakupi male'ya amametiti hisayana falite'ya het'i'ya agola maige maige hisaya hamaimula aligahae. ²⁶ Nago'a vea'mo'ya afa'a maine'ya nagaifena havi'ya amakupi male'ya amametiti hu-mainaya veala maige maige hugahayanagi'ya ofaligahae. Kagaya mani kea ago havilama huka kagupi maleka kametiti nehapi nohane?” huno havige. ²⁷ Havigegeni ani muna'mo'a mage hie “E, Alanimoga nagaya nehavi'na ago nagupi male'na nametiti hu-mainoe. Tamage nehae kagaya Kalaisigae* Anumaya Koti'a hu-ga-tegeka taugafa ali-gatigahe ma mopafi elavisana kano emainane. Anumaya Koti nafa'ne mainane.” huno hie.

Yisasi'a Lasalusife hau hu-teteno avite-maine.

²⁸ Mata'a mani kea huteno eteno via'yamo agana'amona Maliana sumi sumi huno mage huno hapaiye “Hu-mave-nelia kanoa ago emaineno kagaife ke nehie.” huno hapaiye. ²⁹ Hapaigeno Malia'a ani kea haviteno aupala he-tino Yisasi mogegahe umaine. ³⁰ Ne'vigeno Yisasi'a kumatela omenegi Mata'ene fotuma hu'ana kea keama ha'alega maine. ³¹ Mainege'ya Yuta vea'mo'ya Malia'ene nopi maine'ya hanauma hu-nate'yama emainaya vea'mo'ya Malia'a aupala he-tino kumatega via yafe

agayana hige'ya “Vae Malia'a asa'amo komulega avitegahe ne'vie.” hu'ya akave umainae.

³² Akave vageno Malia'a Yisasi mainelega mogeteno aiyafi mope hu-maineno mage hie “Alanimogae kagayama male'ma mainate'asina nasa'nimo'a ofalile'asine.” huno hapaiye.

³³ Hapaiteno avi ne'ategeno agai'enema emainaya Yuta vea'mo'ya ani'a hu'ya ne'atageno Yisasi'a Maliana ne'agegeno aipamo'a tusiya huno haviya hu-mainae.

³⁴ Aipamo'a haviya hu-mainefiti hama-vigeno mage hie “Hanate he-vai-tenae?” huno hige'ya “Alatimoga eka mego.” hu'ya hae. ³⁵ Nehageno Yisasi'a avi-te-mainae. ³⁶ Ne'atege'ya Yuta vea'mo'ya mage hae “Ageho Lasalusifena tusiya huno hau ayamopafi nehaye.” hu'ya hae. ³⁷ Hage'ya nago'a vea'mo'ya mage hae “Ma kanoa amaulagama asu hu-mainea vea'ma aligali hu-ne'amatea kanogi na'a higeno Lasalusina kali'a alino kanale hu-tegeno ofalino afa'a maiyanagi fali-mainae.” hu'ya hae.

Lasalusina fali-mainefiti Yisasi'a alino he-ti-tene.

³⁸ Yisasina aipamo'a nago'ene haviya higeno he-vai-tenaya komulega umaine. Ani komua yafa kapi he-vai-tete'ya komumo avayalela ala yafateti ali'ya ai-lile-malena. ³⁹ Ai-lile-malengeno Yisasi'a mogeteno mage hie “Mani komumo avayaleti yafana ali-taleho.” huno higeno fali-mainea kanomo asa'amo'a, Mata'a, mage huno hie “Alani'amogae mani kanoa

ago he-vai-tageno fo¹a (4) yupa komufinaga haneanagino tusi¹a hi¹mana hugahie.” huno hie. ⁴⁰ Higeno Yisasi¹a mage hie “Nagaya ago kaha-pai-mainofi? ‘Kagayama nagaifema tamage nehane huka kagupi maleka kametitima hisanana Anumaya Koti agi alisaga hisaya tokiya yana agegane hu¹na kaha-pai-mainofi?’ huno havinege.”

⁴¹ Ani yafana ali-taletageno Yisasi¹a anafinaga agesaga huno age-maineno mage hie “Nenafaga nunamuni¹a ago havimainana yafe museka¹a nehue. ⁴² Havimainanagi¹na nagaya muki¹a kanalema kahavi-go¹a kea nehavinagi afa¹a menia manile¹ma mainaya vea¹mo¹ya kagayama hu-na-tanage¹na emainoa yafema ‘Tamage nehane.’ hu¹ya amakupi male¹ya ametiti hisaya yafe kahavi-nego¹.” huno hie. ⁴³ Mani kea huteno ala kegefafiti mage hie “Lasalusiga he-tika elavio.” huno hie. ⁴⁴ Higeno Lasalusi¹a, fali-mainea kanoa, eteno he-tino elavige¹ya aiyafima ayapima augosafima kenaleti¹ma aye-gasagi-malea kanoa elavigeno Yisasi¹a mage huno hama-paiye “Kalu hetama atalegeno vino.” huno hama-paiye.

Kava vaya¹mo¹ya Yisasina haesaya ke hu¹ya ha¹ya ki-mainae.

⁴⁵ Muki¹a Malia¹enema emainaya Yuta vea¹mo¹ya Yisasi¹ma hia kavala agete¹ya amakupi male¹ya amametiti hu-mainae. ⁴⁶ Amaku¹a amiyanagi nago¹a vaya¹mo¹ya atale¹ya Falasia vaya mainalega u¹ya Yisasi¹ma

hia kavafena mo hama-pai-mainae. ⁴⁷ Hama-paige'ya Falasia vaya'ene ala mono note kava vaya'ene Kanisole vayafe ke hage'ya age'ya mage hu'ya hae “Ma kanoa kasago'ya tokiya avame ya'yaga nehigi na'la hisune? ⁴⁸ Afa'ama atalesunageno'la muki'a kanalela ani'age'yama hisige'ya muki'a vea'mo'ya ‘Tamage nehie.’ nehu'ya havi'ya amakupi male'ya amametiti hisage'ya kava vayatia, Lomu vaya'mo'ya e'ya muki'a vea'nene ala mono notiene ali haviya hugahae.” hu'ya hae.

⁴⁹ Hageno Kaiyafasi'la ani kafufina ala mono note hagote kava kano maineanagino ani vayapiti he-tino mage hie “Tamakaya tamaku tamakesa nomale. ⁵⁰ Tamakaya ohavinafi na ya kanale tamaya hisia yana hane? Muki'a veati ali haviya hisafi nago'ke kanomo'la muki'a vea'amogami anona'la falisie?” huno hama-vige. ⁵¹ Ani kafufina Kaiyafasi'la ala mono note hagote kava kanogino mani kea Anumaya Koti'la hapaigeno aune laga huno hu-maine. Agai'la agesafiti ohune. Ani aunema laga hia aepa'amo'la mage hu-maine “Yisasi'la Yuta vea'mogamife huno faligahie. ⁵² Amakai'amigetefena huno ofaligahigi alu kumate kumate mainaya Anumaya Koti nafa'neyaga amavaleno nagoke anaga hu-ma-tesige'ya maisaya yafe Yisasi'la faligahie.”

⁵³ Ani kanaleti aepa he'ya Yuta vaya'mogami kava vaya'mo'ya Yisasina haesaya kea hu'ya havite'ya huge havige hu-mainae. ⁵⁴ Ani yafe

Yisasi'a nago'ene Yuta vea'mogami amaula-gafina vai o'ayenegi nago kumala Efalaimie hu'ya nehaya kumala vaya omai kola aupa hu-mainege'ya agai'aenema tokae'ya nemaiya anaga'ene anilega u'ya mo mainae.

⁵⁵ Yuta vea'mo'ya kafu'ahē kafu'ahena Anumaya Koti'ma amakinagomogami amaugafama ali-gati-mainea yafe havi'ya alitalu hu'ya imu negiyane. Ani imuma kisaya kanamo'a aupa hige'ya muki'a vea'mo'ya muki'a kumateti hai'ya kahegi kemo hama-paiya kava hu'ya amaugafaene amaku'aene sese hugahe Yelusalemu umainae. Ago mo sese hute'ya ani imu'amia nenaē. ⁵⁶ Ala mono nopi molitalu hu'ya maine'ya Yisasife moge mege hu'ya ati-yegetayana hige'ya amakai'amifi mo hama-vige me hamavige hu'ya mage hae “Na'ane tamakesa nehaviye? Kave'ma nesutela egahifi omegahie?” hu'ya hae. ⁵⁷ Hage'ya ala mono note kava vaya'ene Falasia vaya'ene Yisasina atafa hugahe mage hu-mainae “Ma'a hiho. Yisasi'ma faesia kuma'ma agenutamahena aupa'a ani kea alitama me laha-paiho.” hu'ya hu-mainae.

12

Yisasina aiyale mana'age masave fale-tene.

¹ Yisasi'a Petani kumate, Lasalusi'a falige'ya he-vai-tenageno Yisasi'a molino he-ti-tenea kanomo kumate, uva'yi hu-mainē. Uva'yi hiana ani kanafina Anumaya Koti'ma

amakinagomogami amaugafama ali-gati-mainea yafe amakesa havi'ya imuma kisaya kana sikisi'a (6) yupa maite'ya kigahe nehae. ² Hageno Yisasina musekase kave talo tala hu-teteno Mata'a alino amamite amamite nehigeno Lasalusi'a Yisasi'ene siale mainae. ³ Mainageno Malia'a nago kilo* mana'age masave hanea ke'ayola, tusi'a mone hanea masavemo agia natie nehaya masavena alino Yisasina aiyale taki ha'no hu-teteno ayolagefaleti ali hau hu-ne'a-tegeno ani masavemo manamo'a ani nopi haino hiya hige'ya mana'a havimainae.

⁴⁻⁵ Nago kanoa, Yisasi'enema tokae'ya nemaiya anagapiti kanomo, agia Yutasi Isakalioti'e. Ani kanomo'a haenaga'a Yisasina agesi huno kame ya hu-tesia kanomo'a mage hie “Na'a higeno mani mana'age masavena afa'a ne'atale? Atalegeno nago kanomo'ma miya hile'asipa tali hataleti (K300) kina aliteta mani masaveteti monea afeno'amima omalenea vea'ne amamute'asine.” huno hie. ⁶ Mani kea mone'amima omalenea veafena hauma hu-ne'a-matea yafena nohigi muki'a kanalela monema hanea kutela agai'a yagai-maineno musufa yama nehia yafe mani kea hu-maine. ⁷ Yisasi'a mage hie “Ma munala afa'a atalegeno ma masavena afa'a ali-lineno nagayama falisuge'ya he-vai-natesaya kanalela mani masaveteti fale-nategahie. ⁸ Mone'amima omalenea vea'mo'ya muki'a yupa tamakai'ene maigahayanagi nagaya tamaikai'enena muki'a yupa omaigahue.” huno hie.

Mono note kava vaya'mo'ya Lasalusina haesaya ke hu'ya ha'ya ki-mainae.

⁹ Muki'a Yuta vea'mo'ya “Yisasi'a Petani kumate'ma emaine.” hu'ya haya kea havite'ya ani kumate umainae. Yisasina agai'age agegahe o'unagi Lasalusi'a fali-mainegeni ali he-ti-tenea kanoene anakegahe umainae. ¹⁰⁻¹¹ Lasalusi'a fali-mainefiti he-ti-mainea yafe muki'a Yuta vea'mo'ya nayoma nehaya monola ne'atale'ya Yisasina amaku'a amitafa hu'ya amametitima haya yafe ala mono note kava vaya'mo'ya Lasalusi'ene haesaya kea hu-mainae.

Yisasi'a Yelusalemu ala sauve kana huno hai fale-maine.

¹² Faete'ya kotige'ya muki'a vea'mo'ya Anumaya Koti'ma amakinagomogami amaugafama ali-gati-mainea yafe imuma kimalenale emaine'ya “Yisasi'ma Yelusalemu kumate egahie.” hu'ya haya kea havi-mainae. ¹³ Havite'ya Yisasi'ene katega mo fotu hugahe tofe yosamona haisa'a kofa-nafa hu'ya ali'ya umaine'ya ala kefiti mage hu'ya hae “Tusi'a yate taugafa ali-gatisana kanoa kanale'ya huka ne'ane. Anumayamo ali'ya alisana yafe hu-ga-tegeka emainana kanomoga Anumaya Koti'a kanale manu kamiteno kaya hu-maine. Isaleli kotega yagai-ma-tenana sauve kanomoga Anumaya Koti'a kaya hu-maine.” hu'ya hae. ¹⁴ Yisasi'a nago hosi kana afumo agia tokie nehaya afua age falote huteno agupifi haino

maine. Ani'ama hia kavala nayona Anumaya Koti kefina mage hu'ya kae-malenayane.

15 “Yelusalemu vea'mogatama kolia ohutama ageho. Menia tamakaila sauve kano-tamia yaufa tokimo agupifi haino maiteno egahie.” huno kae-maleneane.

16 Yisasi'ma ani'ama hu-mainea yupa agai'enema tokae'ya nemaiya anaga'mo'ya anima kae-malenea kea ohavianagi haenaga'age Yisasi'ma faliteno he-tino tokiya hale yama'ama hanea kumate haitege'ya amakesamo'a ai-kalo hige'ya anima kae-malenea kene vea'mo'ya ani yupama hu-tenaya kavafe'ene havi-mainae.

17 Yisasi'a Lasalusifema “Komufitila he-tio.” huno higeno fali-mainefiti'ma he-ti-mainea yupa anile'ma mainaya vea'mo'ya ani kanafina “Yisasi'a na'a ma'a kavala hu-maine.” hu'ya kea ali'ya ute ete hu'ya hama-pai-mainae. 18 Hama-paige'ya havite'ya anima tokiya avame yama hu-mainea kema haviya yafe muki'a vea'mo'ya katega Yisasi'ene mo fotu hu-mainae. 19 Hage'ya Falasia vaya'mo'ya amakai'ami amu'no'amifina ani kehena mohu mehu hu'ya mage hu-mainae “Ageho muki'a mopafi vea'mo'ya Yisasina akave ne'vayanagita atafa ohugahune.” hu'ya hu-mainae.

Nago'a Kaliki vea'mo'ya Yisasi agegahe nehae.

20 Nago'a Kaliki vea'mo'ya, Anumaya Koti agi alisaga hugahe, ani imu kave'ma nalega Yelusalemu hai-mainae. 21 Ani Kaliki vea'mo'ya Filipite umainae. Filipi'a Kalili hanea

kumala Petesaita kumateti kano mainelega u'ya mage hae “Museka'a nehunagi tagaya Yisasina agegahe ne'one.” hu'ya hu-mainae. ²² Hageno Filipi'a via'yamo Etaluna hapaite'ana ani lolemogani Yisasina mo hapai-mainae. ²³ Hapai'ageno Yisasi'a mage huno hana-paiye “Menia Ikapinagati emainoa kanoa vaya'mo natenea kanomonua tusiya hu'ya nagai nagia ali-saga hisaya kanamo'a ago eva'yi hu-mainae. ²⁴ Tamage hu'na tanaha-nepauve nagoke viti avinamo'ma asaga hu-lavino mopafima ofalinunofena nagoke viti avina'age hanegahigi nagi falinunofena ai-falo huno hageteno kasago'ya viti alagayaga aye helafigahie. ²⁵ Na'a hugahianagi nago'a vea'mo'yama muki'a ma mopafi yafema amaugafama ali'ya haite'ya hamaimu'amima atafa hisaya vea'mo'ya faligahae. Faligahayanagi nago'a vea'mo'yama ma mopale mainaya amaugafama ali'ya haisaya yafema 'Afa yanema.' hu'ya hisaya vea'mogami hamaimu'mo'a ha'no ohugahianagi'ya maige maige hu'ya maigahae. ²⁶ Nago'a vea'mo'yama nagaifema hu'ya ali'ya alisayana nakave ege ege hisae. Nakave'ma esaya vea'mo'ya maisua yate nagai'ene mainesageno Nenafa'a nagai ali'yama ne'aliya vea'mogamina ala amaki amamigahie.”

Yisasi'a yafaga yosale falisia yafe hama-pai-mainae.

²⁷ Yisasi'a mage huno nehie “Nagai nagu'amo'a tusiya huno kana'age nehige'na kasago'ya nagesa nehavugi na'ane hu'na hisue?”

‘Nenafaga menia nagai naugafale¹ma falote¹ma hugahema nehia yana ali-talo.’ hisufi? A¹ao nagaya ani nagata aisia yapi maigahe emainoe. ²⁸ Nenafaga kagaika kagi alisaga huo.” huno nehigeno anile ikapinagati age aino mage huno hie “Nagia ago alis-aga hu-mainoane ete¹na nago¹ene nagia ali-saga hugahue.” huno hie.

²⁹ Hige¹ya melitalu hu-mainaya vea¹mo¹ya agema aiya kea havite¹ya nago¹amo¹ya mage hu¹ya hae “Ikapinagati akali kalu nehie.” hu¹ya hage¹ya nago¹a vea¹mo¹ya mage hu¹ya hae “Nago ensole kanomo¹a ke me hanepaiye.” hu¹ya hae. ³⁰ Hageno Yisasi¹a mage huno hie “Ani agema aiya agea nagai naya hisia yafe nohigi mani kea tamakai tamaya hisia yafe nehie. ³¹ Menia ma kanafina Anumaya Koti¹a ma mopale vea¹mogamina kaiyeke hu-ma-tegahie. Meni kanafima ma mopale¹ma kava yagai-mainea kanoa, Satanina* ago anati-talegahie. ³² Anati-talegahigi ma mopale¹ti navalesaga hu¹ya* nahaesage¹ya muki¹a vea¹mo¹ya amaku¹a namisaya yafe amavayu hu¹na nagai¹nilega amategahue.” huno hie. ³³ Ani avame kema huno hia kemo¹a mage hu-maine “Ma yateti, yafaga yosale nahaesage¹na faligahue.” huno hama-pai-maine.

³⁴ Hama-paige¹ya vea¹mo¹ya kenona¹a mage hu¹ya hapai-mainae “Tagai mono¹mo¹a mage huno taha-pai-maine ‘Anumaya Koti¹ma taugafa ali-gatigahema hu-tesia kanoa muki¹a kanafina maige maige hugahie.’ huno taha-pai-

maineanagi na'a higeke 'Ikapinagati emainoa kanoa vaya'mo natenea kanonomia yafaga yosale navalesaga hugahae.' huka nehane? Anima ikapinagati emainea kanoa vaya'mo atenea nafa'nea ta maine?" hu'ya havigae. ³⁵ Havigageno Yisasi'a kenona'amia mage huno hie "Hale yama'aene kanomo'a tamakaipina osi kana kano'a maine. Hani kisia yana va'yi huno aiso hu-lama-tesia yafe hale yama hanea kanale vaiyatete hiho. Hani-ki-mainea yapima mainaya vea'mo'ya visaya kana o'agenae. ³⁶ Hale yama'ama hanea kanafina hale yama'aene kanohe "Tamage nehane.' hutama havitama tamakupi maletama tamametiti hiho. Ani'ama hisayana hale yamo nafa'neyaga maigahae." huno hama-pai-maine.

Kasago'ya Yuta vea'mo'ya Yisasifena havi'ya amakupina male'ya amametiti nohae.

Yisasi'a mani kea huteno ne'amataleno mo fala-ki-maine. ³⁷ Muki'a tokiya avame'yamo amaulagafi alianagi agaifena havi'ya amakupina male'ya amametitia nohae. ³⁸ Ani yafe Anumaya Kotina aune kano'a, Aisaiya'a, hu-mainea kea falote huno tamage nehie. Mage huno hu-maineanane

"Anumayamoga manima hu-mainona kea ta'ya havi'ya amaku'afina male'ya amametitia nehae? Anumayamo'a tokiya avame yama'a amave-lige'ya hana vea'mo'ya havilama nehae?" huno kae-maleneane.

39 Higeno amuha ohunayanagi'ya Yisasifena havi'ya amakupina male'ya amametitia ohunaya yafe Aisaiya'a nago'ene mage huno humaineane

40 “Amaulaga o'agesaya yafe Anumaya Koti'a amaulaga ago alino asu hu-ma-tene. Amaku amakesa havilama ohisaya yafe 'Yafa kana amanu'ene vea'ne maiho.' hu-ma-tene. Havigu amaku'a ai-yahae hu'ya nagaitega eyafenagi'na ali hilato hu o'ama-tegahue.” huno hu-maineane.

41 Aisaiya'a Yisasina tokiya hale yama'a ageteno Yisasife mani kea hu-maineane. 42 Humaineanagi Yuta kava vaya'yagafitila kasago'ya vaya'mo'ya Yisasife havi'ya amakupi male'ya amametitia hayanagi Falasia vaya'mo'ya mage hae “Mani kava'ma hisayana mono nopina omegahae huta nagalu hu-lama-tegahune.” hu'ya hu-mainaya yafe “Yisasina tagu'a ne'amune.” hu'ya hu-falote ohunae. 43 Ani veamo'ya Anumaya Koti'a “Kanale kava nehae.” huno amakima alisaga hisia yafena nohamaigi vea'mo'ya “Kanale kava nehae.” hu'ya amaki alisaga hisaya yafeke nehamaiye.

Yisasi'a kema nehia kemo'a veala fako hu-ma-tegahie.

44 Yisasi'a tokiya'age ke hu-haleno mage hu-maine “Nago'a vea'mogatama nagai'fema tamage nehie hutama tamakupi maletama tamametitima hisayana nagai'nigefena tamakupina maletama tamametitia hu-nona-tagu hu-na-tenea kanomofe'ene hu-ne'a-tae.

⁴⁵ Nago'a vea'mo'yama nagai'ma nenagayana
 Nenafa'a hu-na-tenea kanoene age-mainae.
⁴⁶ Nagayama ma mopale'ma emainoana hale
 ya kana hu'na emainoe. Nagoke nagoke
 vea'mo'ya nagai'fe'ma havi'ya amakupima
 male'ya amametitima hisayana haniki-mainea
 yapina omaigahae. ⁴⁷ Nago'a vea'mogatama
 nagai kema havitetama nakave'ma omalesayana
 nagaya tamakaila kaiyekea hu otama-tegahue.
 Ma mopale vea'mogamina kaiyekea hu-
 ma-tegahue hu'na omenogi ma mopale
 vea'mogamina amaugafa ali-gatigahue hu'na
 emainoe. ⁴⁸ Nago'a vea'mo'ya nagai'fe'ma
 amakave'noma hu'ya nagai kema amakupima
 ali'ya omalesayana hu-mainoa ke'nimo'a fako
 hu-ma-tegahie. Ma mopama ha'no hisia kanama
 eva'yima hisiana hu-mainoa ke'nimo'a fako hu-
 ma-tegahie. ⁴⁹ Mani kea nagesafitila ali falote
 hu'na tamaha-nopaugi hu-na-tenea Nenafa
 'Nage mage huka huo.' huno naha-paiya ke'age
 tamaha-nepauve. ⁵⁰ Nagaya ago havilinoe
 agai kema havitama tamakupima maletama
 tamametitima hisayana ofalitama agola maige
 maige hisaya tamahaimula aligahae. Nani
 yafe Nenafa'a naha-pai-mainea kea tamaha-
 nepauve." huno nehie.

13

Yisasi'a amaiya sese hu-ma-tene.

¹ Anumaya Koti¹ma amakinagomogami amau-gafama ali-gati-mainea yafe ala imu kigahe ne-hae.* Ani imu kisaya kana¹amimo¹a aupa hugahe nehigeno Yisasi¹a ma agesa havimaine “Ma mopa atale¹na Nenafatega visua kanamo¹a ago eva¹yi nehie.” huno nehuno muki¹a kanale¹ma ma mopale maine¹yama agai kema nehaviya vea¹mogamifena tusiya huno hau ayamopafi ne-haino agola haume haume haino mo fali-maine.

² Yisasi¹enema tokae¹ya nemaiya tuelufu¹a (12) anaga¹aene unena kavela nenageno Satani¹a Yutasifena “Havisigi huka agesi huka hama-pai-sanage¹ya Yisasina haesae.” huno agu agesa amine. Ani Yutasi¹a nago agi¹a Isakalioti¹a Saimonina nemofole. ³ Satani¹a ani¹ama hisia agu agesa amigeno Yisasi¹a ma agesa havimaine “Nenafa¹a muki¹a tokiya ago nayapi maleneanagi¹na Anumaya Koti¹a hu-na-tege¹na emainoafe ete¹na Anumaya Kotitega haigahue.” huno hu-maine. ⁴ Nehuno kave¹ma neneletila ne¹ataleno he-tino aya¹aya kena¹a hateno nemaleno taulia alino amupi ai-gagino fai-line. ⁵ Fai-lineno tina alino yopafi taki-maleno aepa heno agai¹a tuelufu¹a (12) anaga¹amogami amaiya agupia sese hu ne¹ama-teno ai-gagi-linea taulileti alino hau hu-ne¹amate. ⁶ Ali hau hu-ma-teme Saimoni Pitate vigeno Saimoni Pita¹a Yisasife mage hie “Alani¹amoga naigai naiya sese hu-na-tegahe nehano? Sese hu ona-tegane.” huno hu-maine. ⁷ Higeno Yisasi¹a mage hie “Kagaya nagayama

nehua kavala menia ohavinanagi haenaga¹a havilama huka havigane.” huno hapaiye. ⁸ Hapaigeno Pita¹a Yisasifena mage hie “Kagaya naiya sese ohutafa huka sese ohugane.” huno higeno Yisasi¹a kenona¹a mage hie “Kaiyama sese¹ma ohisuana nagai¹enena omaitafa huka omaigane.” huno hapaiye. ⁹ Hapaigeno Saimoni Pita¹a mage hie “Alani¹amoga na¹ama hinageka naiya¹agela sese hu ona-teka naya¹ene nanu¹ene sese hu-nato.” huno hapaiye. ¹⁰ Hapaigeno Yisasi¹a kenona¹a mage huno hapaiye “Nago¹a vea¹mo¹ya muki¹a amaugafama sese hu-malenaya veala amaugafalela oni¹ya¹amia omaleno haigafa¹age hamau-maineanagi¹ya amaiya¹age sese hugahae. Tamakaila kefo yama haya oni¹yatamia omaleno haigafananama¹age hu-mainagi nagoke kanomona oni¹ya¹age hauptaine.” huno hama-paiye. ¹¹ Hama-paiteno Yisasi¹a agai¹ma agesi¹ma huno haegahema hia kanoa ago age-mainea yafe “Tamakaya muki¹amogatamina oni¹yatamia omalene hu¹na nohue.” huno nehie.

¹² Amaiya sese hu-ma-teteno kena¹a alino vailino mopale maineno mage huno hama-vige “Nagayama hu-lama-toa kavala ago havilama nehafio? ¹³ Tamakaya nagaifema ‘Hulave-nelina kanomogae.’ nehutama ‘Alatimogae.’ hutamama nehayana tamage hutama nehae. Nagaya ani kanoema hutama haya kano mainoe. ¹⁴ Nagaya Alatamimo¹na hu-lama-ve-neloa kanotamimo¹na tamaiya sese hu-nelama-toe. Tamakaya ani¹a hutama nelamafugami amaiya sese hu-ma-teho.

15 Nagaya hisaya kavala ago tamave-neluafe tamakaya nagayama hu-lama-toa kavala ani'a hu-ma-teho. 16 Nagaya tamagelafa hu'na tamahanepauve ali'ya kano'amo'a kava kano'amona agaseno omainegi kayo kayo kano'amo'a hutenea kanomona agaseno omaine. 17 Tamakaya mani kema havilamama hutetama mani kava'ma hisayana kanale'ya hutama maigahae.

18 Nagaya 'Kanale'ya hutama maigahaema.' hu'nama hua kea muki'amogatamifena nohugi nagayama nahaige'na huyo-gi-malenoama'amogamife nehavi'na mani kea nehue. Anumaya Koti kema nayoma kae-malenaya kemo'a mage hu-maineane

'Nagai'enema maineno kave'ma nenea kanomo'a aiya alisaga huno nagaila aye-nalata-pegahie.' huno kae-maleneane.

Kae-maleneanagi meni kanafina mani kemo'a efalote huno tamage hugahe nehie. 19 Haenaga'a mani kemo'ma efalote hisigetama nagaifena mage hugahae 'Agaya Anumaya Koti nafa'ne maine.' hutama havitetama tamakupima maletama tamametitima hisaya yafe menia ani kana yaufa falote ohunea kanafi tamahanepauve. 20 Tamage-lafa hu'na tamahanepauve nago'a vea'mo'ya nagayama hu-ma-tesua vea'ma amavale'ya falu falama hu-ma-tesayana nagaila ani'a hu'ya navale'ya falu fala hutena-tae. Nagai'ma navale'yama falu fala hutatesayana hu-na-tenea kanomona ani'a hu'ya avale'ya falu fala hu-ne'atae."

Yutasi'a Yisasina avaleno kame vaya amayapi ategahie.

²¹ Yisasi'a mani kea hama-paitegeno aipamo'a kana'age higeno agu agesama havia agesamo'a hivi huno talavate o'ategeno mani kea hufalote nehie “Lamage hu'na tamaha-nepauve tamakaipitila nago kanomoga vaya'mo havisigi huka nagesi huka kame ya hunategane.” huno hie. ²² Hige'ya agai'a tuelufu'a (12) anaga'amo'ya o'aufi a'aufi hugetayana hige'ya “Tafepiga nehie?” hu'ya mani kanomofena ohavinae. ²³ Ohavige'na nagaya Yoni'na agai'aenema tokae'ya nemaiya anagapi nemauvanagino hau ayamopafi nagaifena hau-mainea kanogi'na avate tokaeta'a maino'e. ²⁴ Mainogeno Saimoni Pita'a anuteti avame'name huno “Havigo.” huno nahapaino “Tafe nehane huka havigo.” huno nehie. ²⁵ Hige'na nagaya Yisasina ava'ale mime u'na maine'na mage hu'na havigoe “Alani'amogae tafe nehane?” hu'na havigoe. ²⁶ Havigogeno Yisasi'a mage huno hie “Nagayama kave'ma ali'nama supufi ayete'nama ali'na amisua kanoa nagesi'ma hisia kano maine.” huno nehuno ani kavela alino supufi ayeteno Yutasi'a, Saimoni Isakaliotina nemofo amine. ²⁷ Ani kavela amigeno alitegeno Satani'a agu'afinaga mo hafaleno mainegeno Yisasi'a mage huno hapaiye “Kagaya aupala'a hisuema hisana kavala ago huo.” huno hie. ²⁸ Hige'ya anile'ma mopale mainaya vaya'mo'ya Yisasi'a Yutasife hianagi ani kemon

aepa¹a nohaviye. ²⁹ Ohavinagi Yutasi¹a mone pokisi¹amile yagaino nemaiya kanogi¹ya nago¹a vaya¹mo¹ya mage hu¹ya amakesa nehaviye “Yisasi¹a agaifena ‘Ala imule mo nesuna yana molika eno.’ huno nehifi ifi ‘Mone¹amima omalenea vaya nago¹a mone molika amamio.’ huno nehifi?” hu¹ya amakesa havimainae. ³⁰ Havigeno Yutasi¹a ani kavela aliteno aupa¹a kumatega hati-laviana tusi¹a hani ki-mainea yapi umaine.

Yisasi¹a yaufa kahegi ke hama-pai-mainae.

³¹ Yutasi¹a ago utegeno Yisasi¹a mage huno hie “Menia ikapinagati emainoa kanoa vaya¹mo natenea kanomoni nagia ali-saga hugahae. Nagai¹ma nahaesage¹na falisugeno¹a Anumaya Koti¹a ala agi aligahie. ³² Nagaya falisua yafe Anumaya Koti agima ali-saga hisayana Anumaya Koti¹a navalesige¹na agai¹ene maigahue. Aupa¹a navaleno tokiya hale yapi ala nagi namigahie. ³³ Nafa¹neyaga¹nia tamakai¹enena nagaya osi kana kano¹a maite¹na visugetama nagaifena natiyegahayanagi amuha ohunayanagitama visua kumatela o¹ugahae. Mani kea Yuta vea¹mogami hama-pai-mainoanagi¹na menia tamakaila tamaha-nepauve.

³⁴ Menia nagola ohavinaya kahegi kea tamaha-paigahugi haviho. Nelama-fugamifena tamahau tamayamopafi tamahaino. Amakaya ani¹a hu¹ya tamakaifena hamaisie. Nagayama tamakaifema nahau nayamopafima nahaiya kava hutama nelama-fugamifena tamahau

tamayamopafi tamahaino. Amakaya ani'a hu'ya tamakaifena hamaisie. ³⁵ Nagi tamakaya muki'a nelama-fugamifena tamahau tamayamopafima lamahaisiana muki vea'mo'ya tamakaila lamakete'ya tamakaifena mage hu'ya hugahae 'Yisasi'enema tokae'ya nemaiya anaga mainae.' hu'ya hugahae." huno hie.

Yisasi'a Pitafena "Nagia alika fala-kigane." huno nehie.

³⁶ Saimoni Pita'a mage huno havige "Alani'amogae hanatega ugane?" huno havigegeni Yisasi'a mage huno hie "Visua kumatela menia nakavela o'uganagi haenaga'age nakavela ugane." huno hie.

³⁷ Higeno Pita'a mage huno hie "Alani'amogae nagaya na ya hinage'na menia kakavela o'ugahe hugeka nehane? Nagaya kagaifene hu'na nahaimula atalegahue." huno hie. ³⁸ Higeno Yisasi'a mage huno havige "Kagaya nagaifene hu'ka kahaimula atalegano? Tamagelafa hu'na kaha-nepauve hagoteno kokolemo'a agea o'ainesigeka kagaya tagufa (3) kanale avane huka nagi'a alika fala-kigane." huno hie.

14

Yisasi'a ika kumate visaya kana agai'age maine.

¹ Yisasi'a mage huno hu-maine "Muki'a vea'mogatama tamaipamo'a kana'age huno tamakesa ku'mo'a ohino. Anumaya Kotife havitama tamakupi maletama tamametiti haya

kava nehutama nagai'fena havitama tamakupi maletama tametiti hiho. ² Nenafa nopina veala maisaya nona kasago'ya hane. Ani yama omalesina nagaya mani kea ohule'asine. Nagaya kumatamia moli'na talo tala hu-lama-tegahe ugahue. ³ Nagaya kumatamia mo lalo tala hu-malete'na ete'na me lamavalesugetama visua kumatela visageta nagai'ene mo lokaeta maigahune.

⁴ Tamakaya nagayama visua kuma'mo kana ago age-mainae.” huno hie. ⁵ Higeno Tomasi'a mage huno hie “Alatimogae tagaya visana kumala o'agenone. Hana'a huta ani kana agesune?” huno hie. ⁶ Higeno Yisasi'a mage huno hapaiye “Nagaya ikapinaga visaya kamona Nefa'nae. Nagaya ke-lamage kemona aepa'a mainoe. Nagaya agola maige maige yamo hamaimula aepa'a mainoafe nago'a vea'mo'ya Nenafatega visayana alu katetila o'ugahagi nagaiteke esae. ⁷ Tamakaya nagai'ma havi-mainale'asipa Nenafafena ani'a hutama havile'asine. Tamakaya menia aepa hetama Nenafana ago havitetama age-mainae.” huno hie.

⁸ Higeno Filipi'a mage huno hapaiye “Alanimogae negafana taveligeta agesunageno tagu tamemo'a tamu hisie.” huno hie. ⁹ Higeno Yisasi'a mage huno hapaiye “Filipigae aya'aya kanale tamakai'enena maimo emainoana kagaya nagaila onagenano? Nago'a vea'mo'ya nagai'ma nage-mainayana ani'a hu'ya Nenafana age-mainae. Na'a higeka 'Negafana

lave-lio huka nehane?’ ¹⁰ Nagaya Nenafa agu'afina maugeno Nenafa'a ani'a huno nagai nagu'afina mainea yafena havika kagupina nomalano? Tamaha-pai-mainoa kea nagesafiti kea tamaha-opainoe. A'ao. Nenafa'a nagai nagupi maineno agai'a ali'yama'a ne'alie. ¹¹ Nagaya Nenafa agu'afi maugeno ani'a huno Nenafa'a nagaila nagu'afina maigeta'a hu-maino'ema hu'nama hua kea havitama tamakupina maletama tamametiti hiho. Mani kema ohavinutama tamakaya muki'a ali'yama ali-mainoa ali'yama age-mainesayana nagaifena havitama tamaku'afi ali maletama tamametiti hiho. ¹² Tamage-lafa hu'na tamaha-nepauve nago'a vea'mo'ya nagaifema havi'ya amakupi nemalaya vea'mo'ya muki'ama ali-mainoa ali'yana ani'a hu'ya aligahae. Nagaya Nenafatega visua yafe anima alisaya ali'yamo'a ali-mainoa ali'yana agase'ya aligahae. ¹³ Nafa'ne'amonife hu'ya Nenafa'a agima ali-saga hisaya yafe tamakaya nagai kema havitetama nagai nagi ayetama muki'a yafena naha-vi-gesage'na ani'a hu-lama-tegahue. ¹⁴ Muki'a yafema nagai nagima ayetama naha-vi-gesayana afa'a ani yana hu-lama-tegahue.” huno hu-maine.

Yisasi'a “Alu Aotage Avamula hu-tesugeno egahie.” huno hu-maine.

¹⁵ Mani kea huteno mage hie “Tamakaya nagaifema tamahau tamayamopafima tamahaisigetamahena tamaha-pai-mainoa kemono

akave malegahae. ¹⁶ Akave malesage'na Nenafatega havigesugeno tamaya hisia Avamula hu-tesigeno tamakaite eno agola tamakai'ene emaige maige huno maigahie. ¹⁷ Ani Alu Aotage Avamula tamage'age kemona aepa'a maineno hulama-ve-ligahie. Muki'a ma mopale yafema amaugafama ali'ya nehaiya vea'moya Alu Aotage Avamula age'ya havalama ohunaya yafe o'avalegahagi tamakaya ago age-lama hutama age-mainaya yafe tamakai'enena emaineno tamakupi haino maigahie.

¹⁸ Na yafe tama-talesugetama megusa nafa'ne kana hutama omaigahayanagi'na tamakaitela ete'na egahue. ¹⁹ Okasi kana'a ma mopale yafema amaugafama ali'ya nehaiya vea'mo'ya nago'ene onagegahayanagitama tamakaya nagegahae. Agola maige maige yamona aepa'a mainoafe tamakaya ani'a hutama maige maige hisaya tamahaimula alitama maigahae. ²⁰ Mainesageno Alu Aotage Avamu'mo'ma esia kanafina nagaya Nenafa'ene mainoanagitama tamakaya ani'a hutama nagai'enena maisage'na nagaya ani'a hu'na tamakai'enema mainoa yafena havalama hutama havigahae.

²¹ Nago'a vea'mo'ya nagai kema havi'ya akave malenu'ya nagai'fena hamau amayamopafina hamau-maina. Nagai'fema hamau amayamopafima hamau-mainesia vea'mo'ya Nenafa'a ani'a huno amakaifena hau ayamopafina nehaiye. Nehaige'na nagai'enena ani'a hu'na nahau nayamopafina nenahaige'na

nagu¹a amamisuge¹ya nagaila nage-lama hu¹ya nagegahae.” huno hie. ²² Higeno nago kanoa, Yutasi Isakalioti omagi, hamo¹amo¹a mage huno Yisasina havige “Alanimogae na¹a higeka kagaya tagaila taulagafina kagaika aepaka¹a tave-nelinagi muki¹a ma mopale yafema amaugafama ali¹ya nehaya vea¹mogami amaulagafina hu-falote huka ohunanane?” huno havinege. ²³ Havigegeno Yisasi¹a mage huno hie “Nago¹a vea¹mo¹yama nagaifema hamau amayamopafima hamaisige¹yahena nagai kemona akave malesagenofena Nenafa¹a amakaifena ani¹a huno hau ayamopafina haugahie. Nenafa¹ene nagai¹nienena amakai¹ene emaigahu¹e. ²⁴ Nago¹a vea¹mo¹ya nagaifema hamau amayamopafima ohamaisiana nagai kemona akavela nomalae. Manima tamaha-nepauva kea nagai¹nige kea omalegi hu-na-tenea Nenafa ke hane.

²⁵ Tamakai¹enema maine¹na mani kea ago tamaha-pai-mainoe. ²⁶ Tamaha-pai-mainoanagino Nenafa¹a nagai nagile¹ma hutesia kanomo¹a, tamayama hisia Alu Aotage Avamulagino emaineno muki¹a yana hulamaveliteno muki¹a tamaha-pai-mainoa kea alino tamakesa hao hinagetama havigahae.

²⁷ Tama-tale¹na ugahe tamaipa falu hutama maisaya tamaku tamakesa nelamamue. Nagayama naipa falu hu¹na nemauva nagu nagesa nelamamue. Anima tamaipa falu hutama maisaya yama tamamua yana ma mopale vea¹moya amaipa falu nehaya ya kana ohunegi

kana'age tamaku tamakesa havitama kolia ohiho. ²⁸ 'Tamatale'na ute'na ete'na tamakaitega egahuema.' hu'na tamaha-pauva kea ago havilinae. Nagaifema tamahau tamayamopafima nelamahaisigetamahena Nenafa mainelega visua yafena muse hale'asine. Nenafa'a nagaseno ala kano mainea yafe Nenafa mainelega visua yafena muse hale'asine. ²⁹ Tamatale'na visua kanafina nagaife havitama tamakupi maletama tamametitima hisaya yafe yaufa ani kana falote ohunea kanafi menia mani kea tamaha-nepauve. ³⁰ Satani'a, ma mopale'ma kava hu-mainea kanoa ago ne'eanagi'na nagaya nago'ene kea ohugahue. Satanina tokiya'amo'a nagaila onagaseneanagi Nenafa nahapai-mainea kava hu'na faligahue. ³¹ Nagayama Nenafafema nahau nayamopafi nenagea kavala ma mopale vea'mo'ya havisaya yafe Nenafa naha-pai-mainea kava nehue. Hai nehugi vigetao." huno nehie.

15

Yisasi'a "Nagaya vaini nofi mainoe." huno hie.

¹ Yisasi'a mage huno hie "Nagaya tamage hu'na vaini alagamo nofi maugeno Nenafa'a ani vaini alagamo nofi hoyalela yagai-mainie. ² Agaya muki'a nagai vaini nofi akopa'mo'a alagama o'ayea akopa'yaga atagi ne'ataleno alagama ayea akopa'yaga 'Nago'ene alaga ayesie.' huno ai'a alino hagalo nehie. ³ Tamaha-pai-mainoa kemo'a tamakaila ago alino hagalo higeno

oni'yatamia omalenegi kanale tamahau-maine.
 4 Tamakaya nagai'enema ai-ga'maesayana
 nagaya tamakai'enena ai-ga'mae'na maigahue.
 Nago vaini alagamo nofi'mo akopamo'ma
 nofite'ma ai-oka'maesiana alaga o'ayegahie.
 Na'a hu-maineafe tamakaya nagaila nava'ale'ma
 ai-oka'maesayana tamakaya alaga o'ayegahae.

5 Nagaya vaini alagamo nofi maugetama
 tamakaya ani vaini alaga nofi'mo akopa'a
 mainae. Tamakaya nagai'enema ai
 oka'maesayana nago'a kanale kavala ohugahae.
 Kanale kava'ma hinutamahena nagai'ene ai-
 ka'maetama maiho. Nago'a vea'mo'yama
 nagai'enema ai-ga'mae'ya maisage'na
 nagayama amakai'enema ai-ka'mae'na
 maisuana kasago'ya nofi alagamo kave'a
 ayegahae. 6 Nago'a vea'mo'ya nagai'enema ai-
 oka'maesayana o'ayea vaini nofi'mo akopa'ma
 atagi'ya haga'yu hu-talageno'ma hagage nehia
 kava nehae. Ani akopayaga alitalu hu'ya
 atafi kae-talena. 7 Tamakaya nagai'enema
 aiga'maetama maisayana nagai kemo'a
 tamakupina hanesigetama nago'a yafema
 naha-vi-gesayana naha-vi-gesaya yana hu-lama-
 tegahue. 8 Tamakayama kasago'ya nofi alagamo
 kave'ma aye-gasago'ma hisaya yateti Nenafa'a
 ala agia aligahie. Alinagetama-nagitama
 tamakaya nagai'enema tokae'ya nemaiya anaga
 maigahae. 9 Nenafa'a nagai'fena hau ayamopafi
 hau-mainea kava hu'na tamakaifena ani'a
 hu'na nahau nayamopafi nenahaiye. Nahau

nayamopafima nenahaiya yamo agu'afinaga faletama maiho. ¹⁰ Nagaya Nenafa'ma hu-mainea kahegi kema havi'nama akave maloa yafe Nenafa'a nagaifena hau ayamopafina nehaiye. Tamakaya ani'a hutama hu-mainoa kahegi kea havitama akave malesayana tamakaifema nahau nayamopafi nenahaiya yamo agu'afinaga faletama maigahae.

¹¹ Nagai nagu'afima muse yama hanea yana tamakai tamakupi male hava-telamatesua yafe mani kea tamaha-pai-mainoane. ¹² Nahau-mainea kavala mage hu'na nehue 'Nagaya tamakaifema nahau nayamopafima nahaiya kava hutama nelama-fugamifena tamahau tamayamopafi tamahainageno ani'a hu'ya amakaya tamakaifena hamau amayamopafina hamaino.' hu'na tamaumonola nemaloe. ¹³ Nago kanomo'ma nefufema 'Kagai kaugafama ali-gatisua yafene hu'na nagaya faligahue.' huno'ma hisiana muki'a vea'mogami hamau amayamopafima nehamaiya kavala amakasegahie. ¹⁴ Nagayama nehua kema akave malenutamahena nagai'ni nenafugatama maigahae. ¹⁵ Nagaya tamakaifena 'Ali'ya vaya'nimogatama mainae.' hu'na nago'ene ohugahue. Nago ali'ya kanomo'a kava kano'amoma ali'yama alia aepa'a o'agenegi nagaya muki'a yama Nenafa'ma naha-pai-mainea kea ago tamaha-pai-mainoa yafe 'Ali'ya vaya'nimogatama mainae.' hu'na ohughugi ago'ma tamaha-nepauva yafe

‘Tamakaya nagai kanapa mainae.’ hu'na nehue.
¹⁶ Tamakaya nagaila nagetama hu-yo'okinagi
 nagaya hagote'na tamakaila tamake'na hu-
 yogite'na tamakaitami utama Anumaya
 Koti haisia kava hisaya yafe hu-yogilama-
 tenoe. Ani'ama hisaya yapiti alaga'a falote
 hute'ya agola mainesagetama nagai nagile'ma
 Nenafatega havigesayana muki'a havigesaya
 yana tamamigahie. ¹⁷ Kahegi kea mage hu'na
 tamaumonola nemaloe nelama-fugamifena
 tamahau tamayamopafi tamahainage'ya ani'a
 hu'ya tamakaifena hamau amayamopafi
 hamaino.”

*Ma mopale vea'mo'ya kame hu-lama-tegahae
 huno hu-maine.*

¹⁸ “Ma mopale yafema amaugafama ali'ya
 nehaiya vea'mo'ya tamakaila kamema hu-
 lama-tesagetamahena tamakesa hao hinagetama
 haviho. Hagote'ya nagaila ani'a hu'ya kamea hu-
 na-tenayane. ¹⁹ Tamakaya ma mopale vea'mo'ya
 nehaya kava'ma hutama mainale'asipa mani
 mopale vea'nemo'ya hamau amayamopafi
 tamakaifena hamaile'asinagi nagaya ma mopafi
 vayapiti tamake'na hu-yogi-malenoafe tamakaya
 mani mopale vea kana vea'ne omainae. Na
 yafe ma mopale yafema amaugafama ali'ya
 nehaiya vea'nemo'ya amakesa nehavi'ya
 kamea hu-nelama-tae. ²⁰ Nagaya mage hu'na
 ago tamaha-pai-mainoe ‘Ali'ya kano'amo'a
 kava kano'amona o'agasene.’ hu'na hu-
 mainoane. Ani kehe tamakesa havitama maiho.

Nago'a vea'mo'lya nagai'ma, tamakai kava kanotamimonima, ali'ya haviyama hu-na-taya kava hu'ya ani'a hu'ya tamakaila ali'ya haviya hu-lama-tegahayanagi nago'a vea'mo'lya nagai kema havi'ya akave nemalesaya vea'mo'lya tamakai kea ani'a hu'ya havi'ya akave malegahae. ²¹ Hu-na-tenea kanomona havilama hu'ya ohavinaya yafe ani kavala hu-lama-tegahae. Tamakaya nagai vea'nema mainaya yafenagi'ya ani kavala hu-lama-tegahae. ²² Nagaya e'nama kema hama-opaule'asina 'Kefo katia hane.' hu'ya ohale'asine. Afa'a ago me hama-pauvanagi kefo yama hu-mainaya yafena kalagi aite'ya agasesaya katamia omalene. ²³ Nagai'ma kamema hu-na-tesaya vea'nemo'ya Nenafa'ene kamea hu-ne'atae. ²⁴ Nagaya amakaipima maine'nama nago'a vea'mo'lyama tokiya kava'ma ohule'asina 'Kefo yatia hane.' hu'ya ohale'asinagi ago aluge'ya agete'ya nagai'ene Nenafa'enena kamea hu-nela'a-tae. ²⁵ Amakai kahegi kema kae-malenaya kemo'a nagai'fena mage hu-mainayane 'Havi kavala ohunege'ya kamea afa'a hu-ne'a-tae.' hu'ya kae-malenayane. Mani kemo'a ago falote huno tamage hisia yafe nagaila kamea hu-nena-tae. ²⁶ Nenafategati tamaya hisia veka'a hu-tesugeno'ma esiana tamage'age ke huno tamaha-paisia veka'a, Alu Aotage Avamula Nenafategati'ma esiana nagai'fena tamaha-paigahie. ²⁷ Tamaha-paigahianagitama nagaya ali'yama aepa he'na ali-mainoa kanaleti

tamakayama nagai'enema mainaya yafe
nagaifena vea'mogamina hama-paigahae.”

16

¹ Yisasi'a mage huno hie “Nagaifema
tamakupima ago malenaleti'ma ne'ataletama alu
kate o'visaya yafe mani kea tamaha-pai-mainoe.

² Amakaya tamakaila mono nopitila tamavale'ya
tamanati-talegahae. Ani kanama esia kanafina
nago'a vea'mo'ya tamakaila nelamahae'ya ma
amakesa havigahae ‘Mani kava'ma nehunana
Anumaya Kotina akave nemalone.’ hu'ya
hugahae. ³ Nenafa'ene nagai'enema amaku'a
ota'aminaya yafe ani kavala hu-lama-tegahae.

⁴ Ani kanama falote hisia kanafina tamaha-pai-
mainoa kemo'a tamakesa ai-hagalo hinagetama
havilama hisaya yafe menia mani kea tamaha-
nepauve. Ehe kanafina tamakai'enema mainoa
yafe nayona ani kea tamaha-opainoane.

*Yisasi'a Alu Aotage Avamu'mo ali'yama'ahe
hu-maine.*

⁵ Nagai'ma hu-na-tege'na emainoa kanolega
menia ete'na ugahuanagitama nago vekamoga
nagaifena ‘Hanatega ne'vane?’ huka nahavi-
nokane. ⁶ Nahavi-nokayanagi nagayama tamaha-
pai-mainoa kehe tamakesa havitama tamahau
nehae.

⁷ Tamahau nehayanagi tamage-lafa hu'na
tamaha-nepauve nagayama o'visuana tamaya
hisia kanoa omegahigi nagayake ute'na tamaya
hisia kanoa hu-tesugeno tamakaitegama
esiana kanale kana'a falote hu-lama-tegahie.

8 Efalote¹ma hisiana tamaya hisia kanomo¹a muki¹a ma mopale vea¹mogami kefo yama nehaya aepa¹amiene kanale kava¹ma nehaya aepa¹amiene Anumaya Koti¹a kaiyekema hu-ma-tesia yamo aepa¹aene hu-falote hisige¹ya havite¹ya agegahae. ⁹ Kefo yamo aepamofena tamaya hisia kanomo¹a mage huno hugahie 'Yisasifena havitama tamakupi maletama tamametiti nohaya yafe kefo yatamia hane.' huno hugahie. ¹⁰ Nagaya Nenafa mainelega ete¹na ugahuanagitama nago¹ene nagaila onagesayafe tamaya hisia vekamo¹a kanale kava¹ma hisaya yamo aepa¹a hu-falote hinagetama havitetama agegahae. ¹¹ Anumaya Koti¹a ma mopale kava kanoa, Satanina, ago kaiyekea hu-tenea yafe tamaya hisia veka¹a Anumaya Koti¹ma kaiyekema hu-ma-tesia yamo aepamo¹a hu-falote hinagetama havitetama agegahae.

¹² Nagaya kasago¹ya kea tamaha-paigahe nehuanagi kana¹age hu-mainea yafe tamakaya havilama hutama ohavigahae. ¹³ Ohavigahayanagi Anumaya Kotina tamage¹age nehia Avamu¹amo¹ma esiana agai¹alegati muki¹a Anumaya Koti tamage¹age kea tamaha-paigahie. Agesafiti kea tamaha-opaigahianagino nehavia ke¹age¹ene haenagama esia kanafima falote hisia yamo kene tamaha-paigahie. ¹⁴ Tamaha-painageno ani kanomo¹a nagayama hu-mainoa kea tamakaila tamaha-paisia yafe nagai nagia tusiya huno ali-saga hugahie. ¹⁵ Hugahianagi

muki'a Nenafa'ma malenea yana nagai'ni'a yama'age fatago huno hanea yafe mage hu-mainoe 'Alu Aotage Avamu'mo'a amisua kea alino tamakaila me lamaha-paigahie.' hu'na hu-mainoe."

Muse yamo'a taipa kana yamo kumala ali-gahie.

¹⁶ "Osi kana kano'a nago'ene onagegahagi osi kana kano'a maitetama etetama nagegahae." huno hie. ¹⁷ Hige'ya nago'a agai'aenema tokae'ya nemaiya anaga'amo'ya amakai'amifina mage hae "Osi kana kano'a onagegahae huno nehuno etetama osi kana kano'a nagegahae huno nehuno'ma nehia kemona aepa'amo'a hana'a hu-maine? 'Nenafatega visua yafe nehue.' huno nehia kemona aepa'a nohavune. ¹⁸ Osi kana'aema hia kemona aepa'a na'ane huno nehie? Tagaya agayama hia kea nohavune." hu'ya nehae. ¹⁹ Nehu'ya havigegahema haya kea Yisasi'a ago agu'afinaga haviteno mage huno hie "Hua kemo'a 'Osi kana kano'a nagaila onagegahagi etetama osi kana'a maitetama nagegahaema.' hua kehena tamakaya lamakaya tamakaitamifina mani kemona aepa'ahe huge havige nehao? ²⁰ Tamage-lafa hu'na lamaha-pauve tamakaya tamatale'nama visua yafena avia ategahayanagi ma mopale vea'mo'ya muse hugahae. Tamakaila hagoteno tamahau hutestigetama haenaga'a ai-yahae hutama muse hugahae. ²¹ A'mo'ma nafa'nema ategahema nehuno agatama aisia kana falote hisia yafe

hauna hianagi nafa'nema ago ateteno¹a 'Nafa'nea ago atoe.' huno muse nehuno agatama ai-mainea yafena age-kani-maina. ²² Ani kanamo¹a tamakaipina hane. Menia tamakaya tamahau nehayanagi ete¹na tamakesugeno¹a tamakupina muse yamo¹a hiya hinageno nago kanomo¹a ani muse yana tamaha-ofalegahie. ²³ Ani kanama eva'yima hisiana tamakaya nagaila nago yafena nahavi-okegahae. Tamage-lafa hu¹na tamaha-pauve nagaifema hutama nagai nagima ayetama nago yafema Nenafama havigesayana muki¹a havigesaya yana afa¹a tamamigahie. ²⁴ Nayo¹ene meniene nagaifena nehutama nagia ayetama nagoke yafena Nenafana haviokenayane. Nagi menia muse yatamimo¹ma tamakupina hiya huno hanesia yafena nahavigege¹na tamamino."

Yisasi¹a ma mopafi tokiya yana ago agase-maina.

²⁵ "Mani kea tamakaila avame kefi hu-male¹na tamaha-nepauvanagi haenaga¹a mani avame kea nago¹ene ohugahuanagi¹na hu-falote hu¹na Nenafafena tamaha-paigahue. ²⁶⁻²⁷ Hu-falote hisugetama ani kanafina nagai nagile havigegahagi nagaya 'Tamakaifena Nenafana havigegahue.' hu¹na ohunogi tamakaya nagaifena tamahau tamayamopafi nelamahaiya yafe Nenafa¹a tamakaifena hau ayamopafi nehainageno havigesaya yana agai¹a tamamigahie. Nagayama Anumaya Kotitegati emainoa kema tamakupi malenaya

yafe Nenafa¹a tamakaifena hau ayamopafi nehaiye. ²⁸ Nagaya Nenafa¹ene mainoleti ma mopafina emainoe. Menia nagaya mani mopa atale¹na Nenafatega ugahue.” huno hie.

²⁹ Hige¹ya agai¹aenema tokae¹ya nemaiya anaga¹mo¹ya mage hae “E, avame kefiti menia nohanagi hu-falote huka nehane. ³⁰ Menia tagaya havunana kagaya muki¹a yana havimalenane. Muki¹a vea¹mo¹ya amakupima haviya yana ago havimainana yafe nago kanomo¹a nago yafena kahavi-okesie. Muki¹a yana havimainana yafe tagaya kagaifena Anumaya Kotitegati emainane huta tagupi malenone.” hu¹ya hae. ³¹ Yisasi¹a kenona¹amilela mage huno hie “Meni tamakaya havitama tamakupina nemaletama tamametiti nehafio? ³² Haviho nago kanamo¹a aupa¹a egahema hia kanamo¹a ago efalote hu-maine. Ani kanafina nagoke nagoke¹mogatama nataletama kumatamile ute ete hugahae. Nataletama visage¹na nagai¹nige maigahuanagi Nenafa¹a nagai¹enena maine. ³³ Tamaku¹a namitetama tamaipa falu hutama hilato hutama maisaya yafe mani kea tamahapai-mainoe. Ma mopale mainesageno nago kana¹age yamo¹a falote hugahianagi kolia ohiho. Nagaya ma mopafi au¹ava yana ago agase¹na kava yagai-mainoe.” huno hu-maine.

17

Yisasi¹a agai¹a anaga¹a hama¹-maesia yafe nunamu hu-maine.

¹ Yisasi'a mani kea huteno ikapinaga age-saga hu-maineno Anumayamotega mage huno hie "Nenafagae falisua kana'nia ago efalote hie. Nekamo'na kagi ali-saga hisua yafe falite'na he-ti'na kagaitega haisua yafe lokiya hale yania nekamonina namio. ² Nekamonia muki'ama naminana vea'mogamina agola maige maige hisaya hamaimu'amima amamisua yafe muki'a vea'mote kava yagaisua tokiya'nia ago naminane. ³ Anumaya Kotiga kagaikage ala tokiya kanoa tamagemona tama'a nagoke'age Anumaya mainanagi vea'mo'ya kagaifema havilama hu'ya maisayana hu-tenana kanoa 'Yisasi'a vea'mogami amaku amamema'a aligatisia kanoa ikapinagati emainea kano maine.' hu'ya havilama hisayana maige maige hisaya hamaimula aligahae. ⁴⁻⁵ Naminana tokiya hale yateti'a ma mopalela kagia alisaga humainoe. Naminana ali'yana ago ali'na avaya aye-mainoa yafe Nenafagae meni kanafina kagai kavate mainesugeka tokiya hale yani'a namio. Ma mopama talo ohunana kanafina kagai'ene mainoanagi'na tokiya hale yania haneanagi menia eteka ani yana namio. ⁶ Ma mopafi veapiti'ma naminana vea'mogamina ago aepaka'a hu-falote hu'na hama-pai-mainoe. Ani veala kagaika'a vea'negika nagaila ago naminane. Naminanage'ya ani vea'mo'ya kagai kea atafa hu-linae. ⁷ Atafa hu-line'ya muki'a naminana yana kagaika'alegati emaine hu'ya menia ago havilinae. ⁸ Naminana kea

ago amamuge¹ya ago atafa hu¹ya havilama huline¹ya nagayama kagaitegati¹ma emainoa yafena tamage nehie hu¹ya havilama hu-line¹ya kagayama hu-na-tanage¹na emainoa yafena amakupi male¹ya amametiti nehae.

⁹ Amakaifena Nenafagale ke hu¹na kahavi-negoe. Ma mopale yafema amaugafa ali¹ya nehaiya veafe Nenafagale menia kahavi-nokogi kagaika¹ama naminana vea¹nea kagai vea¹ne mainaya yafe naminana veafe kahavi-negoe.

¹⁰ Nagai veala kagai veale. Kagai veala nagai vea mainage¹ya ani vea¹nimo¹yama nagai tokiyaleti haya kavala nehage¹ya mopale vea¹mo¹ya agete¹ya nagai nagia alisaga nehae.

¹¹ Ali-saga nehage¹na menia ma mopaletila atale¹na kagaitega ugahuanagi nagaifema amakupi nemalaya veala ma mopafi maigahagi alu aotage Nenafaga kagaika kagileti naminana nagile¹ma hanea tokiyaleti au¹vai-ma-tesanana ta¹agaya nagoke kanolatama maino¹a ya hu¹ya amakaya nagoke kate male¹ya nagoke vea¹ne maisae.

¹² Nagaya amakai¹ene maine¹na kagayama naminana nagile¹ma hanea tokiyaleti au¹vai-ma-togeno nago¹mo¹a hani-ki-mainea yapima tegelege nehia atafina o¹ugahagi Anumaya Koti kema kae-malenaya kemo¹ma efalote huno tamagama hisia yafe anima hani-ki-mainea yapima tegelege nehia atafima visia kanoa Yutasi¹a agai¹age ugahie.

¹³ Menia ete¹na kagaitega egahugi nagayama nehua muse yani¹amo¹a amakai amakupina

hava-tesia yafe ma mopale maine¹na mani kea hama-nepauve. ¹⁴ Hama-nepai¹na kagai kea ago amaminogi nagaya ma mopafi kanoa omai¹noe. Alu nagu name¹ene kano main-oge¹ya amakaya nagayama hua kava hu¹ya ma mopale vea¹ne kana vea omainae. Alu amaku amame¹ene vea¹ne mainaya yafe ma mopale vea¹mo¹ya amakaife amaipa kafa he-ma-te¹ya kamea hu-ne¹ama-tae. ¹⁵ Kamea hu-ne¹ama-tayanagi nagaya vea¹nimogamifena ‘Ma mopaleti amavalesaga huo.’ hu¹na kahavi-nokogi ‘Satanima aye-mavataga hu yafe au¹vai-mateka amaugafa ali-gatisanage¹ya ka¹ye¹ya maisae.’ hu¹na kaha-vi-negoe. ¹⁶ Nagaya ma mopale kanoa omai¹noe. Alu nagu name¹ene kano main-oge¹ya amakaya nagai kana hu¹ya ma mopale vea¹nea omainae. Alu amaku amame¹ene veane mainae. ¹⁷ Mainayafe kagaika ke-lamage kekaleti alu aotage vea¹ne maisaya amaku amakesa amamio. Kagayama hu-mainana kemo¹a tam-age¹age nehie. ¹⁸ Kagaya ma mopafima nagai¹ma hu-natanage¹na emainoa kava hu¹na naminana vea¹nea nagaya mopale vea¹mogami amu¹nopi ago hu-ma-tenoe. ¹⁹ Nagi tamage hu¹ya amaku amamema¹amona kagaila kamisaya yafe nagaya nagu namema¹amona kagaila negamue.

²⁰ Nagai¹enema mainaya vea¹ne¹agefena kahavi-nokogi amakayama hisaya keleti nagai¹fema havi¹ya amakupi male¹ya amametitima hisaya veafe¹ene kahavi-negoe.

²¹ Nenafagae mage hu¹na kahavi-negoe

kagaya nagai'enema mainage'na nagaya kagai'enema maugeta'ama hu'a kava hu'ya nagaifema amakupi malenaya veala nagoke vea kano'a ta'agai'ene maisage'ya muki'a mopale vea'mo'ya kagayama hu-na-tanage'nama emainoa yafema havi'ya amakupi male'ya amametiti hisae. ²² Ta'agayama nagoke ta'aipale'ma mau'a kava hu'ya nagoke amaipale maisaya yafe naminana tokiya hale yani'a ago amaminoe. ²³ Amakaya nagoke vea kano'a mai-lama hu'ya maisaya yafe nagaya amakai'enena maugeka kagaya nagai'enena mainane. Kagaya hu-na-tanage'na emainoa yafema muki'a mopale vea'mo'ya havisaya yafe'ene nagaifena kahau kayamopafi negahaigeka ani'a huka ma mopale veafe'ene kahau kayamopafi kahau-mainea yama havisaya yafe kagai kema havimalenaya vea'mo'ya nagoke vea kano'a maisae.

²⁴ Nenafagae ma mopama taloma ohunana kanafina nagaifena kahau kayamopafi kahaigekama naminana tokiya hale yani'a nagai'ma naminana vea'mo'ya agesaya yafe nagaya maisua kumate maisae hu'na nehue. ²⁵ Kanale'ya huka fatago hu-mainana Nenafagae ma mopale yafema amaugafa ali'ya nehaiya vea'mo'ya kagaila okagenagi nagaya ago kagaila kage-mainoafe ma ma mainaya vea'mo'ya nagai'ma hu-na-tanage'na emainoa yafena ago havi'ya age'ya hu-mainae. ²⁶ Nagaifema kahau kayamopafi kahau-mainea yana amakai amakupi malesana yafe aepaka'a hu-falote hu'na

hama-pai-mainoanagi nago'ene hama-paigahue. Nagaya amakupi maisua yafe aepaka'a ago hama-pai-mainoe.” huno hu-maine.

18

Yutasi'a Yisasina avaleno kame vaya amayapi atene.

¹ Yisasi'a ani kea Anumayamotega havigeteno tuelufu'a (12) anaga'aene hati-lavi'ya Kitaloni lina mo la'kae'ya umainae. Atu kaiyaga nago olivi yosa kali-malenaya hoya hanega'ya Yisasi'a agai'aenema tokae'ya nemaiya anaga'amo'yaene ani hoyafinaga umainae.

² Umainayanagi muki'a yupa Yisasi'a tuelufu'a (12) anaga'amo'yaenena ani hoyafinaga molitalu hu'ya nemaiya yafe Yutasi'a, agesi'ma huno Yisasina kamema hu-tesia kanomo'a, ani hoya ago age-maineanane. ³ Age-maineanagino Yutasi'a via'yamo ala mono note kava vayate'ene* Falasia vayate'ene vige'ya mono note ati vaya'ene Lomu ati vaya'ene amigeno amavaleno ani hoyafinaga ka'ni'ene lamu ka'ni'ene tu hisaya ya'ene ali'ya emainae.

⁴ Ayanagi Yisasi'a muki'a augafale'ma falote hugahema hia yana ago haviteno amakaite via'yamo mo hama-vige “Tamakaya tafe atine'ayae?” huno hie. ⁵ Hige'ya kenona'a mage hu'ya hae “Nasaleti Yisasife ati-yeta ne'one.” hu'ya hageno Yisasi'a mage hie “Nagaya ma mainoe.” huno higeno agesi'ma huno Yisasina kamema hu-tea kanoa, Yutasi'a, ani vaya'ene

tokaeno maine. ⁶ Mainegeno Yisasi'a "Nagaya ma mainoe." huno'ma hia yafe amakavelegati ete'ya valega mo fae-laka-ti-mainae.

⁷ Fae-laka-ti-tageno Yisasi'a nago'ene eteno hama-vige "Tafe ati ne'ayae." huno hige'ya amakaya nehu'ya "Nasaleti Yisasife ati ne'ayone." hu'ya hae. ⁸ Hageno Yisasi'a kenona'amia mage hie "Nagaya ago tamahanepauve nagaya ma mainoe hu'na nehue. Tamakaya nagaifema nati ne'ayenutamahena ma ma nagai'enema mainaya vayala amatalege'ya afa'a viho." huno hie. ⁹ Yisasi'a ago'ma hu-mainea kea mage huno hu-maineane "Naminana veala nagoke kano'a ata-o'ayegahie." huno hu-maineane. Anima hu-mainea kemo'a falote huno tamagama hisia yafe Yisasi'a "Amatalege'ya viho." huno hu-maine.

¹⁰ Higeno Saimoni Pita'a aya'aya naepe'a ali-lianagino alisagino ala mono note hagote kava kanomo ali'ya kano'a, Malakusina, aikoligeno tamaga kaiyaga agha aifa-kali-talegeno asaga hu-lavi-maine. ¹¹ Ai-fakaligeno Yisasi'a Pitafena hapaino "Aya'aya naepeka'a tafugepi vaiyo. Naugafaene nagu name nagata aisia yani'a satu'age hia tima hanea masu ke'ayola Nenafa'a naminegi nagai'fe onesie huka nehano?" huno hie.

Yisasina Anasite avale'ya umainae.

¹² Lomu ati vaya'ene ala kava kano'amiene mono note ati vaya'ene Yisasina atafa hu'ya

nofi ki-mainae. ¹³ Nofi k-itete'ya hagote'ya Anasite avale'ya umainae. Anasi'a Kaiyafasina a'amona nefa maineanagino Kaiyafasi'a ani kafufina ala mono note hagote kava kano maineane. ¹⁴ Kaiyafasi'a Yuta vayafe mage huno hama-pai-maineane “Kanalele nagoke kanomo muki'a vea'mogamitefe huno falisie.” huno humaineane.

Pita'a Yisasifena “O'agenoa kanoe.” huno humaine.

¹⁵ Saimoni Pita'ene nagola Yisasi'enema tokaeno nemaiya kano'ene* Yisasina akave anati'ana umaina'e. Ne'va'ageno mono note kava kanomo'a ani Yisasi'enema tokaeno nemaiya kanomona ago age-mainea yafe agaya Yisasi'ene ala mono note kava kanomo no kegi'ya kovefinaga hai-fale-maine. ¹⁶ Haigeno Pita'a fiate he-tino maine'geno anima Yisasi'enema tokaeno nemaiya kanomo'a fiate'ma yagai-mainea muna'mofena mo hanepaino Pitana avaleno emaine. ¹⁷ Ne'legeno fiate'ma yagai-mainea muna'mo'a Pitafena mage huno havige “Kagaya mani kanomona tuelufu'a (12) vayapiti kano mainano?” huno havige'geno “A'ao nagaya ani vayapiti kanoa omainoe.” huno hapaiye. ¹⁸ Tusi'a yasimo hige'ya ali'ya vaya'ene ati vaya'ene ata kae-tale'ya he-ti'ya tota hu'ya maine'geno Pita'a amakai'ene atale he-tino augafa tota huno maine.

Ala mono note kava kanomo'a Yisasina kaiyeke hu-tene.

19 Ala mono note¹ma hagote kava kanomo¹a Yisasifena “Kagai¹enema tokae¹ya nemaiya anagakahe¹ene kagayama hu-ma-veli mainana kehe¹ene naha-paiyo.” huno havinege. 20 Havigegeo Yisasi¹a mage hie “Nagaya muki¹a vea¹mogamina fufute hama-nepauvane. Muki¹a yupa Yuta vea¹nea melitaluma haya mono nopi¹ene ala mono nopi¹ene hama-nepauvane. Fala-ki¹na hama-opainoe. 21 Na¹a higeka nagaila nahavi-negane? Nagai kema nehaviya vayafena hama-nepauva kehena hama-vigo. Nagayama hama-pai-mainoa kea ago havilinae.” huno hie. 22 Higeno nago ati kanomo¹a he-tino maineleti Yisasi¹ma mani kema nehiana augosafi aiko-nelino mage hie “Na¹a higeka kagaya ala mono note hagote kava kanomo aulagafina mani kea nehane?” huno hie. 23 Higeno Yisasi¹a kenona¹a mage hie “Kefo kema humainesugekahena nagaya kefo kema hua kea hu-falote huka naha-paiyo. Nagayama kanale kema humainesugekahena na¹a higeka nai-koneline?” huno hie. 24 Hige¹ya nofi¹ma kitaya nofila kalu he-o¹a-tene¹ya Anasi¹a ala mono note hagote kava kanoa, Kaiyafasitega hu-tege¹ya avale¹ya umainae.

Pita¹a nago¹ene Yisasifena avane hu-maine.

25 Ne¹vageno Saimoni Pita¹a atale maineno ata lota huno mainege¹ya agaife mage hu¹ya hae “Kagai¹enena mani kanomona tuelufu¹a (12) vaya¹amopiti kano mainano?” hu¹ya hageno Pita¹a avane huno mage hie “A¹ao nagaya ani

kanoa omainoe.” huno hie. ²⁶ Higeno ala mono note¹ma hagote kava kanomo ali¹ya kano¹amona, Pita¹ma agesama ai-fakali-talegeno asaga hu-lavi-mainea kanomo anagapiti kanomo¹a mage huno hie “Kagaya Yisasi¹ene hoyafina maina¹age¹na kage-mainoe.” huno hie. ²⁷ Higeno Pita¹a nago¹ene avane huno “A¹ao nagaila onagenane.” huno higeno aupa¹a kokolemo¹a age ai-mainae.

Yisasina Pailatite avale¹ya umainae.

²⁸ Yisasina Kaiyafasi nopinagati Lomu kamanile ala kava kanomo¹a kaiyekema hu-ne¹amatea note kege¹afiti avale¹ya umainae. Yuta vaya¹mogamina mono ke¹amimo¹a mage huno hu-mainae “Afa vaya¹ene tokaetama maisayana amakai kava hutama kefo vaya mainaya yafe ala imu kavela onegahae.” huno hu-mainea yafe Yuta vaya¹mo¹ya ala imu kave¹ma mo nesaya yafenagi¹ya ani nopina ohainae. ²⁹ Kumatega mainageno Pailati¹a, Lomu kamanile ala kava kanomo¹a, amakaite eno mage huno hama-vige “Tamakaya na¹ane keleti mani kanoa kaiyekea hu-tegahae?” huno hie. ³⁰ Hige¹ya kenona¹a mage hu¹ya hapaiye “Mani kanomo¹ma kefo kava¹ma ohunele¹asipa avaleta kagaitela omote¹asine.” hu¹ya hae. ³¹ Hageno Pailati¹a eteno mage huno hama-paiye “Tamakaya avaletama tamakaitami mono keleti kaiyekea hu-teho tamakaitami yane.” huno hie. Hige¹ya Yuta vaya¹mo¹ya mage hu¹ya hu-mainae “Kagaya kamanimoga huka taumono malenana kemo¹a nago kanoa haegeni ofalino.”

huka hu-mainane* hu'ya hae. ³² Nayona Yisasi'a mage huno hu-maine “Nagayama falisua yana yafaga yosale nahae'ya nasaesage'na faligahue.” huno hu-maineane. Lomu kamani vaya'mo'yage vayala yafaga yosalela hamae'ya asaige'ya fali-mainae. Yisasi'a ago'ma hu-mainea kemo'a falote huno tamage hisia yafe Yuta vaya'mo'ya mani kea hu-mainae.

³³ Hageno Pailati'a ataleno kaiyekema hu-ne'ama-tea nopinaga haino maineno Yisasife ke higeno vigeno mage huno havige “Kagaya Yuta vea'nogami sauve kano mainano?” huno havige. ³⁴ Havigegenon Yisasi'a kenona'a mage hie “Kagaya kagu kagesafiti mani kea nehapi ifi nago'a vaya'mo'ya nagaifena kaha-paigekahe nehano?” huno eteno havige. ³⁵ Havigegenon Pailati'a kenona'a mage huno havige “Nagaya Yuta kano mainogeka nehano? Kagai nofi vaya'ene ala mono note kava vaya'ene kavale'ya nagaite ne'aya yafena kagaya na havi kava hu-mainane hu'na kahavi-negoe.” huno hie.

³⁶ Higeno Yisasi'a kenona'a mage hie “Nagaya kava yagaisua kumala ma mopafina omalene. Inagi ma mopafima kava yagaisua kuma'ni'ama hanele'asipa ali'ya vaya'nimo'ya kamea hage'ya nagaila navale'ya Yuta vaya'mogami amayapina onatale'asine. Inagi nagaya kava yagaisua kuma'ni'a ma mopafina omalene.” huno hie. ³⁷ Higeno Pailati'a mage huno hie “Ala sauve kano mainoe huka nehano?” huno higeno Yisasi'a kenona'a mage hie “Kagaya nagaife ala

sauve kano mainane hukama hana kea tamage nehane. Nagaya ita'nimo'ma natenelegati'ma emaineana ke-lama'age hu-falote hisua yafe ma mopafina emainogi ke-lamama havi'ya amakupi malenaya vea'mo'ya nagayama hua kea nehaviye.” huno hie. ³⁸ Higeno Pailati'a Yisasife mage hie “Ani ke-lamage kea na'ane ke?” huno nehuno Pailati'a hati-lavino kumatega via'yamo Yuta vayate mage huno mo hama-paiye “Kefo kava'ma hia yana ati ayegetoana omalene. ³⁹ Tamakaya muki'a yupa ala imuma kigahena naha-vigage'na nago kanoa kina nopitila afa'a avale'na nelamamuanagi na yafe nelamahaiye Yuta vea'mogatamina sauve kantamia afa'a atalesugeno visio?” huno hama-vige. ⁴⁰ Hama-vigege'ya ala kefiti mage hu'ya hae “Agaila ne'ataleka Palapasina tamisane.” hu'ya hu-mainae. Palapasi'a vaya nehamaeno musufa yama'age hume hume nehaiya kano mainea kanohe hu-mainae.

19

Pailati'a Yisasifena “Yafaga yosale nili hetama asaigeno falino.” huno nehie.

¹ Pailati'a Yisasina avaleno “Nofi ka'yoteti haifu amiho.” huno hama-paige'ya haifu aminae. ²⁻³ Amite'ya ati vaya'mo'ya aveta'nafa nofiteti tumano kula talo hute'ya anute vai-tete'ya ala kava kanomo fai-ne'alia augafa haesa kena vai-tene'ya Yisasi'ma he-tino mainele e'ya Yisasifena “Felugae. Yuta vaya'mogami ala sauve

kanomogae.” hu'ya nehu'ya augosafi amayateti ainagolape'ya nehae'ya hu-mainae.

4 Hageno Pailati'a kumatega hati-lavino ea'yamo alitaluma hu-mainaya Yuta vayafe mage huno hie “Atiye'na agoana nagoke kefo ya kano'a omalege'na tamakaya mani kea havisae hu'na avale'na tamakaite hati-lavi'na ne'oe.” huno hie. ⁵ Higeno Yisasi'a kumategama hati-lavino eana aveta'nafa nofiteti'ma talo hu-malaya tumano kula anute vai-tete'ya haesa kena fai-tetageno hati-lavino elavigeno Pailati'a mage huno hie “Ageho mani kanoa ma maine.” huno hama-pai-maine. ⁶ Hama-paige'ya mono note kava vaya'mo'yaene ati vaya'ene Yisasina agete'ya ala kegefafiti mage hu'ya hae “Yafaga yosale nili hetama asaigeno falino. Yafaga yosale nili hetama asaigeno falino.” hu'ya hae. Hageno Pailati'a kenona'amia mage huno hama-paiye “Tamakaitami avaletama yafaga yosalela nilia hetama asaiho. Nagaya nago kefo yama'ahena ati-yoana omaleanagi'na ohaegahue.” huno hie. ⁷ Hige'ya Yuta vaya'mo'ya kenona'a mage hu'ya hapaiye “Yisasi'a agai'ahena mage huno hu-maine ‘Nagaya Anumaya Koti nafa'ne mainoe.’ huno'ma hiana tagaipina kahegi kemo'a mage hu-maine ‘Mani'a augafa kema hisia kanomo'a falisie.’ huno hu-mainefe menia Yisasi'a mani kema hu-mainea yafe falisie.” hu'ya hae.

⁸ Hageno Pailati'a ani kea haviteno tusiya huno ama'yoa ne'aiye. ⁹ Ama'yo aigeno Pailati'a eteno kaiyekema nehavia nopinaga

hai-faleno maineno Yisasifena mage huno havige “Kagaya hanategati emainane?” huno havigeanagi Yisasi'a kenona'a ohune. ¹⁰ Ohigeno Pailati'a mage huno hapaiye “Kagaya na'a higeka nagelela no'aline? Nagaya tokiya'niene kanogi'na ‘Kina nopitila atalegahae.’ hu'nama hisuana afa'a katalegahae. ‘Yafaga yosale nili hetama asaigeno falino.’ hu'nama hisuana ani'a hu-ga-tegahae. Kagaya mani kea nohavino?” huno havige. ¹¹ Havigegenon Yisasi'a kenona'a mage huno hapaiye “Anafinaga mainea Anumaya Koti'a kagai'ma tokiyama okaminele'asipa nagaila natafa ohatel'asinagi amakayama navale'ya kagai kayapima natenaya vaya'mogamina kefo ya'amimo'a kagai kefo yakamona agaseno kasago'ya kefo ya'ami hane.” huno hie. ¹² Higeno Pailati'a anima hia kea haviteno “Hana'a hu'na atalesugenon visie?” huno kafe ati-ne'ayege'ya Yuta vaya'mo'ya ala kegefafiti mage hu'ya hu-mainae “Nagoke kanomo'a Yisasi'ma hia kava huno agai'ahe ‘Nagaya ala sauve kanoma mainoe.’ huno'ma hisia kanomo'a Sisana kame'a maine. Kagaya mani kanoma atalesanagenon visiana kagaya tagaila ala sauve kanotia, Sisana, kanapa'a omainane.” hu'ya hae. ¹³ Hageno Pailati'a ani kema haya kea haviteno Yisasina avaleno hatilavino kumatega elavino ea'yamo ala kaiyekema havi kanomo siale emaine. Ani siama malenaya aupaligahena Yuta vaya'mogami kefina Kapatae hu'ya nehae. Ani aupaligahena tagai kefina

amalagu ai'ya yafa malenaya aupaligae huta hugahune.

¹⁴ Ani kanafina Anumaya Koti'a amakinagomogami amaugafama ali-gati-mainea yafe Yuta vea'mo'ya amakesa hao hinage'ya havisaya yafe imu ki kana'amimo'a aupa hige'ya talo tala hisaya yafe yagemo'a euno amanutule evigeno Pailati'a Yuta vea'mogamina mage huno hama-paiye “Ala sauve kanotamimona ageho.” huno hie. ¹⁵ Hige'ya amakaya ala kegefafiti mage hu'ya hae “Aote'yama'ae. Aote'yama'ae. Yafaga yosale nili hetama asaigeno falino.” hu'ya hageno Pailati'a mage huno hama-paiye “Nagaya tamakai sauve kanotamia yafaga yosale nili he'na asaisue hugetama nehao?” huno hige'ya mono note kava vaya'mo'ya mage hae “Tagaila nago ala sauve kanotia omaine. Sisa'a agai'age nagoke maine.” hu'ya hae. ¹⁶ Hageno Pailati'a “Yisasina yafaga yosale nili hetama asaiho.” huno avaleno amayapi amamine.

Yisasina yafaga yosale nili he'ya asai-mainae.

¹⁷ Yisasina avale'ya vageno hae'ya asaisaya yafaga yosa agai'a ko-fino anu ayamufae hu'ya nehaya ago'yalega umaine. Ani ago'yamo agia Yuta vaya'mogami kefina Kologotae hu'ya nehae. ¹⁸ Ani ago'yafi avale'ya vaya'amo'ya yafaga yosale nilia he'ya asai-malena. Tole kanolata'ene hanaote yafaga yosale aluga aluga atupale hanae'ya asai-malene'ya Yisasina amu'no'anifi nilia he'ya asai-malena.

19 Asai-maletageno Pailati'a nago avona kaeno Yisasina nilima he-malaya yafaga yosale asai-malene. Ani avomo'a mage hie "Nasaleti Yisasi'e, Yuta vaya'mogami sauve kanoa ma maine." huno kae-malene. 20 Kae-malenege'ya Yisasi'ma yafaga yosale asai-malenaya kaiyaga ala kuma'mo aupa'ale hae'ya asai-malayanagi'ya muki'a Yuta vea'mo'ya ani avona hapali'ya havimainae. Pailati'a tagufa (3) kefiti kae-malene. Yuta vaya'mogami kefiti'ene Lomu vaya'mogami kefiti'ene Kaliki vaya'mogami kefiti'ene kae-malenege'ya hapali'ya havimainae. 21 Haviya yafe Yuta vaya'mogami mono note kava vaya'mo'ya Pailatifena mage hae "Kagaya 'Yuta vaya'mogamina ala sauve kano'ami ma maine.' huka okaeka ma ke huka kao 'Nagaya Yuta vaya'mogami ala sauve kano'ami mainoe huno'ma hia kanoa ma maine.' huka kao." hu'ya hae. 22 Hageno Pailati'a mage hie "Kae-malenoa kea hai kae-maleno." huno hie.

23 Ati vaya'mo'ya Yisasina yafaga yosale nili he'ya asai-malete'ya kena'a fo'a (4) heta'ma vai'ya ali-mainae. Aya'aya siota'aene aligahe agayana muki'a analegati afetegama lavi-maineana aye ohati siota hane. 24 Ohati siota hanea yafe ani ati vaya'mo'ya kea mohu mehu hu'ya mage hae "Hatata ohuta afa'a musufa yama nehaya yokaloa kasi nelesunageno tagasesimo'a alisie." hu'ya amakai'ami huvimainae. Ani'ama haya kavala Anumaya Koti

kefima nayoma kae-malenaya kemo'a ago efalote huno tamage nehie. Anima nayoma kae-malenaya kemo'a mage humaineane

“Kena'ni'a fako hu'ya ne'ali'ya nago kena'ni'a kasi yokalo-le'ya amakasesimo'a aligahie.” hu'ya kae-malenayane.

Kae-malenayanagi'ya ati vaya'moya mani kavala hu-mainae.

²⁵ Hage'ya Yisasima asai-malenaya yafaga yosamo avatela Yisasina ita'amo'ene nuna'amo'ene he-ti-maina'e. Anakai'ene Kalopasina a'amo'a Malia'ene hamo'amo'a Magatala kumate Malia'ene he-ti-mainae.

²⁶ He-ti-mainageno Yisasi'a ita'amona ageteno agai'enema tokae'ya nemaiya anagapiti hau ayamopafima hau-mainea kanomo'na, Yoni'nae, ita'amo avate he-tita'a maino'ageno ta'ageteno ita'amofena “A'mogae namona kagaika'a nafa'neka'ae.” huno hie. ²⁷ Huteno nagaifena “Namona itakamo'e.” huno hige'na nagaya ani yupa Maliana yagaigahe noni'alega avale'na umainoe.

Yisasi'a ago fali-maine.

²⁸ Ani kea huteno Yisasi'a “Muki'a ali'ya'ni'a ago ali'na ha'no hue.” huno agesafinaga hav-imaine. Nayoma Anumaya Koti kema kae-malenaya kemo'a efalote huno tamagama hisia yafe mage hie “Life nenage.” huno hu-maine.

²⁹ Hige'ya nofi alagafiti falote hia tina nagola havate-mai ke'ayola ali'ya havago'yafa kana yana ani lipi ayete'ya ka'yote vai'ya ali-saga

hu'ya Yisasina avayale malenae. ³⁰ Malageno Yisasi'a mayu mayu huno neteno mage hie “Nenafagae naha-pai-mainana ali'yana ago ali'na ha'no hue.” huno nehuno age'ya ainamagino agu nafa'ne'amo atalegeno vigeno fali-mainae.

Ati kanomo'a keveleti Yisasina haohipafi aye-mainae.

³¹ Sapati yupahe talo tala hisaya yupagino ega ala Sapati kana falote hisia yafe Yuta vaya'mo'ya anima yafaga yosale'ma hamae-malaya vaya'mogami amaugafamo'ma Sapatile'ma yafaga yosale hanesia yafena ohamaige'ya Pailatife mage hu'ya mo havigae “Ati vaya'mo'ya amaiya ali kofa hisage'ya aupa'a falisage'ya hipo'ya hu'ya ali'ya visae.” hu'ya mo havigae. ³² Hageno Pailati'a ati vaya hama-paige'ya mogayana Yisasi'enema yafaga yosale asai-malaya kanolatamogani anaiya meli kofa humainae. ³³ Ali kofa hute'ya Yisasina megayana ago fali-mainege'ya megete'ya aiya ali kofa ohunae. ³⁴ Ali kofa ohageno nago ati kanomo'a keve'aleti Yisasina haohipafi meyegeni aupa'a ani keve kapitila kolamo'ene timo'ene taki-lavi-mainae.

³⁵ Taki-lavigeno'ma age-mainea kanomo'a tamaha-nepaiye. Tamaha-nepaiya kea tamage'age ke hanea yafe agai'a havilama hu-lineno tamaha-nepaiyafe tamakayaenena Yisasifena havitama tamakupi maletama

tamametiti hisaya yafe tamage¹age ke tamaha-nepaiye. ³⁶⁻³⁷ Nayona Anumaya Koti kema kae-malenaya kemo¹a mage hu-maineane

“Amakaya nago ayamufa¹a ali kofa ohugahae.” hu¹ya kae-malenayane.

Nagi nagola Anumaya Koti kema kae-malenaya kemo¹a mage huno hu-maineane

“Haohipafina keveleti¹ma aye-mainea kanomona agegahae.” hu¹ya kae-malenayane.

Kae-malenaya kemo¹a falote huno tamagemama hia yafe mani kavala hu-mainae.

Yisasina haegafa komufi he-vai-tenae.

³⁸ Yosefe¹a Alimatiyae hu¹ya nehaya kumate nemaiya kanogino Yisasi ke havino akave nemalea kanogi Yuta vayafe koli huno Yisasifema ametiti nehia yana fala-ki-lineno mage huno Pailatina mo havige “Yisasina augafa¹a aligahe nehue.” huno mo havige. Havigegen Pailati¹a “E.” huno higeno Yosefe¹a via¹yamo Yisasina augafa¹a mo hipo¹ya huno alino emaine.

³⁹ Nikotimasi¹a hagoteno Yisasite hanipinaga emainea kanomo¹a Yosefena mo ha-maegahe kule fuki kana mana¹age tina tole yosafiti he-fino ali havigu higeno mana¹age tina falote higeno sigelile mo malegeno teti¹a (30) kilo falote higeno alino emaine. Ani tole yosalatamogani anakia mea¹ene alo¹ene alino emaine

⁴⁰ Ani tole kanolatamogania va¹a¹yamogani Yisasina augafa¹a mo hipo¹ya hu¹ana mopale malene¹ana mana¹age tina fale-tete¹ana kefe kana kenaleti augafalela ai-galaki galaki hu¹ana

ha'ya kite'ana aye-gasagi-malena'e. Muki'a yupa Yuta vaya'mo'ya vaya'amima falige'ya ani'a hu'ya ne'amataya kava hu-tena'e. ⁴¹ Ani kaiyaga Yisasina yafaga yosale nilima he'ya asai-malenaya kaiyaga nago hoya hane. Ani hoyafina nagola vaya'ma he-vai-ma-tesaya yafa kana, ya-ufa kafi-malenayane. Anifina nago vayala he-vai-o'ama-tenaya yafa kapi ali'ya mo he-vai-tenae. ⁴² Ani yupa Sapatihē havi'ya talo tala hisaya kanafinagi'ana ani matimatila aupate'ma hanea yafe ani tole kanolatamogania Yisasina augafa'a ali'ana anifi mo malena'e.

20

Yisasi'a fali-mainefiti eteno he-ti-mainē.

¹ Sota yupa kola otinegeno Magatala kumate Malia'a natema'a Yisasina he-vai-tenaya komulega umaine. Uno mogeana komumo avayale'ma aiso hu-malenaya yafana ago alike-litalenageno avayalela omalegeno moge-mainē.

² Mogeteno eteno aiya-yeno Yisasi'ma nehaiya kanoene Saimoni Pita'ene maina'ale eno mage huno hana-paiye “Alatimona komufitila ago ali'ya hanatepi atēnae.” huno hana-paiye.

³ Hana-paige'ana havite'ana Pita'ene Yisasi'ma nehaiya kanoene Yisasi komulega umaina'e. ⁴ Anaiya-ye'ana ani komulega va'aleti Yisasi'ma nehaiya kanomo'a Pitana agaseno aupa'a komule hagoteno umaine. ⁵ Uteno mope hu-maineno ageana Yisasina aye-gasagi-tenaya

kena'age hanegeno ageanagi anifinaga hai-ofalene. ⁶⁻⁷ Hai-ofaleno mainegeno Saimoni Pita'a akave ea'yamo ani komufinaga aupala hai-fale-maine. Haino mogeana nago'a aye-gasagi-tenaya kena ne'ageno anute'ma ki-tenaya kenaene Yisasina augafale'ma aye-gasagi-tenaya kenaene nagopi tokaeno omalenegi aote kaiyaga aye-gafage-kino malenegeno haino moge-maine. ⁸ Ne'agegeno Yisasi'ma nehaiya kanomo'a komule'ma hagoteno umainea kanoa anifinaga hai-faleno mo ne'ageno komufiti'ma he-ti-mainea yafe "Tamage nehie." huno havino agupi maleno ametiti nehie. ⁹ Ani kanafina muki'a anaga'amo'ya Anumaya Koti kema kae-malenaya kea havilama ohunae. Ani kemo'a mage huno hu-maine "Yisasi'a fali-mainesifiti he-tigahie." hu'ya kae-malenaya kemona havilama ohunae. ¹⁰ Anakaya Yisasi'enema tokae'ana nemai'a kanolatana anifinagati hati-lavi'ana no'anilega ete'ana umaina'e.

Magatala Malia'a Yisasina age-maine.

¹¹ Malia'a ani yafakamo avayale he-tino maineno avi ne'ateno ape huno ani komufinaga aulu heno ne'age. ¹² Ageana tole ensole kanolatana efe'age kena'ani faili'ana Yisasi augafama malenaya yate mopale maina'e. Nago kanoa anuma malenalega maigeno nago kanoa aiyama malenalega maigeno hu-maina'ageno anake-maine. ¹³ Ne'anakege'ana Maliafe mage ha'e "A'mogae na'a higeka avia ne'atane?" hu'ana haviga'ageno Malia'a mage huno hie

“Alani'amona ali'yama mo malaya kumala o'agenoa yafe avi ne'atoe.” huno hie. ¹⁴ Nehuno mai-yahae huno ageana Yisasi'a he-ti-mainegeno ageanagi augosafina agelama ohune. ¹⁵ Agelama ohigeno Yisasi'a mage hie “A'mogae na'a higeka avia ne'atane? Tafe ati ne'ayane?” huno havigegeno Malia'a agesafinaga mage huno hie “Ma kanoa hoyale'ma yagai-mainea kano maine.” huno agesafinaga nehavino mage huno hie “Museka'a nehugi kagayama alika umainenukahena malenesana kumafena naha-paige'na molino.” huno hie. ¹⁶ Higeno Yisasi'a mage huno hie “Maliao.” huno higeno ani a'mo'a maiyahae huno Yuta vaya'mogami kefiti mage huno hie “Laponae.” huno hie. Ani kemo'a takai kefina “Hu-lave-nelina kanomogae.” huno hie. ¹⁷ Higeno Yisasi'a mage hie “Nenafa mainelega ohainogi natafa ohuka nagana'nimogamina mage huka mo hama-paiyo 'Nagai'ene tamakai'ene Nelafatega haigahe nehue. Nagai Anumaya Kotitegaene tamakai Anumaya Kotitegaene haigahe nehue.' hu'ka mo hama-paiyo.” huno hie. ¹⁸ Higeno Magatala Malia'a via'yamo Yisasi'enema tokae'ya nemaiya anaga'amogamina mage huno hama-paiye “Nagaya Alani'amona ago agoe.” huno nehuno “Nage mage huka hama-paiyo.” huno'ma hapaiya kea hama-pai-maine.

Yisasi'a aleveni'a (11) anaga'amogamite eva'yi hu-maine.

¹⁹ Yisasi'a fali-mainefiti'ma he-ti-mainea Sotamona hanipinaga Yisasina aleveni'a (11)

anaga'amo'ya Yuta vayafena koli'ami hu'ya fita ki'ya tokiya'age hu-malete'ya nopinaga alitalu hu'ya mainae. Mainageno Yisasi'a eva'yi huno amu'no'amifi me he-ti-maineno mage hie “Tamaipamo'a falu nehinagetama maiho.” huno hama-paiye. ²⁰ Hama-paiteno akai'ma ayapima nilima he-malenaya afugu'ene haopafina kevema aye-mainaya afugu'ene amave-neliye. Amave-lige'ya aleveni'a (11) anaga'amo'ya Ala'amimona agete'ya amaku'amo'a tusi'a muse hia kava hae. ²¹ Hageno Yisasi'a nago'ene mage hie “Tamaipamo'a falu nehinagetama maiho. Nenafa'a hu-na-tenea augafa kava hu'na nagaya tamakaila hu-nela-matoe.” huno hie, ²² Mani kema nehuno'a haimula fu huno ne'amamino mage huno hie “Tamakaila Alu Aotage Avamula nelamamugi avaleho. ²³ Nago'a vea'mogamina ai-ge'ama-tetama kefo ya'amima atale-ma-tesayana Anumaya Koti'a ani'a huno ani kefo ya'amia ai-ge'ama-teno atale-ma-tegahie. Kefo ya'amima ai-ge'ama-tetama atale o'amatesaya vea'mogamina Anumaya Koti'a kefo ya'amia ai-ge'ama-teno atale o'ama-tegahie.” huno hama-paiye.

Tomasi'a Yisasina age-maine.

²⁴ Yisasi'ma amakaite eva'yima hu-mainea yupa aleveni'a (11) anaga'afitila nago kanoa amakai'enena omaine. Ani kanoa, Tomasi'e, nago agia Titimasi'e, tagai kefina kuyave nafa'ne, ani kanoa omaine. ²⁵ Omainege'ya amakaya

“Tagaya Alatimona age-mainone.” hu'ya hane-paigeno'a Tomasi'a mage hie “Yisasina nilima he-malenaya afugu'ma o'age'na, naginagoma nilimo kapima omale'na haopafima keve honomu'ma aye-malenaya afugupima nayama o'vainu'nahena mani kea ali'na nagupina male'na nametititia ohugahue.” huno hie.

²⁶ Seveni'a (7) kana maite'ya Yisasina aleveni'a (11) anaga'amo'ya ete'ya ani nopi mainageno Tomasi'a amakai'ene maine. Fita ki'ya tokiya'age hu-malayanagi Yisasi'a eva'yi huno amu'no'amifi me he-ti-maineno mage hie “Tamaipamo'a falu nehinagetama maiho.” huno hie. ²⁷ Tomasifena mage hie “Kaginagoa male me maleka nayapi nafugula ago. Kayana nahaopale'ma hanea nafugupina vaika ago. Ageteka tole kagesama havina kagesa ne'ataleka nagai'fena havika kagupi maleka kametiti huo.” huno hie. ²⁸ Higeno Tomasi'a mage hie “Kagaya Alani'amogae Anumaya Koti'nimoga mainane.” huno hie. ²⁹ Higeno Yisasi'a mage hie “Kagaya ago'ma nagana yafe kagupina maleka kametititia nehananagi onagenesaya vea'nemo'yama havi'ya amakupi male'ya amametitima hisaya vea'mo'ya tusi'a muse hugahae.” huno hie. ³⁰ Yisasi'a aleveni'a (11) anaga'amogami amaulagafina alu'a alu'a tokiya avame'ya'yaga hu-maineanagi ani yana muki'a mani auta'mafina okaenoe. ³¹ Okaenoanagi manima kae-maloe kea tamakaife huno Yisasi'a, Anumaya Kotina nafa'ne'amo'a, tagu tamema

ali-gatisia kano maine hutamama havitama tamakupi maletama tamametitima hisaya yafe kae-malenoane. Ani yafe havitama tamakupi maletama tamametiti hisayana Yisasi agileti agola maige maige hisaya tamahaimula aligahae hu'na kae-maleno.

21

Seveni'a (7) anaga'amo'ya Yisasina age-mainae.

¹ Haenaga'a Yisasi'a eteno agai'enema tokae'ya nemaiya anaga'amogami amaule ma kava huno Taipiliasi tikotumo agegayalega eva'yi hu-maine. ² Saimoni Pita'ene, Tomasina nago agia Titimasi'e, tagai kefina kuyave nafa'ne, Nataniolo'a, Kalili hanea kumala Kena kumate kanoene, tole Sepeti nafa'nelata'a Yoni'ene, agana'amo'ene, tole Yisasina aleveni'a (11) anaga'aene mainae. ³ Mainageno Saimoni Pita'a mage huno hama-pai-maine “Nagaya noyame ku'ya hugahe ne'ue.” huno hige'ya mage hae “Kagai'ene ugahune.” hu'ya hapait'e'ya tipi kalefi hai-saga humai'ya ani kegela vayanagi nagoke noyamea o'alinae.

⁴ O'aligeno yagea hai va'yi hugahe nehigeno Yisasi'a ti agegayalega he-ti-maiyanagi agai'enema tokae'ya nemaiya anaga'amo'ya Yisasi'e hu'ya agelama ohunae. ⁵ Agelama ohageno Yisasi'a mage huno hama-vige “Vae nafa'ne'nimogatama nago'a noyamea ne'alifi no'aliye?” huno hamavi-gege'ya “A'ao

no'alune.” hu'ya hapai-mainae. ⁶ Hapaigeno Yisasi'a mage huno hama-paiye “Tamakaya kukonagona tipi kalemona tamaga kaiyagamo haikanagati haga'yu hutama malesayana noyamea aligahae.” huno hama-paige'ya kukonagona ani'a hu'ya haga'yu hayana tusi'a noyame aligeno kana'age hige'ya alisaga hisaya yafena tusi'a ya hu-mainae.

⁷ Yisasi'enema tokae'ya nemaiya anagapiti nehaiya kano'amo'a Pitana mage huno hapaiye “Agaya Alatimo'e.” huno hapaiye. Hapaigeno Saimoni Pita'a anima hia kea nehavino aupala augafale ano'ya asagi-taleno ali'yana ne'alileti eteno aupala alino vai-lino tipina asaga hulavino Yisasitega ne'vie. ⁸ Vige'ya ani tipi kalea alu'alelomagi vani hataleti (100) mita aupale maine'ya nago'a Yisasi'enema tokae'ya nemaiya anaga'amo'ya kukonagona avayu hu'ya ti agegayalega emainae. ⁹ Ti agegayalega me malete'ya agayana ata nelegeno nago noyamene hame mayaene ani atafina hanege'ya age-mainae. ¹⁰ Ne'agageno Yisasi'a mage huno hama-paiye “Menima aliya noyamefitila nago'a alitama eho.” huno hama-pai-mainae. ¹¹ Hama-paigeno Saimoni Pita'a tipi kalefi hai-saga hu-maino kukonagona avayu huno ti agegayalegama eana kasago'ya noyame, vani hataleti fifti tali'a (153) noyameyaga ani kukonagopina hiya hu-maiyanagi ani kukonagomo'a ailagatoa ohune. ¹² Yisasi'a mage huno hama-paiye “Tamakaya etama kavela me neho.” huno hama-paige'ya agai'enema

tokae'ya nemaiya anaga amama'yoma aiya yafe “Kagaya lagae.” hu'ya haviokenagi “Alatimo maine.” hu'yama amakesafinaga haviya yafe haviokenae. ¹³ Yisasi'a atale ea'yamo hame mayaene noyamene melino amamine.

¹⁴ Yisasina komufima he-vai-tageno eteno'ma he-ti-maineana tole yupa age-mainaleti eteno mani kava'ma hiana napa tali (3) kanale eva'yi hige'ya agai'enema tokae'ya nemaiya anaga'amogata taulagafiti age-mainone.

Yisasi'a Pitafe “Sipi sipi'nilela yagaiyo.” huno hapai-maine.

¹⁵ Kavela netageno Yisasi'a Saimoni Pitana mage huno havige “Saimonigae Yoni nafa'nemoga kagaya ma vayala amakaseka nago'ene kagu'a nenamino?” huno havige. Havigegeno Pita'a mage huno hie “E, Alani'amogae kagaya ago nehavine kagaifena nenahaiye.” huno higeno Yisasi'a mage huno hapaiye “Kagaya nagai sipi sipi nafa'neyaga kavela amamio.” huno hapai-maine.

¹⁶ Hanepaino nago'ene mage huno hie “Saimonigae Yoni nafa'nemoga kagu'a havika ago nenamino?” huno havigegeno Pita'a mage huno hapaiye “Kagaya ago nehavine nagaya kagaifena nenahaiye.” huno higeno Yisasi'a mage huno hapaiye “Kagaya sipi sipiyaga'nilela kava yagaiyo.” huno hapaiye. ¹⁷ Hapaiteno nago'ene napa tali (3) kanale mage huno havige “Saimonigae Yoni nafa'nemoga nagaifena negahaiyo?” huno higeno napa tali (3) kanale'ma “Kagaya

nagaifena negahaiyo?” huno'ma havigea yafe Pita aipamo'a kana'age higeno mage huno hie “Alani'amogae muki'a yana ago havi-mainane. Nagaya kagaifema nenahaiya yafena ago nehavine.” huno hapaigeno Yisasi'a mage huno hie “Kagaya sipi sipiyaga'nia kavela amamio.” huno hapai-maine. ¹⁸ Hapaiteno mage hie “Tamage-lafa hu'na kaha-pauve kagaya neyama maineka kamu nofila ki-takalo hu-maleteka ‘Visue.’ hukama hana kumatela ne'vananagi haenaga'a kosunama lesanana kayana alisaga hulinesanage'ya nago'a vaya'mo'ya kenaka fai-gatete'ya ‘O'ugahuema.’ hukama nehisana kumatela afa'a kavale'ya ugahae.” huno hie. ¹⁹ Anima hia kemona aepa'amo'a mage huno humaine “Haenaga'a kefo vaya'mo'ya katafa hu'ya kahaesagekama falisana yateti Anumaya Kotina ala agi amigane.” huno aepa'a huteno Yisasi'a Pitafena “Nakave eno.” huno hu-maine.

Yisasi'a hau ayamopafima nehaiya kanomofe hu-mainea ke.

²⁰ Yisasi'ene tokae'ya nemaiya anagapiti hau ayamopafima hau-mainea kanoa kave'ma nemainaya yupa Yisasina ava'ale maineno mage huno havige-maineane “Alani'amogae kagaila kagesi'ma huno kamema hu-ga-tesia kanoa hana kanomo'e?” huno havigea kanomo'a Yisasi'ene Pitagani anakave ne'vigeno Pita'a maiyahae huno age-maine. ²¹ Ageteno Pita'a Yisasina mage huno havige “Alani'amogae ani kanoa haenaga'a hana augafa kava hugahie?” huno

havige. ²² Havigegenō Yisasi'a mage huno hapaiye “Nakai'ma nahaisige'nama ma mopafima ete'na esua yupa afa'a mainesige'nama esuana kagai yano? Kagaya nakave eno.” huno hapaiye. ²³ Hapaiya kemo'a anaga'amogamipina mani kema hia kemo'a ute ete hige'ya mage hae “Yoni'a ofaligahie.” hu'ya hayanagi Yisasi'a “Ofaligahie.” huno hu-o'a-tenegi “Nagai'ma nahaisige'na ma mopafima ete'na esua yupa afa'a mainesige'nama esuana kagai yano?” huno hu-maine. ²⁴ Ani kema hayana Yoninihe hu-maine. Nagaya muki'a Yisasi'ma hu-mainea kavafena tamaha-nepai'na avona kae-malenoe. Nagayama nehua kea tamage-lafa hu'na havili-noa ke tamaha-nepauve.

²⁵ Yisasi'a muki'a alu ya alu yana hu-maineanagi nago'a vaya'mo'ya mani kema muki'a nagoke nagoke avopima kayale'asina mani avo'yagamo'a kasago hige'ya malesaya kuma'mo'a muki'a ma kotega nagesa havuana hiya hile'asine hu'na nehue.

CXXX

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 21 Feb 2024 from source files dated 31 Aug 2023

55807fd5-1005-5405-89da-5533a7950c65